

Atham woLukka Lon iloporot loKapik ammakka oLukka pokurrot **Lon lonothon**

OLukka pokurrot atham enni ana atham won- gre ngoul wothothilettat woIeccuo. Kwokurrinet ul woIouth ana iannoka woIouth. Ook ngka kung pokat pannoka poul woIouth ipothakkat pul ipammakot oIeccuo. Kwangkene kicce thikkoik ana ngre ngoIeccuo nthothettot cik othakka itti aron ina.

OLukka perethe thokwonta thoIuanna ngoma- muthie ana thokwonta thoIeccuo. Kwerethe thongkene tholon iloporot loIeccuo ana ngre ngoIuanna pomamuthie ana lon ilokat cik alec- cuo parthuk okkot ngre. OLukka pakene itti thongat Kapik kongothe ul appik nthereneron itti oIeccuo pittiethe pul ipopari ipokat pongo luput attul ana ikken ke'ra ana kwakkarot ul ia'rintinthet nili akucci amakothok, ana kwokiccet u'rupa iokithak nti ipul. OLukka pereneron lon lothokkwie lon kuru ncik lopul poCcamria ipoporot (Ku'rathal 10) ana Lokkul iurathe cik (Ku'rathal 15). OLukka pacothot atham ntheret tat akka oIeccuo poccoke the thiak ana io ana uroko nti ithio. Kumminthet ul wothothilettat wung akwokenekin itti kwokat pannio. Kwonekkekathe lon cik itti kwathinthet kin Kanang ikupupure. Ana kwopakathe tothi'rot.

Lon ilaik iatham

1. Lon lonothon (1.1–4)
2. Thokwonta ana thathukur thoLuanna ngomamuthie ana oIeccuo (1.5—2.52)
3. Ngre ngoLuanna pomamuthie (3.1–20)
4. Mamuthie ana thennekketta thoIeccuo (3.21—4.13)
5. OIeccuo pakkot ngre noka'ran koCelil (4.14—9.50)
6. OIeccuo peot nnoka'ran koCelil akweo noka'ran koUrucelim (9.51—19.27)
7. Thokkiet oIeccuo thiak ana thio (19.28—23.56)
9. OIeccuo purokot nti ithio ana kumminthet ul wung iammakothok (24.1–53)

¹ Pangkin oThiappiloc, ul woppot wokurrot lon ana a'rupu iokat cik icat tokit konnon. ² Okin thokurrot lon ammakka lerettanet nin nul immat lon ncinomun ana okin ithongkenet lon loKapik. ³ Ana inakka oun ngka kin pommakotho lon appik nci nomun kicce, mpongothe itti mpakurrot cene othettot cik kicce anokurrinung oThiappiloc pul iprik, ⁴ othakka itti aina anganna lon ilaik icat ila ngkwappongkenettat.

Thokwonta thoLuanna pomamuthie thi'rettat

⁵ Noca'ri coIruthuc ili woIouthia, pul p'rek pokat cik ponoppa toKapik poccot k'ran itti oCekkeria ipokat ikuthuk koul wonoppa toKapik wApia ana opari Alicepeth pokat cakuruk pothiki thoul wonoppa toKapik worikuthuk kArun. ⁶ Okin oththuththe'ra thokat thoporot tokit koKapik ana nthoccokotho lon lolli appik ili'rettat ana ntho'rumot nolon ilamakittat papenang. ⁷ Anaruk okin thellat nyukul akka

Alicebeth pokat papucung ana okin aththe'ra thokat thukkwat.

⁸ Ca'ri c'rek caCekkeria pokat cik akwokkot ngre noppa toKapik ammakka ook pul ponoppa toKapik noca'ri cing icapinthok ⁹ kwokat pummuntat nthokkwo mo'rio ammakka thathuma thoul wonoppa toKapik thokat akweo noppa toIli akwothok're nga'ra iokkunako amutha. ¹⁰ Anakka ca'ri caat cothok're nga'ra iakkunako amutha, ul ia'ra nga'rama wokata cik wa'rantakotha thapat a'ra nga'rama.

¹¹ Ittina au'rupa wothothilettat wolli ummanthok ncik, aco'rat thokkun wothothari woru'rot tonoppa toKapik na nga'ra iakkunako ngokat ak'rettat. ¹² Anakka oCekkeria pimmat u'rupa wothothilettat woKapik akwirrat tit akwipat n're. ¹³ Anaruk u'rupa wothothilettat woKapik wi'rekathok itti, "Cekkeria, kirrni ipo n're. Kapik kockikotha nga'rama ngang, opari pang Alicebeth pakwoninung ukul iocura ana ngkwacie k'ran itti oLuanna. ¹⁴ Kwapirieng noka ana ul woppot wapirane thokwonta thung noka ¹⁵ akka kwaka priik tokit koIli. Kwakannikko ngapak ana Kanang ikupupure kaka naak nciki icarak connan. ¹⁶ Kwakkaprtto ul woIccereil woppot nti ilon ilokithak apakkinthet Ili Kapik ken. ¹⁷ Ana kweo tokit koIli iKanang ikupupure ana pu'ran popul pothernte lon loKapik oIli ana kwapakket mikit moththan ponyukulon iku'ri nynyukul nyen, ana kwakkaprtto ul iokat w'rat lon iloco'rotheik angkot lon lothina cik nti ica loul woKapik. Kwakuccenthet thanthan thoIli ul

cik.”

¹⁸ ACekkeria ipittat u'rupa wothothilettat woKapik itti, “Mpina itti laik icat taththa? Mpukkwat ana opari pin pukkwat.”

¹⁹ U'rupa wothothilettat woKapik wothianthok tit itti, “Oun oCepereil. Mpaik paco'ro tokit koKapik ana mpothilathe anathi'rethung lon elli iloporot. ²⁰ Anaruk inakka ngkworakket lon lin ilathokaik icat noca'ri cen, ngkwannere puccuk alon ila mpi'rethung othakkakat.”

²¹ Ca'ri cen ul wokat cik a'rikot oCekkeria thapat aprttakot tit itti ngintha akka kwocinet cik puccuk noppa toKapik. ²² Anakka kwopotho thapat kwommakathe erenekin akwikat cik akwere nyaun akin inakat itti kwimmathe lo'rek noppa toKapik anaruk kwo'rungkwathe pomma nthon.

²³ Anakka ma'ri mung mothokkot ngre noppa toKapik momttathe kwopakkothe tuan. ²⁴ Anakka lon len lomttathe ana noma'ri motte apari Alicepeth oppekathe ana kwikkatheik noppa anak ukuluk okorronno oppot thapat. ²⁵ Kwi'rekathe itti, “Ili akkokkinthin elli, kokenerin thongat thung noma'ri emmi ana kwopa'renin thothia cik thin tokit koul.”

Theret thokwonta thoIeccuo

²⁶ Nokwanok ik'rakkuruk aKapik othiat u'rupa wothothilettat wung ioccot k'ran itti oCepereil ciki noka'ran koNaccir ikaik noththok poCelil, ²⁷ nokkul ioi're iakanna'rutta ngngin aththik

woccot k'ran itti oMeriom iokat wokkaccakinet pul ipoccot k'ran itti oluccip thiki thoThauth.

²⁸ U'rupa wothothilettat woKapik woingkanthok ai'rekat itti, "Taththa okkwi ipa Kapik kongothe kannan, Ili waik naung."

²⁹ OMeriom pipanthe lon len n're akwoprttakanthe thomicco then tit. ³⁰ Anaruk u'rupa wothothilettat woKapik wi'rekathok itti, "Meriom, kirnni ipo n're, oung pul ipa Kapik kongothe. ³¹ Ngkwappet ana ngkwakwono ukul iocura ana ngkwaccie k'ran itti oleccuo.

³² Kwaka priik ana kwakkarako itti ukul wokkwi ipaik cithothi'rot. Ili Kapik wethok prrok poththan oThauth, ³³ ana kwathakka ili wothiki thoIakup thupuththuput ana ngili ngung ngakannomttat thupuththuput."

³⁴ AMeriom ipittat u'rupa wothothilettat woKapik itti, "Elli lathakka taththa akka mparthuk poi're ana mpomma pul ipocura?"

³⁵ Au'rupa wothothilettat woKapik othiat tit itti, "Kanang ikupupure kanthan naung ana pu'ran poKapik korothe'rot paka naung. Ilen akka ukul iakwonta nti iaung wakkarako itti ukul woKapik. ³⁶ Ana manna Alicepeth poku'ri kang poppethe ipa ul wokat cik aere itti kwokat pucung. Ana kwoppethe ponu anak w'rakkuruk.

³⁷ Akka lon lella ilalkothe Kapik."

³⁸ AMeriom othiat tit itti, "Oun pul iparekine Ili. Alothakkanin menik ammakka ngkwi'ret." Au'rupa wothothilettat woKapik oththekat naak.

OMeriom paththokatha nAlicepeth

³⁹ Ca'ri cen oMeriom purokathe akwi'rikittakat oku'rot noka'ran noththok poLouthia.
⁴⁰ Akwoingkat tuan thoCekkerian akwomiccat Alicepeth. ⁴¹ Anakka Alicepeth poccikothe po're poMeriom aukul ikkat cik aurttuko nti icarak aKanang ikupupure o'rat nAlicepeth.
⁴² Akwi'rekat lon mpo're cittan itti, "Oung akkethiëttat nti iul iari appik ana ukul iathokwono wethiëttat. ⁴³ Turuk itti ngintha akka mpongakinthet ittina, itti onnan polli painin? ⁴⁴ Akka po're pothomicco thang po'rorin iunu aukul ikkat cik aurttuko nthopira noka nciki icarak. ⁴⁵ Pul pethiekothe cik ipoccokothe lon loKapik nocikit ila Ili wi'rethung lathakka icat."

Kunye koMeriom kothomereket Kapik

- ⁴⁶ AMeriom i'rekat itti,
 "Mpopiranet Ili noka nci noucce win
⁴⁷ ana kanang kin kopiranet Kapik noka akka ook potho'ret thin
⁴⁸ akka kwokwarikothin ipa piak pung.
 Inenni thiki enthi appik thakkaron itti pul ipa Kapik kethiëtheik.
⁴⁹ Akka okkwi ipakannalkakot pokkinthin lon lrik k'ran kung kupupupure.
⁵⁰ Thiak thung thaine ul iothianok cik thiki thiki.
⁵¹ Kwokkothe ngre mpu'ran pung ana kwopettothe ul cik ipot ka thoura ana iongothe lon loka ken.
⁵² Kworpethe nili cik nnorrok wen anaruk kwo'rumot noul ia ul wella kit ken.

- 53 Kwoththikiethe ul iamat na'rupu woppot ioporot
 anaruk kwothilethe a'rthan ikathar nyaun incürük.
- 54 Kwittarothé piak pung iparekinok oIccereil,
 ana kwokwarikathe itti kwipo thiak thung.
- 55 Ana ammakka kwonekkenthet Aprein on-gappa ponnon lon cik ana thiki thung thupuththuput.”
- 56 OMeriom pikkatheik okin Alicepeth anak w'rapuruk akwopakkat tuan thanung.

Thokwonta thoIuanna pomamuthie

57 Anakka ca'ri cainet Alicepeth itti kwakwono akwokonat ukul iocura. 58 Ul wonocürük ana ku'ri kung woccikathe itti Ili wipot thiak thung nthokkinthok lon iloporot ana okin thopirakathe noka okin aththungon.

59 Anakka ukul wothikkiet ma'ri mormor okin thakkakathe akin athokekkiet ana okin thokat thongothe itti okin thaccie k'ran koththan itti oCekkeria 60 anaruk onnan pi'rekathé itti, “Aa, kwaccietta k'ran itti oIuanna.”

61 Aul i'rekathok itti, “Pul pella nti iku'ri kang iponu k'ran ammakka engki.”

62 Ittina akin erekanthet oththan pokkul inyaun itti akwi'rekin itti ukul wacco k'ran itti okkwen. 63 Akwipittat kuruthut akwokurrot nan itti, “K'ran kung itti oIuanna.” Aul oprttakat tit appik. 64 Nci cinang athon thoththan pokkul anyat ana thu're thung apprikat akwikkat cik akwere lon lothomereket Kapik. 65 Ul wonocürük wipathe n're appik ana ul wikkatheik aeret lon len appik na'ran wonoththok poIouthia. 66 Ana

okkwion ithocçikothe lon len thikkatheik akin oprttakot tit akin ipittarot lon itti, “Ukul enni wathothakka ngintha amma wocokkat?” akka ukun woIli Kapik wokat naak.

Kunye koCekkeria kothomereket Kapik

⁶⁷ A^Kanang ikupupure o'rat naththan oCekkeria akwikkat cik akwere lon ilanthen akwi'rekat itti,

⁶⁸ “Athopira noka oka noIli, Kapik koIccereil akka kwaan ana kwelikkot ul wung.

⁶⁹ Kwonekkenthet ton pul cik mpu'ran prik patho'ret ton pothiki thoThauth.

⁷⁰ Ammakka kwi'rethe ul wothernte lon lung woma'rot.

⁷¹ Itti kwa'ret ton nnotho'rak thonnon ana nti inyaun nyoul i'rat ton.

⁷² Okkwo^kenet ongappan thonnon thoporot ana nthocçot kit nothonekket lon cik thung ithupupure,

⁷³ thonekket lon cik itha kwonekketheik okin ongappa ponnon Aprein.

⁷⁴ Itti kwakkieron cik nti inyaun nyotho'rak thonnon ana okwokorronnon aron ella n're.

⁷⁵ Ana oka thupupure ana thoporot tokit kung thupuththuput ammakka oron thaik.”

OCekkeria paik peret ukul wung

⁷⁶ “Ana oung ukul win, ngkwakkarako itti pul pothernte lon loKapik kocittothi'rot ngkwaeo tokit koIli akucçenthok kathar,

⁷⁷ atherene ul wung lon lotho'rettat itti laka nthocçikarnthet lon ilokithak.

⁷⁸ Elli akka Kapik konnon konu thiak thonnon.

Ana nti ithiak enthi oMiccie paineron
ntothi'rot ere cingki amma acoppo.

⁷⁹ OMiccie pathere lon ilaik icat ilaka ere k'ran
kocingki ikathocciene ul cik iaik i'rimak
ana ionu n're nothille
kwakkot lon elli itti akwipot ton ikathar
kothikkoik thoporot tokit koKapik."

⁸⁰ Ana ukul wokat cik acokka ana
athakka wonthomat iKanang ikupupure, ana
kwikkatheik ithampang ithonthomat puccuk
mono akwummat ncik tokit koul woIccereil.

2

Thokwonta thoIeccuo (*Maththa 1.18-25*)

¹ Ana noma'ri men alli oKkaiccer Akocothhoc
othiat lon lonthoththomat itti ul appik iaik
nomothok imaik inyaun nyongili ngoRoma wonu
itti wakurro 'ran wen iatham wolle woRoma.

² Thokurro 'ran enthi thocittokit akka oKirnioc
pokat ili wonoththok poCcuria. ³ Aul appik
oingkat na'ran wen athokurro 'ran wen.

⁴ Ittina oIuccip poingkathe acakuruk noka'ran
koNaccir noththok poCelil akweo Peththelam
noththok poIouthia noka'ran na Ili oThauth pok-
wontathe akka kwokat thiki thoThauth. ⁵ Kweot
tentre akwothokurrot k'ran kung akin oMe-
riom iponomittanthok itti kwittanok ana ca'ri
cen oMeriom pappoppethe. ⁶ Anakka okin

thokat tentre aca'ri akkakat cokkal itti wak-
wonta ⁷ ana oMeriom pokwonathe ukul wung
wonthire wocura ana kwo'remethekathe ukul
ikret akwiciekat cik iththuk nokuppu'rung ika

a'rupu worua o'rko taco nan akka ka'ran kakkellanet kin ikaman ika ul ikkoik tit nakucci.

Ul iu're a'rupu worua ana u'rupa wothothilettat woKapik

⁸ Ul iu're a'rupu worua w'rek wokat cik ipira thapat ana okin thokat akin angwot a'rupu worua ngko'ra iccik koka'ran koPeththelam.

⁹ Ana u'rupa wothothilettat wolli wummanthet kin ncik ana k'ran kothrik thoIli occat nakin ana okin thipathe n're kannan. ¹⁰ Anaruk u'rupa wothothilettat woKapik wi'rekathekin itti, "Nokorronno ipo n're. Mponanet non lon iloporot ana lakane ul appik. ¹¹ Inenni noka'ran koThauth pul pokwontanet non ipa'ret non, ook oMiccie Ili. ¹² Ana lon elli lakenenon ngok, onon thathiot ukul wo'remethettat ikret ana wicettatheik iththuk nokuppu'rung ika a'rupu worua o'rkot taco nan."

¹³ Ana accokkot, au'rupa wothothilettat woKapik woppot akkakat ntothi'rot akin omereket Kapik akin i're itti,

¹⁴ "Thrik thaine Kapik korothi'rot cittan ana alon oka loporot nocapu noul ia kwon-gothe."

¹⁵ Anakka u'rupa wothothilettat woKapik woththet nakin, woku'rathe tothi'rot, ul iu're a'rupu worua wikkatheik aerettine itti, "Ton eo ci Peththelam aron othokatha lon elli ilokkattathe ila Ili wi'retheron lon len."

¹⁶ Ittina okin thoi ngkathe akin iat oMeriom ana oUccip ana ukul awicatheik nokuppu'rung iththuk ika a'rupu worua o'rkot taco. ¹⁷ Anakka okin thimmat akin opettat lon cik lokkul ilakin

thi'rettanet, ¹⁸ ana ul iocckithe appik woprt-takatherit nolon ila ul iu're a'rupu worua wi'rethekin. ¹⁹ Anaruk oMeriom poccokathe lon len appik nocikit cung akwokwarttikot. ²⁰ Ul iu're a'rupu worua wopakkathe amereket Kapik ana opirane noka nolon appik ilakin thimmat ana occikot ana ilokat cik icat ammakka okin thi'rettathe.

Oieccuo pociettat k'ran

²¹ Anakka oieccuo pothikkiet ma'ri mormor ana noca'ri cothokekkiethok kwocciettakathe k'ran itti oieccuo k'ran ika u'rupa wothothilettat woKapik wethok akkwarthuk oppettat.

Oieccuo ponekittathe noppan toKapik

²² Anakka ca'ri cen caat cothonthukko ammakka lon lothonce'ret lon cik loMucca li'ret, oUuccip okin oMeriom thonekathe oieccuo noka'ran koUrucelim akwothettat Ili. ²³ Ammakka lokurrakot ilon lothonce'ret lon cik loIli itti, "Ukul wonothire iocura wonu itti wettat Ili." ²⁴ Ana okin cakuruk thoiingkathe itti okin thathethet Ili a'rupu wothokiot ngüccük cik ammakka lokurrakot ilon lothonce'ret lon cik loIli, "Mülökkür me'ra ana amma annoka mülökkür ana waka minthang me'ra imarran."

²⁵ Ca'ri enci pu'rek pokat cik noka'ran koUrucelim poccot k'ran itti oCcamaan kwokat poporot tokit koKapik. Kwokat cik akwo'rikot Kapik ako'ret ul woIccereil ana Kanang ikupupure kokat naak. ²⁶ Kanang ikupupure kakki'rethok itti kwannio akkwarthuk imma oMiccie ipa Ili

wonekkethe lon len cik. ²⁷ Kwi'rikettat noppa
toKapik mpu'ran poKanang koKapik. Ca'ri ica
oMeriom ana oUccip thonat ukul oIeccuo noppa
toKapik akwothokkattanthet lon lothathuma
ammakka laik iatham wothonce'ret lon cik.

²⁸ OCamaan ponekathet oIeccuo nokapen ana
kwopirakanthet Kapik noka akwi'rekat itti,

²⁹ "Ili, ngkwo'rumot nolon lang ila ngkwokat
ponekketheik

ana inenni kirrnni piak pang apio appopirat
noka.

³⁰ Akka mpimmat ngkit kin pul ipa ngkwap-
ponekketheik itti patho'ret ul,

³¹ ipa ngkwappokuccethe cik tokit koul ap-
pik.

³² Kwaka k'ran ikacciene ul cik iannoka woIouth
ana kwaka thrik thoul wang woIccereil."

³³ OIuccip ana oMeriom thoprttakatherit
nolon ilerettathe ukul. ³⁴ Ittina aCamaan
pethiekathekin akwi'rekat oMeriom itti, "Ukul
enni wakorronno ul woppot noththok poIccereil
i'rarok akitto ana woppot iongothe lon lung
a'rungkot cik. Walon ilothislathe nnoKapik ana
ul woppot w'ra lon lung. ³⁵ Othakka itti alon
inako nan ilamu'ruttakot ncik nomikit moppot
ana thiak thethung cikit icarak ere ki'rittang."

³⁶ Pul p'rek pokat cik pothernte lon loKapik
Anna pul ipopari ukul woPanuil ponopothok
pAccir. Kwokat cik pukkwat, kwikkot cik akin
olle luput le're'rapuruk akka okin thittettot
³⁷ anaruk olle piathe akwokwentakat curuma
mono aluput othakkakat arrial woco'rin ana
ikken koco'rin (84). Kwannokorronno noppa

toKapik aththik anaruk kwokat cik akwa'ra'ra nga'rama ngko'ra ana icingki, oco'ro nothu'rit ana a'ra nga'rama. ³⁸ Ca'ri cen kwakkakanthet kin tokit ken akwekat Kapik thopira noka akwerekant het ul lon lokkul appik iokat cik akin o'rikot itti pul ipatho'ret ul wonoka'ran koUrucelim.

³⁹ Anakka oMeriom ana oUccip thokkothe lon appik ilonu itti lakkattat ammakka lon lothonce'ret lon cik lolli, okin thopakkathe noththok poCelil noka'ran ken koNaccir. ⁴⁰ Ana ukul wocokkakathe athakkakat wonthomat. Wokat winaik nti ica ana thoporot thoKapik thokat nan.

Ukul oIeccuo waik noppa toKapik

⁴¹ Lokat cik itti amma thuput thaat ithie oththan ana onnan thaeo noka'ran koUrucelim akin thokkot kamuthe koThaurrot kaman k'rek cik. ⁴² Anakka kwokkothe luput attul ana ikken ke'ra (12) akin oingkanthet kamuthe ammakka lokat cik. ⁴³ Anakka kamuthe komttathe okin thurokathe akin opakot tuan noka'ran koNaccir anaruk ukul wothehtakathe nan thocoken noka'ran koUrucelim ana okin thommat nan.

⁴⁴ Akin opri itti kwaik iul iakin thaik nokurtti, okin thoingkathe okkwot ca'ri culukku. Itina akin ikkat cik akin okwancothok noku'ri ken ana napurukon. ⁴⁵ Anakka okin thanniothok okin thopakkathe ciki noka'ran koUrucelim akin othokwancothok. ⁴⁶ Anakka ma'ri mothakkat m'rapuruk akin okwancothok akin othiathok noppa toKapik akwikkoik itho'rkit thoul iangkene akwocikot kin ana ipitto kin lon. ⁴⁷ Okkwion ithocikothok thokat cik akin

oprttakot tit nothinaik thung ana nothothilet tit tholon lung. ⁴⁸ Anakka oththan akin onnan thimmarok okin thoprttakatherit. Annan i'rekathok itti, "Ukul win, ngkwokkinthet nin ittina akaintha? inthokat cik inokwancothung inoththe amikit mellat ikarak."

⁴⁹ Aukul ipittat itti, "Ngintha akka anthokat cik annokwancinthin? Nthomma itti mponu itti mpaka toppan tongappai?" ⁵⁰ Akin ommakat ila kwonu itti kwi'ret kin.

⁵¹ Ittina okin thoingkathe noka'ran koNaccir ana kwocikathe lon len. Anaruk onnan pangwathe lon len appik nocikit cung. ⁵² Ittina oIeccuo pocokkakathe, athinaik thung nti ica arttakot nan ana Kapik kongakathok ana ul cakuruk wongakathok.

3

Thongkene thoIuanna ngomamuthie

(Maththa 3.1-12; Markkoc 1.1-8; Iuanna 1.19-28)

¹ Ana noluput attul ana ikken ukuluk (15) longili woili irik oThiperioc poKkaiccer wonoththok poRoma ana a'ran appik. Ana ca'ri cen oPilaththoc oPunththioc pokat ili wonoththok poIouthia, ana oIruuthuc oka ili cakuruk wonoththok poCelil. Ana oPilippic opang poIruuthuc pokat ili wonoththok poIththoria ana poThthirikinoothhoc, ana oLiaccanoc oka ili iotte wonoththok poIpilina.

² Ana Anan ana oKiappa oka ul ittittik wonoppan toKapik ca'ri cen alon loKapik akkanthet oIuanna ukul woCekkeria akwokat

cik ithampang. ³ Kwoingkathe na'ran iccik korue toÜrühün appik akwerene ul lon lomamuthie akwi'ret kin itti, “Nopa'rine lon ilokithak cik annocco mamuthie ana Kapik kaccikinthet non lon lon ilokithak.” ⁴ Ammakka lokurrakot iatham wolon loIccaia pul pothernte lon loKapik itti,

“Po're popul paik pakkakkaro nti ithampang itti,
 ‘Nokuccenthet Ili kathar
 noce'renthok athar cik.

⁵ Lupu'ru lonu itti la'runtettat
 ana mo'rong arppippithietta ana cik ica
 thorokkokk ope'riccakot cik

Athar iompa'rot cik wance'riettat cik
 ana athar ionu mu'rol tit wapekietta.

⁶ Ana tho'ret thoKapik thaul ionyi imma appik.’ ”

⁷ Aluanna i'rekat cungkut coul iaat itti wathocco mamuthie nti ikkun wung itti, “Nyukul nyoinyil enyrik, oththa akki'rethenon itti onon thallot thua ka thoKapik ithanthan? ⁸ Nokkot ngre iakene itti onon thopa'rinet lon ilokithak cik. Nokorronno omet kakon itti, ‘Onin nyukul nyAprein.’ Mpi'ret non itti Kapik kina oprtto mothok emmi cik amokakat nyukul nyAprein.

⁹ Nantocckot, pul ipathio ponekkethe kinyit kocemeke nolaka lokira. Ana pira ipakorronno okwono nyukul nyoporot, pakeccat cik aporret-takat ic'rot.”

¹⁰ Acungkut coul ipittat itti, “Ana ngimpen akka onin okkot?”

¹¹ AIuanna othiat tit itti, “Okkwi iponu eret we'ra akwethet okkwi ipellaik, ana okkwi iponu thu'rit kwonu itti kwakkot menik cakuruk.”

¹² Aul ia'rntinthe nili akucci akkakat acakuruk itti wathocco mamuthie. Akin ipittat itti, “Pul ipangkene, ngintha akka inokkot?”

¹³ Akwi'rekat kin itti, “Nokorronno a'rntot akucci woppot nopangken ianthonu itti nthar'nttot.”

¹⁴ Ittina ul w'rek irro ipittathok itti, “Ana onin thakkot ngimpen?”

Akwothiat tit, “Nokorronno oththikot ul akucci ana okorronno ereket ul ngkarra. No'rikot akucci won tulluk iakin ethet non.”

¹⁵ Ul wokat cik a'rikot oMiccie itti kwanthan ana okin thokat akin oprttakot tit akin opri ikkre oIuanna akkaka oMiccie. ¹⁶ AIuanna i'rekat kin appik itti, “Mpethet non mamuthie ngng'ri, anaruk okkwi iponu pu'ran kannan nnaun panthan, mpakanneko nan manna itti mpak'ro lo'rak lowok wung. Kwethet non mamuthie ngKandang ikupupure ana nthik thothakkma.

¹⁷ Ana akwokkwo ton nnomil akwi'rekat akwollakat liccit akwummo imoporot akunot ittit ana ton akwok're nthik ithakinnio aththik.”

¹⁸ Ana oIuanna perekanthet ul lon loKapik loppot akwa'retto nakin itti okin thaprtto lon len cik.

¹⁹ Anaruk akka oIuanna pa'rettot naIruthuc ili wonoththok poCelil akka kwipot oIruthia pari popang ana nolon l'rek loppot ilokithak ila kwokkothe ²⁰ ana oIruthuc papparrttat nolon ilokithak akka kwonekkethe oIuanna ikorrkkor.

*Mamuthie moIeccuo
(Maththa 3.13-17; Markkoc 1.9-11)*

21 Anakka ul wocceret mamuthie appik oIec-
 cuo poccathe mamuthie cakuruk. Anakka
 kwokat cik akwa'ra nga'rama arothi'rot anyat.
 22 AKanang ikupupure uat ntan naak kungkot
 cülökkür. Apo're akkakat ntoKapik api're itti,
 "Oung ukul win ia mpongothe ana mpopiranet
 noka."

Thiki thoIeccuo
(Maththa 1.1-17)

23 OIeccuo ponat luput arrial ana attul (30)
 akka kwoku'ret ngre ngung ncik tokit koul appik.
 Ittina ul wokat ame itti oIeccuo ukul woIuccip.
 OIuccip ukul wEli,

24 Eli ukul woMaththathath,
 oMaththathath ukul woLai,
 oLai ukul woMelekki,
 oMelekki ukul woIna,
 oIna ukul woIuccip,

25 oIuccip ukul woMaththathia,
 oMaththathia ukul wAmoc,
 Amoc ukul woNaum,
 oNaum ukul wAcceli,
 Acceli ukul woNacai,

26 oNacai ukul woMath,
 oMath ukul woMaththathia,
 oMaththathia ukul woCcamai,
 oCcamai ukul woCoccec,
 oCoccec ukul woIotha,

27 oIoutha ukul woConan,
 oConan ukul woRecca,
 oRecca ukul woCerupapil,
 oCerupapil ukul woCcaliththil,
 oCcaliththil ukul woNiri,

28 oNiri ukul woMelekki,

oMelekki ukul wAthi,
Athi ukul woKkuccum,
oKkuccum ukul wAlmotham,
Almotham ukul woİr,
²⁹ oİr ukul woCeccua,
oCeccua ukul wEliacir,
oEliacir ukul woIorim,
oIorim ukul woMaththathath,
oMaththathath ukul woLau,
³⁰ oLau ukul woCcomoun,
oCcomoun ukul woIoutha,
oIoutha ukul woIuccip,
oIuccip ukul woConam,
oConam ukul wAliakkim,
³¹ Aliakkim ukul woMalia,
oMalia ukul woMinan,
oMinan ukul woMaththatha,
oMaththatha ukul woNathan,
oNathan ukul woThauth,
³² oThauth ukul woIecce,
oIecce ukul woOpet,
Opet ukul woPuac,
oPuac ukul woCalmon,
oCalmon ukul woNaccun,
³³ oNaccun ukul wAminathap,
Aminathap ukul woRam,
oRam ukul wAccrun,
Accrun ukul woPparic,
oPparic ukul woIoutha,
³⁴ oIoutha ukul woIakup,
oIakup ukul woIccaak,
oIccaak ukul wAprein,
Aprein ukul woThthera,
oThthera ukul woNaur,

³⁵ oNaur ukul woCcoroc,
 oCcoroc ukul woRau,
 oRau ukul woPalec,
 oPalec ukul wApir,
 Apir ukul woCcela,
³⁶ oCcela ukul woKinan,
 oKinan ukul wArppakaccath,
 Arppakaccath ukul woCcam,
 oCcam ukul woNua,
 oNua ukul woLamak,
³⁷ oLamak ukul woMiththuccila,
 oMiththuccila ukul wAnuk,
 Anuk ukul woCarit,
 oCarit ukul woMalalel,
 oMalalel ukul woKkinan,
³⁸ oKkinan ukul wAnuc,
 Anuc ukul woCceth,
 oCceth ukul wAtham,
 Atham ukul woKapik.

4

Thennekketta thoIeccuo *(Maththa 4.1-11; Markkoc 1.12-13)*

¹ OIeccuo ponat Kanang koKapik noka akka kwokkaprttakot nnorue irapangka toÜrÜthün ana Kanang ikupupure kipathok ithampang ithonthomat ² na pul pothopulut pennekkethok than ma'ri arrial we'ra (40). OIeccuo papponat ma'ri arrial we'ra (40) akkwoco'rot nothu'rit icingki ana ngko'ra ana akka kwocothothe ma'ri mothoco'ro nothu'rit, kwokakathe piamat.

³ Apul pothopulut i'rekathok itti, "Amma oung ukul woKapik, i'rethe pothok empi apothakka arrakith."

⁴ Aieccuo othiat tit itti, “Lokurrakot itti, ‘Pul iponyi pannikkoik narrakith tulluk.’”

⁵ Apul pothopulut apponekathok no'ra woco'rong ana accokkot apokenekathok ngili ncik appik ngonocapu. ⁶ Api'rekathok itti, “Mpethung ngili engi appik ana thrik then akka ngettathin ana mpethet pul ipa mpongothe itti mpethet ⁷ ana amma ngkwa'ranin nga'rama ngili ngathakka ngang appik.”

⁸ Aieccuo othianthok tit itti, “Lokurrakot itti, ‘A'ranet Ili, Kapik kang nga'rama arekanthok pellek.’”

⁹ Pul pothupulut ponekathok noka'ran koUrucelim ana no'ra wonoppan toKapik, apul pothopulut i'rekathok itti, “Amma oung ukul woKapik orre ka kang nci cene. ¹⁰ Akka lokurrakot itti, ‘Kapik kathiot u'rupa wothonlettat wung angwothung papenang.

¹¹ Ana waccinthusung nyaun cik akka tacok okkwo mpothok.’”

¹² Aieccuo othianthok tit itti, “Li'rettat itti, ‘Kirrnni enekke Ili, Kapik kang.’”

¹³ Anakka pul pothopulut pomarttot thennekke thung pothekathe naleccuo itti kwappiothok ca'ri c'rek.

Oieccuo purokie ngre ngung ncik noththok poCelil

(Maththa 4.12-17; Markkoc 1.14-15)

¹⁴ Oieccuo popakkathe noththok poCelil mpu'ran poKanjang ikupupure ana lon lung

lopettakatheik appik itti kwaan noththok.
 15 Kwongkenekathe nomuththun ma'rama ana
 ul appik womerekekathok.

*OIeccuo paul w'rat noka'ran koNaccir
 (Maththa 13.53–58; Markkoc 6.1–6)*

16 Kwoingkathe noka'ran koNaccir na
 kupokkothe ana noca'ri caCcepith kwi'rikathe
 nocuththun ca'rama ammakka kwokat
 akwokkettet. Ana kurokathe kapik
 akwakkakkaro lon nti iatham. 17 Akin ekathok
 atham wopul pothernte lon loKapik oIccaia.
 Akwanyat akwiat ka'ran ikokurrakot nan itti,

18 “Kanang kolli kaik naun,
 akka kakkarorin anerene ul lon iloporot iella
 alp'rek.

Kwothiothin anotherene ul iaik ikorrokkor lon
 lothelikkako
 ana anyinthe ul kit i'rimathe
 ana o'ret ul iokwiettathe.

19 Ana Kapik kothiothin anathi're itti thuput
 thung thaata itha kwo'ret ul wung nan.”

20 Ittina akunukkwat atham, akwopakkekkan-
 thet pul ipethok akwikkat cik akwerenekin lon
 loKapik. Aul appik iokat cik nocuththun ca'rama
 oce'rekat kit naak. 21 Akwi'rekat kin itti, “Lon
 latham enni inenni lothakkat icat ammakka
 nthoccikothe.”

22 Aul ikkat cik aerethok lon loporot appik
 ana okin thoprttakathe tit nnolon iloporot ilaat
 nti ithon thung akin ikkat cik akin ipitto itti,
 “Okoronno oka ukul woIuccip enni?”

²³ Aieccuo i'rekat kin itti, "Mpina icat itti onon thi'rethin lon elli itti, 'Pul ipittiet ul, ittiethe ka kang cittokit, okkothe lon cene noka'ran kang ilanin thockikothe itti ngkwokkothe noka'ran koKaprnaum.'" ²⁴ Akwo'rungkat nolon akwere akwi'rekat itti, "Mpi'ret non lon ilaik icat itti pul pothernte lon loKapik pannoka pongakothe noka'ran kung. ²⁵ Mpapakkentheth non tit itti muruma mokat cik moppot noththok poIccereil noca'ri copul pothernte lon loKapik ollia ana noluput il'rapuruk ana app'rut ti to'ratheik noththok. ²⁶ Icci ollia pappannothilantheth pul p'rek nti akin anaruk Kapik kothiothok nocuruma icokat noka'ran ikocot k'ran itti Carepath noththok poCcithon. ²⁷ Ana ul wokat cik woppot ionat inyi noka noca'ri copul pothernte lon loKapik, icci pul pellat nti iakin ipothikkiettatt poporot oNaman ponoththok poCcuria tulluk."

²⁸ Anakka ul appik wockikothe lon ila oIeccuo peret iokat nocuththun ca'rama wuakathe ka. ²⁹ Okin thurokathe akin othiathok thapat nti icarak coman akin onekathok no'ra woco'rong ica ul wokat wunot kaman othakka itti akwothorrettatt nocapu ntan. ³⁰ Anaruk kwokkathe icungkut coul akwoingkat.

Pul iponu u'rupa iokithak
(Markkoc 1.21-28)

³¹ Ittina kuathe thaiken noka'ran koKaprnaum noththok poCelil ana ca'ri cokat caCcepith ana kwikkatheik akwongkene ul. ³² Okin thoprttakantheth thongkene thung tit akka lon lung lonat lon longili tit. ³³ Nocuththun ca'rama

cen pul p'rek pokat cik pau'rupa iokithak wo'rot nan akwekat kuri cittan, au'rupa iokithak i'rekat nti iaak itti, ³⁴ “Ee Ieccuo poNaccir, ngintha akka ngkwongotho nanin? Ngkwaththope'riccot nin ciki? Mpina itti oung okkwen, oung ipupupure ipa Kapik kothiothe.”

³⁵ Aieccuo othirriekathok cik itti, “Angkik opothe thapat nti iaak.” Ittina au'rupa iokithak orrekat pul nocapu tokit ken appik appat thapat nti iaak okorronno ipiek ka kongo.

³⁶ Ul appik woprttakatherit ana akin erettarne itti, “Thongkene thointha enthi? Ngili ana pu'ran, kwi'ret u'rupa iokithak lon ana waccikothok ana woppathe thapat.” ³⁷ Ana lon lung lopettakathe cik na'ran appik noka'ran ken.

Oieccuo pittiet ul woppot

(Maththa 8.14–17; Markkoc 1.29–34)

³⁸ Oieccuo poththekathe nocuththun ca'rama ana kwoingkathe thoCcamaangon. Opithe poC-camaan ipopari pokat pongo akwango ippa ana okin thipittathe oieccuo itti kwittarothok.

³⁹ Ittina aieccuo ikkat cik iccik kung akwothirriekat lü cik nti iaak alopa'rat cik. Kurokathe accokkot akwikkat cik akwokkinthet kin thu'rit.

⁴⁰ Anakka cingki cokat cik acorungko, ul wonakanthet oieccuo ul iongo mmio kurekkurek ana kwonnekkekathe nyaun nakin appik akwa'rakanthet kin nga'rama ana okin thittakathe. ⁴¹ U'rupa iokithak woppot woppopporekathe thapat nti iul mmpo're cittan ai're itti, “Oung ukul woKapik.” Anaruk

oIeccuo pothirriekathekin cik ana kwakorronno okorronnat kin itti okin there akka okin thinarok itti ook oMiccie.

⁴² Ana akka cik cokattot, oIeccuo poingkathe noka'ran pellek. Ul wokatk cik akwancothok anakka waat na kwokat okin thikkatheik akin o'ramittothok cik itti kwannoththe nakin.

⁴³ Anaruk oIeccuo pi'rekathekin itti, "Mponu itti mpere lon iloporot longili ngoKapik na'ran w'rek acakuruk, akka ilen akka mpothilanthet."

⁴⁴ Ana kwikkatheik nocuththun ca'rama noththok po'louthia akwere lon loKapik.

5

*OIeccuo pakkaro ul woci nomun iammakothok
(Maththa 4.18-22; Markkoc 1.16-20)*

¹ Ca'ri c'rek cokat cik aleccuo pokat cik akwoco'ro iccik korok irapangka toCeniccarth aul o'rntüttothok accikot lon loKapik

² Kwimmakathe uppu'rung wonoi'ri we'ra nokuthuthu korok irapangka aul iangwo ape woththet nan ana wokatk cik aime lo'rak ili'riththako nape. ³ Kwarrathe ikuppu'rung kulukku ikokat koCcamaan ana kwipittathok itti kwathothakkaret papotteik nokuthuthu korok irapangka ana kwikkatheik tit akwongkene ul.

⁴ Anakka kwomarttot lon kwi'rekathe oCcamaan itti, "Othakkarethe kuppu'rung konoi'ri ipnan porok arret lo'rok lape i'ri ai'riththa ape."

⁵ Accamaan othianthok tit itti, "Pul ipangkene, onin thorekot kannan nokk'rokk'ra ana onin thanni'riththa pap'rek. Anaruk mparret lo'rok laape i'ri ammakka ngkwi'ret." ⁶ Anakka okin thorrethe lo'rok i'ri ammakka kwi'retheikin okin

thi'riththakathe ape woppot alo'rok lape ikkat cik ere lammotta. ⁷ Ittina akin akkarat opaththon then th'rek ithokat ikuppu'rung k'rek itti okin thanthan akin athittarot kin, akin akkakat akin oppeppekat ape uppu'rung aure'ra aikkat cik ere wuo tho'ronthong.

⁸ Anakka oCamaan oPoththuruc pimmat menik akwirrat cik tokit koIeccuo akwi'rekat itti, "Opa'rik nti iccik kin, Ili, akka oun pul ipokithak."

⁹ Akka ook ana opilingon ithakin thokat ithun thoprttakatherit nothi'riththa thaape iakin thi'riththat. ¹⁰ Olakup ana oIuanna thokat nyukul nyoCepethi, okin thokat akin ongutte ape okin oCcaimon. Okin thoprttakatherit cakuruk.

AIeccuo i'rekat oCamaan itti, "Kirrnni ipo n're nciki inenni ngkwaka pul pothi'riththa ul." ¹¹ Ittina okin thothathe uppu'rung wonoi'ri nomarkan morok irapangka akin oththekat na'rupu appik akin omakathok.

*OIeccuo pittiethe pul ipocura ponu ñnyĩ noka
(Maththa 8.1-4; Markkoc 1.40-45)*

¹² Anakka oIeccuo pokat cik noka'ran k'rek koricararak coman, apul akkakat cinang ponat ñnyĩ noka. Akka pimmat oIeccuo apekat ungu ncik ana toca ncik apipittathok itti, "Ili, amma oung akkongothe ana ngkwittiethin."

¹³ AIeccuo othiekat ukun akwothanthok akwi'rekat itti, "Mpongothe itti mpittiethung, othakka poporot." Ittina aïnyĩ ittakanthok accokkot.

¹⁴ Ittina aIeccuo i'rekathok lon lonthomat itti, "Kirrnni i'ret pul p'rek lon elli anaruk ngko

athokene pul ponoppa toKapik ka kang akiat papu pothokiot nguccuk cik ammakka oMucca pi'ret akenekin itti ngkwothakkat poporot."

¹⁵ Ana lon loIeccuo lappaththakatheik cannan itti kwaik pittiet ul ana ul wakkakathe athocikot lon lung ana othakka thoporot nomio men. ¹⁶ Anaruk oIeccuo pikkatheik akwoththeththe noul akweo noka'ran pellek akwotha'ra nga'rama.

OIeccuo pittiet kimico
(*Maththa 9.1-8; Markkoc 2.1-12*)

¹⁷ Ca'ri cokat cik aIeccuo pokat akwongkene, aul woPriccin ana ul iangkene lon lothonce'ret lon cik akkakat na'ran appik wonoththok poCelil ana poIouthia ana noka'ran koUruccelim ana okin thokat cik akin ikkoik iccik kung cinang. Ana Ili wekathok pu'ran akwittiet ul iongo. ¹⁸ Ul w'rek iomura wakkakathe anneko pul ipakimico na'rangkal ana okin thennekkethe itti okin thi'rikok ngngin noppa akin onekkethok cik tokit koIeccuo. ¹⁹ Okin thakinniat kathar ikakin i'rikok ngngin noppa akka cungkut coul cokat coppot, okin thoku'rathe to'ra woman akin anyathe man nto'ra akin orpekat pul na'rangkal ia kwokat cik akwicat cik nan tokit koIeccuo icungkut coul. ²⁰ Akka oIeccuo pimmat thocokot tholon loKapik nomikit men kwi'rekethe kimico itti, "Puruko pin, lon lang ilokithak loccikakotho."

²¹ Aul woPriccin ana ul iangkene lon lothonce'ret lon cik ikkat cik aeret nomikit itti, "Oththa empi pacungko Kapik? Pul pella paccikinthe ul lon, Kapik kulluk."

²² OIeccuo pinakathe lon ilakin thokat cik akin okwarttikot akwipittat kin itti, “Nthontha akka annokwarttikot lon elli nomikit mon? ²³ Liatha akkoporot itti li'retta itti, ‘Lon ilokithak lang loccikakothē’ ana amma okkorronno oka menik mpi're itti, ‘Urokothe kapik aeoī’? ²⁴ Anaruk othakka itti annina itti ukul wopul iponyi wonu pu'ran nocapu itti waccikinthet ul lon ilokithak,” akwi'rekat pul ipakimico itti, “Mpi'rethung itti urokothe kapik aneko a'rangkal aeo tuan.”

²⁵ Akurokat accokkot akwoco'rat tokit ken, akwonekat a'rangkal ia kwokat cik akwicat cik nan akwoingkat taun akkwopiranet Kapik noka. ²⁶ Ul appik wikkatheik aprttakot tit iokat cik cinang akin opirakanthet Kapik noka. Okin thonat n're akin i'rekat itti, “Onin thimmat lon lommaththik inenni.”

OIeccuo pakkaro oLauī
(*Maththa 9.9-13; Markkoc 2.13-17*)

²⁷ Akka oIeccuo pothikkiet kimico koporot, kwoppathe thapat akwoingkat akwimmakat pul ipa'rntot akucci noul poccot k'ran itti oLauī akkwaik noka'ran koul ia'rntinthet nili akucci, aIeccuo i'rekathok itti, “Omakothin.” ²⁸ ALauī urokat kapik, akwoththekat na'rupu appik akwomakathok.

²⁹ Ittina oLauī pokkanthet oIeccuo thu'rit tuan thanung ana ul woppot ia'rntinthet nili akucci ana opilingon thokat cik akin o'rkoik okin aththut, ³⁰ Anaruk ul woPriccin ana ul iangkene lon lothonce'ret lon cik woPriccin wikkathe cik a'retto noul iammakot oIeccuo itti, “Ngintha

akka anno'rikineik nul ia'rntinthet nili akucci ana ul wolon ilokithak?"

³¹ OIeccuo pothianthet kin tit itti, "Annoka ul ioporot akkongothe itti wittiettat anaruk ul iongo. ³² Mpakannao anathakkaro ul ioporot anaruk mpainet ul wolon ilokithak aine Kapik."

OIeccuo pipittakot lon lothoco'ro nothu'rit

³³ Aul w'rek i'rekat oIeccuo itti, "Ul iammakot oIuanna waanco'ro nothu'rit ana a'ra nga'rama ana cakuruk ul iammakot lon loul woPriccin anaruk ul wang iammakothung waik wa'rkoik ana ikkoik."

³⁴ OIeccuo popakkenthet kin tit itti, "Onon thace'rene purukon thopul ipipo nothu'rit apul ipipo paik itho'rküt theni? ³⁵ Anaruk ca'ri canthan, noma'ri men amma pul ipipo ponekittat ntoküt kin, akin antoco'ro nothu'rit."

³⁶ AIeccuo i'rekat kin lon nthokkwie kuru ncik itti, "Pul pella pillo kret ikie apokkwo cüt nthan ngkret ikipe. Amma kwokkothe menik kwillo kret ikie akka kret ikie kannokattakot ngkret ikipe. ³⁷ Ana pul pella pipot thrupa ika'ruk ikipe. Amma kwipotherit ana thinya ana thillo ka'ruk ana kakittako. ³⁸ Thrupa thouu itti thittat ika'ruk ikie ikokkattathe nou'rat.* ³⁹ Ana pul pella ipikko ngapak ingipe ana ikko ang'rek ingie ana kwi'rekathe itti, 'Ngapak ingipe akkoporot nangie.' "

* **5:38** 5.38 Ul woIouth wakkot ngapak ia'ruk annoka ammakka Arru iakkot ngapak immuk.

6

Thipitto lon loca'ri caCcepith

(Maththa 12.1-8; Markkoc 2.23-28)

¹ Noca'ri c'rek cokat cik caCcepith aIec-cuo pokkot ikkwon imil ana ul iammakothok wikkatheik auot mil ana ocottot akin o'rko. ² Aul w'rek woPriccin ipittat itti, "Onon thontha akka annokkot lon ilonu itti lakannokkattat noca'ri caCcepith?"

³ OIeccuo popakkenthet kin tit itti, "Onon thakannakkakkaro lon nti iatham ila aThauth pappokkothe akka okin thokat thiamat nul wungi? ⁴ Kwi'rikot noppa toKapik akwummat arrakith iothun iettathe Kapik iokat itti ul wul-luk wonoppa toKapik akka'rko akwo'rkkat ana kwekathe ul wung cakuruk ana wo'rkkathe." ⁵ Menik aIeccuo i'rekat kin itti, "Ukul wopul iponyi akka Ili woca'ri caCcepith."

Pul ipai'rilla ukun

(Maththa 12.9-14; Markkoc 3.1-6)

⁶ Ana noca'ri c'rek caCcepith akwoingkat nocuththun ca'rama ana kwokat cik akwongkene ana pul pokat cik than ponat ukun wothothari wai'rilla. ⁷ Ul woPriccin ana ul iangkene lon lothonce'ret lon cik wokat cik akwancot lon ilakin orukwet oIeccuo ngngin, menik akin ikkat cik akin okathaccek kicce amma akwittiet pul noca'ri caCcepith. ⁸ Anaruk oIeccuo pinat lon len ilakin thonat nomikit men ana kwi'rekathe pul iponat ukun wai'rilla itti, "Urokothe kapik tokit koul." Ana kurokathe kapik akwoco'rat.

⁹ Ittina aleccuo i'rekat kin itti, "Mpipittot non lon, liatha akkoco'rotheik itti lakkattat noca'ri caCcepith, itti okkot iloporori? Ana amma okorronno okkot iloporot ana ilokithaki? Okkie pul ciki ana amma okorronno okkie cik okkwori?"

¹⁰ Aleccuo okathakat kin appik akwi'rekat pul itti, "Othie ukun ntit." Apul okkat menik aukun othakkakat woporot kirrkir. ¹¹ Anaruk okin thaththuaka ana okin thikkatheik akin erettarane itti okin thakkot ngimpen naleccuo.

Oleccuo pakkarot ul wothothilettat attul ana ikken ke'ra

(Maththa 10.1-4; Markkoc 3.13-19)

¹² Ca'ri cen oleccuo poku'rathe toco'rong akwotha'ra nga'rama ana kwa'rakathe nga'rama nokk'rokk'ra. ¹³ Akka ngorrot ngothakkat, akwakkarat ul iammakothok ana kwipathe ul cik iattul ana ikken ke'ra, okin then itha kwothikkiet ul wothothilettat ¹⁴ ana 'ran wen itti, oCamaan (iponat k'ran itti oPoththuruc) ana opang Anthrauc, ana oIakup ana oIuanna, ana oPilippic ana oPerththolomauc ¹⁵ ana oMaththa ana oThthoma ana oIakup ukul wAlappaoc, ana oCamaan ipokat pongothe lon loththok pung, ¹⁶ ana oIoutha ukul woIakup, ana oIoutha Icikkariuththi ipokerathe oleccuo nili.

Oleccuo pangkene ana ittiet

(Maththa 4.23-25)

¹⁷ Kuate ntan nnoco'rong akin oul wung iammakothok akin oco'rat nothampang. Ul iammakothok wokat cik woppot ana ul cakuruk woppot iaat nnoththok poIouthia ana noka'ran

koUrucelim ana na'ran iaik iccik korok irapangka toCcur ana toCcithon, ¹⁸ okin ithaat itti okin thathoccikot lon lung ana ittiettat nomio men. Okkwion itha u'rupa iokithak wokkiethe thiak appik thittakathe. ¹⁹ Ana ul appik wanekkekathe itti wathntok akka pu'ran pokat cik apanthan nti iaak apittiet kin appik.

*Thopira noka ana thokithak ka
(Maththa 5.1-12)*

²⁰ Akwokathakat ul iammakothok akwi'rekat itti,

“Thethiëtta thaka thon onon ithella a'rupu cik akka ngili ngoKapik ngaka ngon.

²¹ Thethiëtta thaka thon onon ithiamat inenni akka onon thaththakat.

Thethiëtta thaka thon onon ithaik thoo inenni, akka onon thathocciro.

²² Thethiëtta thaka thon amma ul w'rat non ana 'ra non nti iccik ken ana ocungko non ana 'ra 'ran won nti ilon lokkul wopul iponyi.

²³ Nopira noka ca'ri cen ana iththrako akka thocco thon tholon iloporot thaka thrïk tothi'rot. Akka kathar ken ika aththangon thokkinthet ul wothernte lon loKapik lon ngngin.

²⁴ Anaruk angkre, ul ithatha'rathn akka onon thoccot lon lon p'rïn.

²⁵ Angkre, nanon ithoththakathe inenni, akka onon thathiama.

Angkre, nanon onon ithaik thacciro inenni, akka onon thathoccokot thiak ana oo.

²⁶ Angkre, nanon amma ul omereket non, akka oththangon thokat akin omereket ul wothernte lon loKapik ngkarra.”

*Ongathe ul i'rarung
(Maththa 5.38-48; 7.12)*

²⁷ “Anaruk mpi'ret non okkwion ithaccikothin, nongat ul i'rat non, nokkinthet ul i'rat non lon loporot. ²⁸ Nipittot Kapik akethie ul iat-tatta non, na'rane ul ng'rama iakkinthet non lon ilokithak. ²⁹ Amma pul p'rek pokkworong thounu, appoprstinok thounu th'rek ana amma opilin ponekothung kret ikiththia ikaku'rupakot, korronnok akwoneko kret konoka cakuruk. ³⁰ Ethet okkwi ipipittohung a'rupu ia kwongothie ana amma opilin ponekothung pap'rek pang akorronno okkaprtothok. ³¹ Nokkinthet ul lon ammakka onon thongothie itti wakkinthet non.

³² Amma ngkwongothie ul iongothung, thocco tholon iloporot thang thaka thiatha ithakanung cik? Akka manna ul ionu lon ilokithak wangat ul iongothekin. ³³ Ana amma ngkwokkinthet ul lon loporot iakkinthung lon iloporot lang liatha ilathokanung cik? Akka manna ul ionu lon ilokithak waik wakkot menik cakuruk. ³⁴ Ana amma ngkwethet pul p'rek a'rupu wokamucu mono a'rikothok itti kwakkenung kamucu kang kiatha iakanung cik naak? Akka manna ul ionu lon ilokithak wakkene ul a'rupu akin o'rikat cik itti okin thakketta appik. ³⁵ Anaruk ongathe ul i'rarung ana okkinthet kin lon loporot, ethet kin a'rupu akorronno o'rikot cik itti okin thakkartinung, ittina thocco tholon iloporot thon thaka thrik ana onon thaka nyukul nyoKapik ikaik cit-tothi'rot akka kwoporot lon noul iakannopiranok noka ana iokithak. ³⁶ Ona thiak ammakka Kapik oththe pon ponu thiak.”

Thakkma opilingon
(*Maththa 7.1-5*)

³⁷ “Amma ngkwakorronno ethet ul w'rek lon moloko ana ngkwakorronno ethettat lon moloko. Amma ngkwannakkma ul w'rek ana ngkwannakkmako. Noccikintheet ul lon ilokithak alon lon occikakot. ³⁸ Amma onon thethet ul a'rupu ana onon thethettat cakuruk. Akka amma ngkwethet a'rupu nuthuk ana ngkwiot woppot ntit cakuruk.”

³⁹ Aleccuo i'rekat lon elli okkwienekin kuru ncik itti, “Pul ipi'rimathe pathutho pul ipi'rimathe? Okin thakannapot ippu aththuththe'rai? ⁴⁰ Akka pul ipangkenetta pakannoka prik nakkwi ipangkenek. Anaruk okkwi ipongkenettat kicce paka ammakka pul ipongkenerok.

⁴¹ Ngkwontha akka accot kit nokwira ikaik icit copangakang akorronno occot kit nokwo'ren ikaik icit cang? ⁴² Taththa akka amet opangakang itti, ‘Pangkin, kirrnni anumminung kwira nti icit cang,’ angkwakinnimma kwo'ren icit cang? Oung ipongothe itti ngkwinnikot lon, ummi kwo'ren nti icit cang cittokit aimmaik kicce antummine opangakang kwira nti icit cang.”

Pira ana nyukul nyen
(*Maththa 7.17-20; 12.34-35*)

⁴³ “Pira pella ipoporot pakwono nyukul nyokithak ana pira pella ipokithak pakwono nyukul nyoporot. ⁴⁴ Kira kurekkurek kinako nyukul nyen inyakokwono. Ul wakinniththo ice nopira poli ana mo'riompong nopira pakek.

⁴⁵ Pul ipoporot pere lon iloporot nolon iloporot ilaik nocikit cung, pul ipokithak pere lon ilokithak nolon ilokithak ilaik nocikit cung. Akka thon there lon iloppathe nocikit.”

*Pul ipuno ipinaik nti ica ana ipommaik
(Maththa 7.24-27)*

⁴⁶ “Nthontha akka annakkaron itti, ‘Ili, Ili,’ anon okorronno okkot ila ani’ret non? ⁴⁷ Okkwi ipainin mono occikot lon lin ana akworeko nngin, mpakenenon itti lon len laka tat. ⁴⁸ Kwaka ere pul ipokat cik apuno man ana pipanthe millang cik nocik icoporot. Akka ngike ngaat ana ngokkwathe man ngka anaruk nganno’rintittat akka mokat muntat papenang. ⁴⁹ Anaruk okkwi ipaccikot lon lin ana akwokorronno oreko nngin, kwikkoik ere pul ipunot man mung nothampang nuthuk okorronno ipinthe millang cik nouttu, ana akka ngike ngaat angokkwat man ngka amapat thapo thokitheththak.”

7

Oleccuo pittiethe pul iparekine ili woul irro woRoma

(Maththa 8.5-13; Iuanna 4.43-54)

¹ Anakka oleccuo pocothothe lon elli aul occikot, kwi’rikathe noka’ran koKapprnaum. ² Ana kwaththiat pul iparekine ili woul arrial ukuluk irro woRoma ipa kwokat pongothe cannan appongo ana pikkoik ere pio. ³ Aili occikat lon loleccuo athianthok ul w’rek ittittik woul woIouth itti kwanthan akwathittienthok pul iparekinok. ⁴ Anakka ul wen woinet oleccuo akin erekanthok thiaththiak itti, “Pul empi pekkot

nan itti ngkwittienthet ukul. ⁵ Akka kwongothe ul wonnon woLouth ana manna kuninet ton cuththun ca'rama."

⁶ Ittina aIeccuo oingkat okin aththungon. Akka oIeccuo okko iccik koman moili, aili woul arrial ukuluk irro othiat opurukon okin othi'ret oIeccuo itti, "Ili, kirrnni okinya itti ngkwanthan akka mpakanneko nan itti ngkwi'riko noppa thanin. ⁷ Ilen akka mpokathat ka kin itti mpakanneko nan itti mpainung. Anaruk i're lon tulluk ana pul iparekinin pathakka poporot. ⁸ Oun cakuruk paik inyaun nyoili w'rek ana mponu ul waik inyaun nyin. Mpi'ret okkwempi itti, 'Ngko' ana kwaeo, ana okkwemp're itti, 'A'rik' ana kwao, ana mpi'ret pul iparekinin itti, 'Okkothe elli' ana kwakkot."

⁹ Akka oIeccuo pockithe elli akwoprttakat tit nolon loili akwolliatat ul iokat cik ammakothok akwi'rekat itti, "Mpi'ret non itti mpakanniot thocokot tholon loKapik nocikit thena ammakka thoili enni manna noththok poIccereil." ¹⁰ Ittina aul iokat cik wothilathe opakkat tuan okin othiat pul iparekine ili apothakkat poporot.

OIeccuo purokie ukul wocuruma

¹¹ Ittina papotteik aIeccuo oingkat icarak coman icocot k'ran itti Nain akin oul iammakothok ana cungkut coul woppot icomakothekin. ¹² Manakka okin okko ci tocürük coricarak coman, acungkut coul akkakat ngngeme ana mpul ipiot, ukul iokat iulukkuppu nannan ana onnan pokat curuma. ¹³ Akka Ili

oIeccuo pimmat pul ipopari pen, kwipathe thiak then kannan ana kwi'rekathok itti, "Kirrnni oo."

¹⁴ Ana kwoingkathe iccik kopul ipiot akwoth-ntat kuppu'rung ikonat kumi nan aul iokat cik anneko oco'rat. Aleccuo i'rekat kumi itti, "Mpi'rehung itti oung emprik ipoku'rit urokwothe kapik." ¹⁵ Apul ipappiot urokat kapik apikkat cik apere, aleccuo i'rekat pul ipopari itti, "Ipi ukul wang."

¹⁶ Akin irrat mikit nti ikarak appik akin opirakanthet Kapik noka akin i'rekat itti, "Pul poth-ernte lon loKapik iprik pummothe ncik itho'rkit thonnon inenni." Akin i'rekat itti, "Kapik kaat kaththittarot ul wung." ¹⁷ Lon elli loIeccuo lappaththakatheik noththok poIouthia appik ana na'ran appik.

*Oleccuo ana oIuanna pomamuthie
(Maththa 11.2-19)*

¹⁸ Ul woIuanna iammakothok werekanthet oIuanna lon len appik ana aIuanna pakkarathe ul iammakothok we'ra ¹⁹ ana kwothiathekin noIli akin othipittothok itti, "Oung oMiccie ipa oIuanna pi'ret itti kwaik panthani ana amma okorronno oka oung, onin tha'rikot opilin p'rek paik panthani?"

²⁰ Akka ul waat naIeccuo okin thi'rekathe itti, "OIuanna pomamuthie pothiothenin itti onin thipittohung itti, 'Oung oMiccie ipanin thiak tha'rikori ana amma okorronno oka oung, onin tha'rikot opilin p'reki?' "

²¹ Ca'ri cen oleccuo pappittiethe ul iongat mmio ana okicce u'rupa iokithak noul ana immiek ul cik woppot iokat cik wi'rimathe.

²² Akwi'rekat ul ia oLuanna pappothiothe itti, "Ngkonon opakkot annothi'ret oLuanna lon ilanon thocckithe ana ilanon thimmat, ul i'rimathe wimmat cik ana iaimico waik wanyaro ana ionat inyï noka wittiettathe ana ul iokat nuril waik waccikot cik ana okin ithillet thurokiettat nti ithio ana lon iloporot loKapik lerettanet ul iella a'rupu w'rek. ²³ Thethieko thaka noul iakannopa'rine lon lin cik."

²⁴ Akka ul weot iammakot oLuanna, oIeccuo pikkatheik akwerene cungkut coul lon loLuanna akwi'rekat kin itti, "Kathakka onon thoinet oLuanna ithampang ithonthomara, ngintha akka onon thoinet itti onon thathimma? Pul iponyi ipaprto lon cik ere taco torithampang ithonthomat irukwit tukwit ira kanang kaik kau'rei?

²⁵ Onon theot thatthokatha ngintha? Pul pakot eret wopeththerei? Ana ul manna iako eret ialio ana iikkoik thikkoik thotha'rthan ana waka ikaman ikopeththere ana wikkoik na'ran woporot ana wonu a'rupu appik. ²⁶ Anaruk ngintha akka onon thoinet itti onon thathokatha? Pul pothernte lon loKapiki? Mpi'ret non itti ii anaruk pul empi prik nopul pothernte lon loKapik.

²⁷ Ook ipa atham werethe itti,

'Mpathiot pul pothothilettat pin tokit kang okkwi ipathokuccenthung kathar cik.'

²⁸ Pul pella ipokwontat nocapu cene appik iprik naLuanna anaruk okkwi ipotteik nti iul worothi'rot kwrik naLuanna."

²⁹ Ul iocckithe lon loLuanna appik ana ul anganna ia'rntinthe nili akucci okin akkokat

ithoccokathe lon loKapik ila Kapik kongothe itti lakkattat ana okin thoccot mamuthie nti ikkun woLuanna. ³⁰ Anaruk ul woPriccin ana ul iangkene lon lothonce'ret lon cik loul w'rat occikot Kapik ana lon lung ana okin thannocco mamuthie nti ikkun woLuanna.

³¹ OIeccuo pappiri'rekat itti, "Mpungkwie ul enni ngngintha? Okin thammakka ngintha?"

³² Okin thaik ere nyukul inyarran nyaik nyikkoik keccuk anyerene opangon mpo're cittan akin ome itti,

'Onin thaik thangwine non kinye koremekkin

ana onon thaik thakorronno ukko,

onin theet ngeme

ana onon thaik thakorronno oo.'

³³ Akka oLuanna pomamuthie paat akkwokat cik akwannortteik ana ikko ngapak, akin omekathok itti, 'Kwonu u'rupa iokithak.' ³⁴ Ana ukul wopul iponyi waat a'rko thu'rit ana ikko ngapak ana onon thi'ret itti, 'Kwonu kinyit kothu'rit ana kwongothe ngapak, ana ook opuruko poul ia'rntintheet nili akucci ana opuruko poul wolon ilokithak.' ³⁵ Anaruk ul appik iammakot wokenet itti thinaik nti ica thinako ngngre ngen."

OIeccuo pa'rutta ngaak noka'ran koPeththania

³⁶ Menik apul p'rek poul woPriccin akkarat oIeccuo tuan itti okin thatho'rko thu'rit, akwoingkat tuan topul poPriccin ana kwikkatheik othingkakot kriki kothokkun wothokure iccik kokuppu'rung kothu'rit. ³⁷ Ana noka'ran ken pul ipopari p'rek pokat cik than ipalle nul

nuthuk, kwokat pinat nan itti oIeccuo paik pa'rko thu'rit tuan topul poPriccin, ittina kwon-akathe ngaak ngamutha ncu'ru. ³⁸ Anakka pokat apoco'ro thoccul koIeccuo noracok tung akwoo angeme ngung oththapat noracok akwikkat cik akukukkwinthok ngeme noracok nuwan wung ana kwikkatheik akuntenthok ngaak ngamutha nan.

³⁹ Akka pul poPriccin ipakkarothe oIeccuo tuan pimmat pul ipopari akka apokkot, akwi'rekat noucce wung itti, "Amma pul empi pappokat pul pothernte lon loKapik icat painat itti pul ipopari empi pia ipaathntok ana pokithak polon ilokithak."

⁴⁰ AIeccuo opakkekanthok tit itti, "Camaan mponu lo'rek lani'rethung."

ACcamaan othianthok tit itti, "Pul ipangkene, i'rethin."

⁴¹ AIeccuo i'rekathok itti, "Pul p'rek pap-pethet ul we'ra akucci ngkamucu itti okin thathopakkenhok, opilin poccot arrial ukuluk ma'ri ukuluk (500) ana opilin arrial we'ra ana alkaire (50). ⁴² Aul aure'ra ommakat okkene pul iponat okucci nakin. Apul okkanthet kin ntit." AIeccuo ipittat itti, "Oththa nti akin akkangat pul ipokkinet kin nti akucci kannan ntiakin aththuththe'ra?"

⁴³ ACcamaan othiat tit itti, "Okkwi ipa kwokkinet ntit iponat woppot."

AIeccuo omekathok itti, "Ngkwothiotherit oce'ret cik papenang."

⁴⁴ AIeccuo okathakat pul ipopari akwi'rekat oCcamaan itti, "Ngkwimmat pul ipopariri?"

Mpaat tuan thanang. Ngkwannethin ng'ri ngoththeik anilakko ntacok anaruk pul ipopari empi pimethin tacok ngngeme ngorikit kung ana ukukkwothin tacok nuan wung.⁴⁵ Ngkwannommiccon papenang ammakka mpaat tuan thanang anaruk ammakka pul ipopari empi paat pannoco'ro nti ithokatha lon lin.⁴⁶ Anaruk oung ngkwanno'rokin manna ngaak ica anaruk kunothin ngaak ngamutha noracok.⁴⁷ Ilen akka ani'renthung itti lon ilokithak lung loppot loccikakinthok akka thongat thung thoppot kannan anaruk okkwi ipocikakinthet lon ilokithak lotte ponu thongat thotte.”

⁴⁸ Ittina aIeccuo i'rekat pul ipopari itti, “Ngko mpocikinthung lon ilokithak lang.”

⁴⁹ Aul ikkot cik nokuppu'rung kothu'rit wikkatheik aerekot nomikit men itti, “Oththa empi manna ipaccikinthet ul lon ilokithak?”

⁵⁰ Aieccuo i'rekat pul ipopari itti, “Thocokot lon loKapik nocikit thang akkopa'renung lon ilokithak lang cik ana ngkwaeo pupupure.”

8

Ul iari w'rek wammakot oIeccuo

¹ Anakka lon len lomttathe oIeccuo poingkathe onyaro nomo'rong ammakka maik akwongkene ul lon iloporot longili ngoKapik ana ul wung wothothilettat iattul ana ikken ke'ra wokat cik akin aththut. ² Ana cakuruk ul iari w'rek ia kwokiccet u'rupa iokithak nan ana ia kwitti-ethe nomio ammakka oMeriom iponat k'ran itti oMacthelia okkwi ipa oIeccuo pokiccet u'rupa

iokithak nan we're'rapuruk. ³ Ana oIona opari poKucci ook iponu lon ikkun loruan tolli oIruthuc, ana oCuccana ana opilingon th'rek thoppot. Ul iari enni wokat aittarot kin llon ilakin thongothe.

*Thokkwie lon kuru ncik thopul ipee
(Maththa 13.1-9; Markkoc 4.1-9)*

⁴ Anakka ul wokat cik a'rntakot mungkut mungkut na'ran woppot kurekkurek oIeccuo perekanthet kin lon nthokkwie lon kuru ncik. ⁵ "Pul pokkwon peot itti pathee, akka kwokat ak-wee mīl, am'rek apukkat ikathar aul ocukkarat cik au'rupe ocumat appik. ⁶ Am'rek apukkat nok'rimi akka mummothe ačingki ok'rekat akka ngun ngellat nan. ⁷ Amīl m'rek apukkat itho'rkit tholi akka mocokkat alī oki'rittat cik amillekat. ⁸ Ana icci am'rek mapukkathe nocapu icoporot. Mummathe amokwonat mīl mipiet kicce, kit ken arrial ukuluk (100)."

Akka kwi'ret elli, akwappi'rekat mpo're citan itti, "Okkwi iponu unu itti kwaccikot ak-woccikot."

Lon ila oIeccuo perenet nthokkwet lon kuru ncik

(Maththa 13.10-17; Markkoc 4.10-12)

⁹ Aul iammakothok ipittathok itti lon lothokkwie lon kuru ncik elli lonu itti ngintha? ¹⁰ AIeccuo i'rekat kin itti, "Onon thokenettat kumitta kongili ngoKapik anaruk ul w'rek wakenetta lon nthokkwie lon kuru ncik. 'Okin thakathacceik anaruk okin thakannimma, okin thaccikot anaruk okin thakannina.'"

*Thokkwie lon kuru thopul ipée thokenettat
(Maththa 13.18-23; Markkoc 4.13-20)*

¹¹ “Lon elli ilakene lon lothokkwietta kuru ncik lonu itti, cil lon loKapik. ¹² Mil imapukkothe ikathar mungkwot okkwion ithaccikot lon loKapik ana pul pothopulut panthan aponekat kin nomikit othakka itti akin okorronno occokot lon loKapik nomikit akin o'rettat. ¹³ Ana imapukkothe nok'rimi mungkwot ul ioccoke the lon loKapik nomikit nthopira noka anaruk akka lon lakannocokot cik nomikit, lon len lakinnikkoik puccuk. Okin thocokot lon nomikit papotte anaruk amma thokkiettat thiak thainet kin ana okin thapa'rine cik. ¹⁴ Mil imapukkothe ili mungkwot ul iocckithe lon loKapik ana akka akin ikkoik, thirro mikit nti ikarak tholon lothikkoik lonocapu ana tha'rthan ana thopira noka tha'rupu wonocapu thanomot kin cik akin okorronno upokkat ilon loKapik. ¹⁵ Anaruk mil imapukkothe nocapu icoporot mungkot okkwion ithaccikithe lon loKapik akin o'rumat nan nomikit appang akin okkat lon iakin iloporot ana lakwono pangken.”

*Thonekket thik ithacco no'ret
(Markkoc 4.21-25)*

¹⁶ “Pul pella paccie cu'ru cothik ithacco akwan-tokurupot cerok nan ana manna onekket thoceken copap'rek akwokorronno onekket no'ret othakka itti aul immaik i'riko noppa.

¹⁷ Akka lon ilamu'ruttakat linako nan ana ilocukkwakat nan littako ncik ana manna oka attattar. ¹⁸ Ittina nokkwo kunu ncik papenang. Okkwi ipaccikot lon lin, kwarttakinhet nan,

kwina arttot nan. Anaruk okkwi ipannocikot lon lin, ila kwina lotteik lanekittathok.”

Onnan poIeccuo ana opangon

(Maththa 12.46–50; Markkoc 3.31–35)

¹⁹ Onnan poIeccuo ana opangon thakkakanthok akin othokathak, anaruk okin thanniat kathar ikakin immak nngin akka cungkut coul cokat cik coppot. ²⁰ Apilin i'rekat oIeccuo itti, “Onne okin opangkangon thaik thapat thaik thakwariccathung.”

²¹ Aleccuo othiat tit itti, “Ongaia ana opangkion okin ul iaccikot lon loKapik akin okkat lon len.”

OIeccuo papiet kanang kokapik cik

(Maththa 8.23–27; Markkoc 4.35–41)

²² Ca'ri c'rek cokat cik aIeccuo i'rekat ul iammakothok itti, “Ntun arrot tomarakan m'rek morok irapangka.” Okin tharrathe ikuppu'rung ana okin thoingkathe. ²³ Akka okin eo ngkuppu'rung konoi'ri oIeccuo poingkathe inthe. Kanang kakkathe norok irapangka akokkuro akatta cik akuppu'rung konoi'ri ikkat cik ere kuo tho'ronthong ana okin thokakatheik ithiak ithokithak.

²⁴ Ul iammakothok woingkathe ana wurtathok ai'rekathok itti, “Pul ipangkene, pul ipangkene, oron thaik thathikikko ng'ri.”

Kurokathe kapik akwothirriekat kanang kokapik cik ana thopangka thoi'ri cik acik okkwat ka cik appik. ²⁵ Aleccuo ipittat ul iammakothok itti, “Thocokot lon loKapik nomikit mon thaik kartha?”

Aul wung iammakothok ikkat cik aipittararot lon nn're itti, "Oththa empi? Kwothirriethe kanang kokapik cik ana ng'ri ana lon lung loccikakathe."

*Oieccuo pittiet pul iponat u'rupa iokithak
(Maththa 8.28-34; Markkoc 5.1-20)*

²⁶ Ana okin thoingkathe akin arrat tok cik irapangka tonocik coCcethirin icaik arrot cik noththok poCelil. ²⁷ Manakka oIeccuo porpotheik nocarkan corok irapangka akwocurat ipul ponat u'rupa iokithak ipa pokat noka'ran koCcethirin. Pul pen ponu luput loppot apokat cik apikikkoik cunthut ana kwannikikkoik tuan anaruk kwokat cik akwikikkoik nonupu.

²⁸ Manakka kwimmat oIeccuo akwekat ngeme, akwapat iracok tung akwi'rekat mpo're cittan itti, "Ieccuo ukul woKapik korothi'rot, ngintha akka ngkwongothe naun? Occikothin korronno occokiethin thiak."

²⁹ Akka oIeccuo pokat pi'rethe u'rupa iokithak itti wappot thapat nti ipul. U'rupa iokithak wawokat cik apukko naak ana manna aul i'rikikkok tacok ana nyaun ana akwanguttat anaruk kwokat akwommotho nyol inya kwi'rikikkakot ngngin ana u'rupa iokithak wokat aittethok ithampang thapat.

³⁰ Aieccuo ipittat pul pen itti, "Ngkwocot k'ran itti oththa?"

Apothiat tit itti, "K'ran kin itti 'cungkut' akka onin thoppot." ³¹ Au'rupa iokithak ipittat oIeccuo lon thiaththiak itti kirrnni othiot kin thothirin.

³² Ana cungkut conuththuruk cokat cik cınang iccik koco'rong anu'ro. Ana u'rupa iokithak

wipittathe oIeccuo itti kwakorronno kin akin i'riko inuththuruk ana oIeccuo poccikanthet kin. ³³ Akka u'rupa iokithak woppothe thapat nti ipul, wi'rikikkathe inuththuruk ana nuththuruk noccorathe uo nokuthut korok anorttapat i'ri ana nikikkathe ng'ri.

³⁴ Cınang ul iokat cik au're nuththuruk wimmat akka nuththuruk nillet okin thollathe kiththik akin othi'rekat ul icarak coman ana iaik nomipit. ³⁵ Ana ul wakkakathe thapat athokatha lon len ilokat cik. Akka okin thaat iccik koIeccuo okin thatthiat pul ipapponat u'rupa iokithak noka aweot nti iaak ana kwokat akwikkoik iccik koIeccuo akkwakot eret ana akkwoporot ca ana okin thonat n're. ³⁶ Okkwion ithaththimmat lon len therekanthet ul lon tat akka oIeccuo pothikkiet pul iponu u'rupa iokithak poporot. ³⁷ Menik aul appik wonocik coCcethirin omekat oIeccuo itti kwapa'roik noththok pen akka n're no'rot nakin. Ittina aIeccuo arrat ikuppu'rung konoi'ri akwoingkat.

³⁸ Apul ipa u'rupa iokithak wokat wo'rot nan ummat akwipittat oIeccuo itti okin thaeo akin aththungon anaruk oIeccuo popakkekanthok tit itti, ³⁹ "Opakkothe tuan athi'ret ul appik lon ila Kapik kokkinthung." Ittina pul popakkathe ana paththerekanthet ul noka'ran engk're appik lon ila oIeccuo pokkinthok.

*Ukul iopari iot ana pul ipopari ipongo
(Maththa 9.18-26; Markkoc 5.21-43)*

⁴⁰ Manakka oIeccuo pokkaprattakot noka'ran koKapprnaum attang na kwapparrothe ngngin, ul wopirakanthok noka kannan akka okin thokat

cik akin o'rikothok. ⁴¹ Ittina apul p'rek poccot k'ran itti o'lairoc ipokat ili wonocuththun ca'rama akkakat apapat noracok toIeccuo akwipittathok nthiak itti kwanthan tuan thanung ⁴² akka ukul wung iopari iulukku wonat luput attul ana ikken ke'ra (12) wokat wongo ana wommaththik ere wio.

Akka oIeccuo pokat cik ikathar akweo ul wokkakathe woppot a'rntüttothok. ⁴³ Pul p'rek ipopari pokat cik angüccük opellele nti iaak luput attul ana ikken ke'ra (12), [kwikkethe ul ittiet ul akucci appik othakka itti aittiethok] ana pul pellat ipothikkierok poporot. ⁴⁴ Pul ipopari pakkakathe nthoccul koleccuo ana pothntathe thon thokret kung ana ngüccük ngoco'rathe nti iaak accokkot. ⁴⁵ AIeccuo ipittat itti, "Oththa akkothntorin?"

Akin ocukkwat nan appik aPoththuruc i'rekat itti, "Pul ipangkene, ul wunukwohung ana waik wanentekot cik iccik kang."

⁴⁶ Anaruk oIeccuo pi'rekathē itti, "Pul p'rek pothntorin akka mpina itti pu'ran peot nti iaun."

⁴⁷ Anakka pul ipopari pina itti pinakot nan pakkakathe apokkweka ana papathe iracok toIeccuo tokit koul appik ana perekanthet oIeccuo lon ila kwothntinok ana kwittakathe. ⁴⁸ Ittina aIeccuo i'rekathok itti, "Ukul win, thocokot tholon loKapik nocikit cang thittiethung. Ngko lon loporot."

⁴⁹ Anakka oIeccuo pokat cik akwere, apul p'rek akkakat ntuan toili wonocuththun ca'rama ioccot k'ran itti o'lairoc, appi'rekat itti, "Ukul wang wiot ana ngkwannommie pul ipangkene."

⁵⁰ Anakka oIeccuo poccikothe lon len akwi'rekat oIairoc itti, "Kirrnni opelle, occokothe lon loKapik nocikit ana ukul wang iopari wathakka woporot."

⁵¹ Anakka kwaan tuan toIairoc, kw'rakathe itti pul p'rek pi'riko noppa akin aththut anaruk oPoththuruc ana oIuanna ana oIakup ana othan ana onnan pokkul iiot tulluk. ⁵² Ul wokatao cannana aIeccuo i'rekat kin itti, "Nangkoik, kwakannio anaruk kwaik inthe."

⁵³ Okin thoccirathok ngngin akka okin thinat nan itti ukul wawiot. ⁵⁴ Anaruk oIeccuo poc-cokathe ukul ukun ana kwi'rekathē itti, "Ukul win, urokothe kapik." ⁵⁵ Ukul wokkathēik ana wurokathē kapik accokkot. Ittina oIeccuo pi'rekathēkin itti okin thethet a'rupu w'rek a'rko. ⁵⁶ Aththan akin onnan thoprttakathē tit anaruk kwi'rekathēkin lon lonthomat itti okin thanni'ret pul p'rek lon elli.

9

*OIeccuo pathiot ul wung iattul ana ikken ke'ra
(Maththa 10.5-15; Markkoc 6.7-13)*

¹ Anakka oIeccuo pakkarat ul wung ithun wothothilettat iattul ana ikken ke'ra, kwekathēkin ngili ingakin okicce u'rupa iokithak ngngin ana ittiet ul iongo ngngin. ² Ana kwothiathēkin akin othongkene lon longili ngoKapik ana ittiet ul iongo. ³ Kwi'rekathēkin itti, "Nokorronno oneko alp'rek aththik nokurtti kon, nokorronno oneko kurrong ana ka'ruk konokurtti ana thu'rit ana akucci ana eret we'ra. ⁴ Ana man imanon thi'rikot tit, nikkoik tit

puccuk annoththekat noka'ran ken. ⁵ Ana amma ul noka'ran ken wakinnikkienon cik, nokkwe tu'rupang cik nnoracok ton amma annoththe noka'ran ken aloka lon ilimmat lon ngkit itti okin th'rat lon lon.” ⁶ Ittina okin thurokathe akin oingkat na'ran akin ikkat cik akin ongekene lon iloporot loIeccuo ana ittiet ul iongo na'ran appik.

OIeccuo ana oIruthuc

(Maththa 14.1-12; Markkoc 6.14-29)

⁷ AIruthuc ili wonoththok poCelil occikat lon ilokat cik appik. Alon ocikittakanthok ca akka opilingon thokat cik akin ere itti oIuanna purokot nti ithio, ⁸ ana opilingon i're itti pul pothernte lon loKapik oIia pummothe ncik ana opilingon i're icci itti pul pothernte lon loKapik pothupuththuput purokot nti ithio cakuruk. ⁹ Anaruk oIruthuc pi'rekathe itti, “OIuanna pampokiothe ca cik ana okkwen p'rek empi ampappocikot lon len?” Ana kwokat cik akwok-wantot kathar ika akwimmak nggin.

OIeccuo po'rikiet ul athar ukuluk

(Maththa 14.13-21; Markkoc 6.30-44; Iuanna 6.1-14)

¹⁰ Anakka ul wung wothonthlettat wokkaprt-takot ntan okin therekanthet oIeccuo lon ilakin thokkothe. Menik kwipathekin ana okin thellek thoiingkathe noka'ran koPeththceitha ¹¹ anaruk ul wawinat nan ana womakathok. Kwikkiekathe ul cik akwikkat cik akwerenekin lon longili ngoKapik ana kwittiekathe ul iokat cik wongothe itti wittiettat.

¹² Anakka cipin cokat capot, ul wothothilettat wung wakkakanthok ai'rekathok itti, "Omethe ul apettakot cik, akin eo na'ran iccik konnon akin othokwancot thu'rit th'rek akin o'rko ana ka'ran nakin icat akka ka'ran engki kaik thomnther."

¹³ Aieccuo i'rekat kin itti, "Nethet kin ap'rek akin o'rko."

Akin othiat tit itti, "Onin thonu arrakith ukuluk tulluk ana ape we'ra. Ngkwongothe itti oron thathokerine ul enni appik thu'riri?" ¹⁴ Ul iomura iokat cik ceneket athar ukuluk (5,000).

Oieccuo pi'rekatho ul iammakothok iattul ana ikken ke'ra itti, "Nikkiekin cik nocapu mungkut mungkut ana icungkut culukku aul oka arrial we'ra ana alkaire (50)."

¹⁵ Aul iammakothok ikkiekat ul cik ammakka kwi'ret. ¹⁶ Oieccuo ponekatho arrakith ukuluk ana ape we'ra akwokathakat cik tothi'rot ana kwopirakanthet Kapik noka ana kwomithathe iarrakith ana kwekatho ul iammakothok aikket ul. Ana cakuruk kwummathe ape we'ra ana kwillillanthe kin tit appik. ¹⁷ Ul wo'rkkathe thu'rit aththakakat appik aul iammakothok a'rntat thu'rit ithokwentakot nan oppappat nyalünthung attul ana ikken ke'ra.

*O Poththuruc pi're itti oIeccuo ook oMiccie
(Maththa 16.13-19; Markkoc 8.27-29)*

¹⁸ Ana ca'ri c'rek aIeccuo pokat cik akwa'ra nga'rama akin oul iammakothok iattul ana ikken ke'ra akwipittat kin itti, "Ul waik wame itti oun oththa?"

¹⁹ Akin othiat tit itti, "Ul waik wame itti oung oIuanna pomamuthie apilingon thame itti ollia

ana apilingon ome itti pul pothernte lon loKapik poma'rot purokot nti ithio.”

²⁰ Aleccuo ipittat ul wothothilettat wung itti, “Ana onon there tat? Onon thame itti oun oththa?”

APoththuruc i'rekat itti, “Oung oMiccie pothilathe noKapik.”

Oleccuo perethe thocokot thiak thung ana thio

(Maththa 16.20–28; Markkoc 8.30–9.1)

²¹ Menik aleccuo i'rekat kin itti okin thakorronno i'ret pu'rek itti ook okkwen. ²² Akwi'rekat itti, “Ukul wopul iponyi wonu itti wakkiettat thiak kannan ana ul ittittik woul ana ul ittittik woul wonoppa toKapik ana ul iangkene lon lothonce'ret lon cik w'rak ana wonu itti wakkuttat ana wurokietta nti ithio noma'ri im'rapuruk.”

²³ Ana kwi'rekathekin appik itti, “Okkwi ipongothe itti kwamakot lon lin kwonu itti kure noka kung ana oneko thapak thung appinappin akwomakothin. ²⁴ Okkwi ipongothe itti kwa'ret thikkoik thung akure noka kung. Anaruk okkwi ipurethe thikkoik thung cik nti ilon lin kwa'ret.

²⁵ Ngintha akkoporot amma pul pothikkiet capu ncik appik cung ana kurethe calak cung cik?

²⁶ Okkwi ipella lon lin ana ella kit kolon lin, oun ukul wopul iponyi wella kit kolon lung ca'ri ica anthan nthrik thung ana nthrik thoththan ana thou'rupa wothothilettat woKapik. ²⁷ Mpi'ret non lon icat itti ul w'rek waik cene wannille aththik akin tharthuk imma ngili ngoKapik.”

Thoprttakoik thoIeccuo

(Maththa 17.1–8; Markkoc 9.2–8)

²⁸ Anakka ma'ri meot ncik mormor noca'ri ica kweret nan, kwipathe oPoththuruc ana oIuanna ana oIakup akwoku'rat kin ngngin to'ra woco'rong akin otha'ra ng'rama. ²⁹ Anakka kwokat cik akwa'ra nga'rama toca tung toprt-takatheik ana eret wung ollio ere thule'rak thokapik. ³⁰ Aul iomura we'ra oMucca ana ollia, ³¹ ummat ncik nthrik akin erene oIeccuo. Okin thokat cik akin eret kathar ika oIeccuo paik pathio ngngin noka'ran koUruc-celim. ³² OPoththuruc okin opurukon thokat inthe anaruk akka okin thurttat nti inthe akin immakat thrik thoIeccuo ana opilingon the'ra akin oco'ro akin aththut. ³³ Anakka ul we'ra iomura wokat cik aththe naIeccuo aPoththuruc i'rekat oIeccuo itti, "Pul ipangkene, loporot itti oron thikkoik cene. Tun uno mü'rük m'rapuruk culukku cang ana culukku coMucca ana culukku collia." Kwokat pommatt itti kwaik peret ngimpen.

³⁴ Anakka kwokat cik akwere, nuththe nakkakathe nakin ano'rumat kin ana okin thipathe n're akka okin thi'rikot inuththe. ³⁵ Apo're akkakat nti inuththe api're itti, "Ukul win enni ia mpakkarot itti wakkot ngre ngin ana nthaccikot lon lung."

³⁶ Akka po're peret akin immakat oIeccuo akkwaik pellek. Ca'ri cen ul iammakothok wangkatheik llon len aththung okin thakinni'rekat pul p'rek lon ilakin thimmat.

*Thittiet ukul ionu u'rupa iokithak noka
(Maththa 17.14-18; Markkoc 9.14-27)*

³⁷ Ana ngorrot ngen akka okin thuot ntan ntoco'rong acungkut coul ocurarat iaak. ³⁸ Apul p'rek ipocura akkarat nti itho'rikit thoul apakkaro oIeccuo mpo're itti, "Pul ipangkene, mpipittohung itti ngkwakathanin ukul win enni iulukku. ³⁹ Au'rupa iokithak wo'rot nan ana amma wo'rot naak walliethok ikapa ana wicethok tit puccuk akwapat nocapu arre ntit ana okkiethok thiak kicce ana woo mpo're cittan ana wu're pok nti ithon ana wannokorronnok ana waik wakittok. ⁴⁰ Ana mpipittothe ul iammakothung itti okin thakiccenenän anaruk okin thannokiccekat nan."

⁴¹ AIeccuo i'rekat itti, "Nantokatha, onon ul iakannocokot lon loKapik nomikit ana tholon ilokithak tulluk. Oron thikkoik aththut manna kartha?" Akwi'rekat pul itti, "Nakut ukul wang cene."

⁴² Anakka ukul wokat athakkarot iccik koIeccuo au'rupa iokithak i'rikat ikkul arrekat nocapu. AIeccuo othirriekat u'rupa iokithak cik aththekat nokkul akwekat oththan. ⁴³ Aul iokat cik cingang appik oprttakanthet lon len tit lopu'ran poKapik.

*OIeccuo paperet thio thung attang
(Maththa 17.22-23; Markkoc 9.30-32)*

Anakka okin thokat akin oprttakinthet lon len tit appik ila oIeccuo pokkothe kwi'rekathet ul iammakothok itti, ⁴⁴ "Nocikot lon papenang ila mpaik pi'ret non itti, ukul wopul iponyi waik wathokettat ul." ⁴⁵ Anaruk okin thanninakat lon len. Lokat lamu'ruttakothekin othakka itti akin okorronno ina ana okin thonat n're ipitto lon len.

Oththa akkaka prik
(Maththa 18.1-5; Markkoc 9.33-37)

⁴⁶ Aul iammakothok ikkat cik apllarot llon itti, oththa akkaka prik. ⁴⁷ Aieccuo inakat lon ilakin thonat nomik̄it men akwonekat ukul iotteik akwoce'rekat iccik kung. ⁴⁸ Akwi'rekat kin itti, "Okkwi ipikkiet ukul cik enni iotteik ngk'ran kin kwikkierin cik ana okkwi ipikkierin cik kwikkiet okkwi ipothiöthin cik. Akka okkwi ipotteik ianon appik ook akkr̄ik."

Okkwi ipakann'ra non ook pon
(Markkoc 9.38-40)

⁴⁹ Aluanna i'rekat itti, "Pul ipangkene, inthimmat aul w'rek okicce u'rupa iokithak ngk'ran kang ana on̄in thoce'rerok akka kwannoka uraththungon."

⁵⁰ Aieccuo i'rekat kin itti, "Nokorronno oce'rek akka pul ipann'ra lon lon, ook ponnon."

Ul w'rat oIeccuo nnoka'ran koCcamirin

⁵¹ Manakka ca'ri cakat acokko napuththut itti oIeccuo panekittat tothi'rot akwonekkekat lon cik itti kuroko eo noka'ran koUruccelim. ⁵² Ana kwothiathe ul wothothilettat tokit̄ kung noka'ran koCcamirin itti akin othokucenthok a'rupu cik. ⁵³ Anaruk ul wonoka'ran ken w'rakathe ikkiek cik akka kwokat cik akweo noka'ran koUruccelim. ⁵⁴ Anakka ul iammakothok ionat 'ran itti olakup ana oIuanna thimmat lon len akin ipittat oIeccuo itti, "Ili, loporot itti on̄in thipitto thik ntothi'rot athathok'rekini?" ⁵⁵ Anaruk oIeccuo polliakathekin akwothirriekat kin cik ⁵⁶ ana okin thoingkathe noka'ran k'rek.

*Thomakot oIeccuo thakannoka thippappat
(Maththa 8.19-22)*

⁵⁷ Anakka okin thokat cik akin onyaro ikathar apu'rek i'rekat oIeccuo itti, "Mpamakothing na aeo."

⁵⁸ AIeccuo othianthok tit itti, "Mipa monu kürük imu'rol ikakin ikkoik tit ana u'rupe wonu nune anaruk ukul wopul iponyi wella ka'ran na anekket ca."

⁵⁹ Akwi'rekat opilin p'rek itti, "Omakothin."

Anaruk pul pothianthok tit itti, "Ili, korronnon anothocikko opappa kappak."

⁶⁰ AIeccuo othianthok tit itti, "Kirrnni aul illet ocikko ul illet anaruk ngko atherene opilingon lon longili ngoKapik."

⁶¹ Ana icci apilin appi'rekat itti, "Ili, mpamakothing anaruk korronnon anopakkot anothi'ret ul woruan itti mpei paik paeo p'rin."

⁶² AIeccuo othianthok tit itti, "Pul ipongothe itti pamakothin ana apappopakkinthet lon lung ilipe, pannekko nan itti kwareko ingili ngoKapik, pikkoik ere pul ipara apolliakot thoceken aporakat tapak topa'rot cik."

10

OIeccuo pathiot ul arrial w'rapuruk ana alkaire ana ikken ke'ra

¹ Anakka lon elli locthakothe, alli oIeccuo ocumat ul arrial w'rapuruk ana alkaire ana ikken ke'ra (72) ana kwothilekathekin tokit kung the'ra the'ra ana na'ran appik ia kwokat cik akweo nan. ² Akwi'rekat kin itti, "Kopon kokwonot mil moppot anaruk ul iakio wotte.

Nipittot pul pokkwon apothiöt ul iakio ikkwon kung. ³ Ngkonon, mpaik pathiöt non ere lungkat laik itho'rküt thomipa. ⁴ Nokorronno oneko ka'ruk kakucci ana ka'ruk konokurtti ana wok ana okorronno omicco pul p'rek nokathar.

⁵ Amma anni'riko noppän topul p'rek, ni'ret ul wonoppän ten cittoküt itti, 'AKapik ethiet kaman engki cik.' ⁶ Amma pul pothomicco paik iul wonoppän ten, thomicco thon tha'ro naak, ana amma pul pothomicco pella, thomicco thon thapakinthet non. ⁷ Nikkoik iman men, anno'rko thu'rit ithakin ethet non akka pul ipareko ponu itti pacco a'rupu nti ire ngung. Nokorronno urttuko nti ikaman annoince iak'rek.

⁸ Amma onon akki'rikot noththok p'rek mono akin ikkienon cik, no'rko thu'rit ithakin thonekkethe toküt kon itti onon tha'rko. ⁹ Nittiet ul iongo iaik cänang, ni'ret kin itti, 'Ngili ngoKapik ngakko napuththut iccik kon.' ¹⁰ Anaruk amma onon thi'rikot noka'ran k'rek mono akin okorronno ikkienon cik, ngkonon ikathar konoka'ran ken anni're itti, ¹¹ 'Manna tu'rupang tonoththok pon irocciccothe nin, onin thakkwenthet non cik nnoracok ün. Anaruk nina nan itti ngili ngoKapik ngaik napuththut.' ¹² Anaruk mpi'ret non itti thakkmako thoka'ran koCothum thaka thopappat nothonce'ret lon cik ithaka noka'ran ik'rat ikkienon cik."

*A'ran iannocokot lon loKapik nomiküt
(Maththa 11.20-24)*

¹³ "Angkre, ul woKuruccin, angkre, ul woPeththeceitha, akka amma lon ilommaththik

ilokat lokkattathe ianon lokat lokkattathe noka'ran koCcur ana koCcithon, ul wona'ran wen waapa'rinet lon cik ilokithak akkoma'rot ana waakenet nthako eret iillillakot ana ipot mucuk ima. ¹⁴ Kapik kathipo thiak thoul wonoka'ran koCcur ana koCcithon noca'ri cothakkmako nanon. ¹⁵ Onon enthrik thonoka'ran koKapprnaum onon thame itti onon thanekittat tothi'rori? Aa, onon thaarrettat thothirin."

¹⁶ Kwappi'rekat ul immakothok itti, "Okkwi ipoccikotho lon lon kwoccikotho lon lin ana okkwi ip'rat lon lon kw'rat lon lin ana okkwi ip'rarin kw'rat okkwi ipothiöthin."

Thokkaprttako thoul arrial w'rapuruk ana alkaire ana ikken ke'ra

¹⁷ Anaruk akka ul wung iammakothok iarrial w'rapuruk ana alkaire ana ikken ke'ra wokkaprttakot awopirakat noka wi'rekathok itti, "Ili, u'rupa iokithak wokath cik manna accikot lon lin amma inere ngk'ran kang."

¹⁸ Aieccuo i'rekat kin itti, "Mpimmat pul pothopulut apapo ntothi'rot ere thule'rak ithalio. ¹⁹ Ana mpethet non pu'ran annokak'rot inyil cik ana ünü ana alkot pu'ran popul pothopulut. ²⁰ Anaruk nokorronno opira noka itti u'rupa iokithak waccikot lon lon anaruk nopira noka itti 'ran won wokurrakat tothi'rot."

Oieccuo popirat noka

(Maththa 11.25-27; 13.16-17)

²¹ Ca'ri cen aieccuo opirakat noka noKanang ikupupure, akwi'rekat itti, "Mpopiranung noka, ngappa pin, Ili worothi'rot ana wonocapu, akka

ngkwamu'ruttothe ul lon elli inaik nti ima ıla mpi'rethe ul win iammakothin, akene ul iammakka nyukul inyarran. İcat ngappa, elli akka ngkwongothe itti laka. ²² Ongappa pethin a'rupu appik. Pul pella pina ukul, oththan pokkul pulluk akkinak. Ana pul pella pina oththan, ukul wulluk akkinak ana okkwion itha ukul wongothe itti wakenekin oththan.”

²³ İttina akwolliakat ul iammakothok akwi'rekat kin akka okin thokat thellek itti, “Kit kethiëttat ikaik kakathacce lon ilanon thaik thakathacce. ²⁴ Nantocçikot ani'ret non, ul woppot wothernte lon loKapik ana nili nokat nongothe itti nimma lon ilonon thaik thakathacce ana nakinnimma ana occikot lon ilanon thaik thaccikot ana nthakorronno occikot.”

Lon iloporot lothokkwie lon kuru ncik lopul poCamirin

²⁵ Apul p'rek ipangkene lon lothonce'ret lon cik, urokat kapik akwipittat oİeccuo lon nge'ri itti akwi'riththak ngngin akwi'rekat itti, “Pul ipangkene, ngintha akka anokkot aniot thikkoik thothepuththuput?”

²⁶ Aİeccuo i'rekathok itti, “Liatha akkokurrakot iatham wolon lothonce'ret lon cik? Ana lon len lonu ittirat?”

²⁷ Apul i'rekat itti, “Li'rettat itti, ‘Ongathe İli Kapik kang ncikit cang appik ana ngka kang appik ana ngathe're ngang appik ana mpu'ran pang appik’ ana ‘Ongathe ul w'rek ammakka ngkwongothe ka kang.’”

²⁸ Aieccuo i'rekathok itti, "Ngkwothiotherit papenang. Okkothe elli ana ngkwikkoik thupuththuput."

²⁹ Anaruk pul pappongothe itti prrot noka kung akwi'rekat oIeccuo itti, "Ana okkwen akka-pul ponocuruk cin?"

³⁰ Aieccuo othiat tit nthokkwie lon kuru ncik itti, "Pu'rek pokat cik apao nnoka'ran koUruc-celim apeo noka'ran kAria ana pocurakathe iul wothu'ran. Ul wothu'ran wuekathok eret ana okkwekok akin oththekat naak akwomma ngka ere kwio. ³¹ Apul ponoppa toKapik akkakat apokkat ikathar ken, manakka pimmat pul empriik apokkat ciththan apoingkat. ³² Apul p'rek akkakat cakuruk ponoul woLau iareko noppa toKapik manakka paat noka'ran kopul pen, apokkat ciththan akwoingkat. ³³ Anaruk apul poul woCamirin pokat cik apeo nokurtti, apakkakat na pul pokat cik anakka pim-marok apipat thaik thung. ³⁴ Akwoingkat akwocukkwat cik iccik kung akunat ngapak inyi ana ngaak akwi'rikikkathok inyi kicce akwarriekathok te'ringka akwoing'kathok ngn-gin akwothonekkethok ikaman ika ul aallerit nakucci akwokathakat lon lung. ³⁵ Ana ngor-rot ngen akummat akucci we'ra akwekat pul pokaman akwi'rekathok itti, 'Okatha lon lopul empi akka mpaik paeo ana amma mpokkaprt-takot mpathokkenung akucci ia ngkwokittothe naak.' "

³⁶ Aieccuo ipittat pul ipangkene lon lothonce'ret lon cik itti, "Pul piatha nti iul

i'rapuruk ponocuruk copul ipapothē inyaun nyoul wothu'ran apopokat?"

³⁷ Apul ipangkene lon lothonce'ret lon cik othiat tit itti, "Pul ipipot thiak thung."

Aleccuo i'rekathok itti, "Ngko athokkot am-makka pul pen."

Oleccuo paththokatha naMarththa ana oMeriom

³⁸ Anakka oleccuo pokat cik ikathar akin oul iammakothok okin thakkakathe noka'ran na pul ipopari pokat ipoccot k'ran itti oMarththa apikkiekat kin cik tuan. ³⁹ Ponat opang p'rek ipopari poccot k'ran itti oMeriom ipikkot cik iccik koIeccuo akwocikot lon lung. ⁴⁰ Anaruk oMarththa pokat pi'rikothe akwokkot thu'rit ithokat thonu itti thakkattat. Kwakkakanthet oIeccuo akwi'rekathok itti, "Ili, ngkwannimma akka opangkin poththet naun pellek anokkot ngrei, lon len lannoka ere kwokwiethini? I'rethok akwathittarothin."

⁴¹ Aleccuo othianthok tit itti, "Marththa, Marththa, ngkwi'rikothe llon loppot ana ngkwonu kit nolon loppot. ⁴² Anaruk lon lulukku ilonu itti laccakot kit nan ana opangkang oMeriom poccoke the iloporot ntit, ana lakorronno onekittathok."

11

*Thongkene thoIeccuo tha'rama
(Maththa 6.9-15; 7.7-11)*

¹ Ca'ri c'rek aleccuo ikkat cik akwa'ra nga'rama noka'ran k'rek. Anakka kwomarttot tha'ra nga'rama apilin p'rek nti iul iammakothok

i'rekathok itti, “Ili, onkene nin tha'ra nga'rama ammakka oLuanna pongkenet ul iammakothok wung.”

² Aieccuo i'rekat kin itti, “Amma anna'ra nga'rama anni're ittina,
 'Ngappa pin, ak'ran kang othiakineik
 angili ngang anthan,
 [ila ngkwongothe itti lakkattat,
 alokkattat nocapu ammakka lokkattathe
 tothi'rot].

³ Ethet nin thu'rit ithekko nin nocingki enci.

⁴ Occikintheit nin lon lin ilokithak
 akka onin cakuruk thaccikantheit okkwion
 ithokkintheit nin lon ilokithak
 kirnni apiet nin ithenekketta.’ ”

⁵ Ittina aieccuo i'rekat kin itti, “Oththa akkonu opuruko nti ianon mono akwainok thampang thongk'ra akwi'rethok itti, 'Puruko pin, ethin arrakith w'rapuruk ⁶ akka opuruko pin p'rek painin nti ikurtti ana mpella alp'rek anethok akwo'rko.’

⁷ Ana apuruko pung ponoppan othiantthok tit nnoppan itti, 'Kirnni ommien cik. Mpunukkothe kathat p'r'in ana mpaik na'rangkal inonyukul nyin mpamma uroko anethung pap'rek.’ ⁸ Mpi'ret non itti, amma pul p'rat uroko akwethet pul thu'rit itti opuruko, kuroko akwethok akka kwommierok cik.

⁹ Ilen akka ani'renthet non itti no'rungkot nan ipitto ana lon len lettat non, nokwantot lon ana onon thiot, ana okkwi ipipitto thittarakot ana kwittarakot. ¹⁰ Akka okkwi ipipitto lon pettat ana okkwi ipakwantot piot ana okkwi ipipitto thittarakot ana kwittarakot.

11 Oththan poththa nti ianon amma opei pipit-tothok pape akwethok pinyil? 12 Ana manna amma kwipittot cin akwethok künü? 13 Amma onon manna ithonu lon ilokithak thina akka annethet nyukul nyon a'rupu ioporot, oththe pon porothi'rot pakannethet okkwion ithipittothok Kanang ikupupurei?"

Oleccuo ana Pelecepul

(Maththa 12.22-30; Markkoc 3.20-27)

14 Ana oleccuo pokat cik akwokicce u'rupa iokithak nnopul ipokat pommat ere. Manakka u'rupa iokithak wollot nti ipul pen aperekat aul irrat mikit nti ikarak. 15 Anaruk apilingon i'rekat itti, "Kwaik pakicce u'rupa iokithak ngk'ran koPelecepul ili wou'rupa iokithak." 16 Apilingon ennekkekathok nthipittothok lon ilommaththik.

17 Oleccuo pinat lon ilokat ima men ana kwi'rekathekin itti, "Ngili illillakot tit kurekkurek ngintat cik, ana amma ul woruan willillakot kurekkurek wakanno'rungkot cik.

18 Amma pul pothopulut poprttakothe ika kung, ngili ngung nga'rungkot cik taththa? Mpi'ret elli akka onon thaik thame itti mpaik pakicce u'rupa iokithak mpu'ran poPelecepul. 19 Ana amma mpakicce u'rupa iokithak mpu'ran poPelecepul, ul won iammakot non wakicce u'rupa iokithak mpu'ran poththa? Ittina okin thathakka ul iakkma non. 20 Anaruk amma oun akka akicce u'rupa iokithak mpu'ran poKapik ittina lakene itti ngili ngoKapik ngaik itho'rkit thon."

21 Aleccuo i'rekat itti, "Amma pul ipon-thomat mparran pakot u'rotto ana nyumurra

ana paik pangwot kaman kung, pul pella pamunye a'rupu wung. ²² Anaruk amma pul p'rek iponthoththomat pa'rumothok mono apalkothok paneko a'rupu wotho'rak wung appik ia kwapponekkethe cikit nan ana kwillillo ia'rupu ia kwonat okin opilingon."

²³ Aieccuo appi'rekat itti, "Okkwi ipanin thannoka aththut lakenen itti kw'rat lon lin ana okkwi ipakinnittarothin ire kwaik pakitto ngre ngin."

Thokkaprttako thou'rupa iokithak
(*Maththa 12.43-45*)

²⁴ "Amma u'rupa iokithak waat nti ipul, waeo nocik iconthomat akwantot ka'ran ika aikkoik nan. Anamma wanniot weret noucce wung itti, 'Mpapakkot iman ima mpoththet nan.' ²⁵ Ana amma wokkaprttakot wathiot man mollakot kicce ana mothettakotheik ²⁶ ana waeo ana wantan nu'rupa w'rek we're'rapuruk iokithak cannan naak akin i'riko ipul ana okin thikkoik than. Ana pul ipakin tho'rot nan paka pokitheththak kannan noca'ri conomun."

Thopira noka icaricat

²⁷ Anakka oieccuo pokat cik akwere, apul p'rek ipopari nti itho'rküt thoul i'rekat itti, "Athoporot oka nopul ipopari ipokwonorung ana akieng ngimmik."

²⁸ Aieccuo i'rekat itti, "Anaruk thopira noka thaka kannan nakkwion ithaik thaccikot lon loKapik ana oreko ngngin."

Thipitto tholon ilommaththik
(*Maththa 12.38-42; Markkoc 8.12*)

²⁹ Anakka ul wokat aunukwot oIeccuo kwi'rekathekin itti, "Ul enni wolon ilokithak wipitto lon ilommaththik anaruk lella ilettat kin, lulluk ilommaththik ilokkattanthet oIunan.

³⁰ Ana ammakka oIunan pul pothernte lon loKapik pokat lon ilommaththik loul woNinua, ittina ukul wopul iponyi waka lon ilommaththik loul iaik inenni. ³¹ Ili iopari wonoththok poCipa wurokot kapik noca'ri cothonce'ret lon cik okin oul iaik inenni ana kwathokenekin itti nthokkothe lon moloko. Akka kwaan nci nacapu ciththan akwathocikot lon lothinaik nti ica loili ioccot k'ran itti oCiliman. Ana inenni cene kwaik iprik nalli oCiliman.

³² Noca'ri cothonce'ret lon cik amma Kapik athonce'renthet ul lon cik nocapu, ul wonoka'ran koNinua wurokot kapik ana wace'renthet non lon cik itti lon lon lamoloko, akka okin thokkaprt-takot nti ithokkot lon ilokithak ca'ri ica oIunan pul pothernte lon loKapik perenet kin ana inenni cene kwaik iprik naIunan."

K'ran ikacco koka
(*Maththa 5.15; 6.22-23*)

³³ Aleccuo appi'rekat itti, "Pul pella paccie thik nocu'ru iconu ngaak iacco apantokurupot cerok nan ana manna onekket thoceken copap'rek. Anaruk kwwonu itti kwanekket cik attattar othakka itti amma okkwion ithanthant nthapat akin immaik. ³⁴ Cit corica cak'ran koka kang. Ana amma cit cang coporot ana ngkwimma kathar ikoporot na akko. Anaruk amma cokithak ana ngkwakinnimma kathar ikoporot na akko. ³⁵ Nokkwo kunu ncik, ak'ran ikaik ianon okorronno oka ngi'rimak. ³⁶ Ittina amma

ka kang koppathe k'ran, ana ngkwina kathar na aeo ana ngi'rimak ngella, ka kang kaka koporot ere k'ran amma akoccieik naung."

Oieccuo paruket ul woPriccin ana ul iangkene lon lothonce'ret lon cik
(*Maththa 23.1-36; Markkoc 12.38-40; Lukka 20.45-47*)

³⁷ Anakka oieccuo pomarttot lon lung, apul p'rek nti iul woPriccin akkarathok tuan thanung akin otho'rkoik akin aththut, ittina oieccuo pi'rikathe noppa ana kwaththikkat cik nokuppu'rung kothu'rit. ³⁸ Anaruk pul poPriccin pinakathe nan ana kwoprttakatherit akka oieccuo pannilakko ammakka thathuma then akkwarthuk o'rkoik. ³⁹ Alli oieccuo i'rekathok itti, "Ul woPriccin, onon thame eththe'ret won ana maththak nthapat anaruk mikit mon moppappathe thukungkun ana a'rupu iokithak. ⁴⁰ Onon thomaik nti ima, lakannoka itti Kapik ikokkothe thapat kokkothe icarak than cakuruki? ⁴¹ Nome ikarak kon nthethet ul iella a'rupu cik ana onon thathakka thoporot noka appik.

⁴² Angkre, ul woPriccin akka onon thethet Kapik a'rupu wuluwuluk na'rupu kurekkurek iattul attul appik ana a'rupu iakkattat ngucul. Anaruk annopa'rine lon iloco'rothe cik ana thongat thoKapik. Onon thira tha'rungkot nothethet Kapik a'rupu wuluwuluk nna'rupu iaara, anaruk nokorronno ure na'rupu ioporot.

⁴³ Angkre, ul woPriccin, akka onon thongothe a'ran ioporot nomuththun ma'rama ana nthongothe itti ul wamicco non keccuk.

⁴⁴ Angkre, akka onon thungkot nupu noul ionyi inamu'ruttakot icapu ana ul wacukkarot cik awomma itti okin thaik thacukkarot nupu cik inoppappathe ka ikokuttat."

⁴⁵ Apul p'rek nti iul iangkene lon lothonce'ret lon cik i'rekat itti, "Pul ipangkene, akka menik ngkwaik pacungko nin llon elli cakuruk."

⁴⁶ Aieccuo othiat tit itti, "Angkre, onon ul iangkene lon lothonce'ret lon cik, akka onon thakkiet ul lon loppot ilalkothekin ana onon manna thakorronno othie caun culukku itti onon thittarot kin.

⁴⁷ Angkre, nanon akka onon akkuno nonupu preththere noul wothernte lon loKapik illet ma'rot. ⁴⁸ Onon thakene itti onon thongothe lon ila thiki thon thokkothe itti loco'rotheik okin thongwot ul wothernte lon loKapik ana onon thakkot nupu nopreththere. ⁴⁹ Ilen akka Kapik kerethe nouce wung itti, 'Mpathinhet kin ul wothernte lon lin ana ul wothothilettat win a'rek akin ongwo ana a'rek akin occokiet thiak.'

⁵⁰ Ilen akka ul wonoma'ri emmi akkaka wonu lon loucuk ngoul wothernte lon lin iongwuttat nci ammakka capu ncik appik coku'rettat ncik

⁵¹ nnothokkuttat thApil oingkanthet oCekkeria okin ithonguttathe itho'rkit thonoppa toKapik ana tu'rot tothok'ret a'rupu wothokiot ngüccük cik. İi mpi'rethenon itti, ul wonoma'ri emmi ien akkacco lon len ikkun appik.

⁵² Angkre, ul iangkene lon lothonce'ret lon cik akka onon thullukkwinthet ul kathar ikiniekin lon loKapik. Onon ngka kon thanni'riko ana onon thoce'ret okkwion ithaik thenekke itti okin thi'riko ilon loKapik."

⁵³ Anakka oIeccuo poththet nocik cen, aul woPriccin ana ul iangkene lon lothonce'ret lon cik ikkat cik akin olikinok lon cik nci nokküt ana ipittittothok lon nuthuk. ⁵⁴ Akin o'rikothok amma akwi're lon l'rek moloko akin occokothok.

12

Nokorronno oka ammakka ul woPriccin (Maththa 10.26-27)

¹ Anakka cungkut coul woppot ca'rntakothe tothun ana opilingon th'rek thikkatheik akin ocukkwarot pangken cik, aIeccuo i'rekat ul iammakothok cittoküt itti, "No'rumoik nolon ilanthan noul woPriccin ilammakka mü'rükül ilammikkot ul. ² Lon appik ilocukkwakot nan linako nan ana ilamu'ruttakot littako ncik ³ Ana ilanon therethe i'rimak laccikakot icingki ana ilerettathe thonu noppa lakkuttanthe kuri no'ret."

Nopellene Kapik (Maththa 10.28-31)

⁴ Akwappi'rekat itti, "Opuruko pingon, nokorronno ipo n're nokkwion ithakkwot ka ana okin thakannappokkot lon l'rek. ⁵ Anaruk mpakenon okkwion ithanon opellene. Nopellene okkwi ipakkwot ka ana kwonu pu'ran itti kwarrethung ciththohirin. Mpi'ret non itti ook akka annopellene.

⁶ Nya'rkang nyukuluk nyakannoketta nakucci we'rai? Anaruk ngella ngulukku ngurettat nan ngKapik. ⁷ Wan won wono'ra wongantettat appik. Ittina nokorronno ipo n're akka onon akkoprot kannan nonya'rkang."

*Noccokot lon loIeccuo nomiküt
(Maththa 10.32-33; 10.19-20)*

⁸ Aleccuo appi'rekat itti, "Mpi'ret non lon icat itti okkwi ipi're tokit koul itti kwinan, ukul wopul iponyi wi're itti winak tokit kou'rupa wothothilettat woKapik. ⁹ Ana okkwi ipo'ruminthin kit tokit koul, mpa'ruminthok kit tokit kou'rupa wothothilettat woKapik.

¹⁰ Ana okkwi ipere llon lokithak nokkul wopul iponyi, lon lung laccikakot anaruk okkwi iperet Kanang ikupupure llon ilokithak lon ilokithak lung lakorronno occikakot.

¹¹ Amma onon thonekittathe nomuththun ma'rama ana tokit konili ana ul ionu lon ikkun, nokorronno ipo n're itti nthrrot noka kon tat ana manna itti onon thi're itti tat. ¹² Akka Kanang ikupupure kakenenon ca'ri cen itti nthi're tat."

*Thokkwie lon kuru ncik thopul ipapa'rthan
ana pommaik*

¹³ Apul p'rek nti icungkut coul i'rekat oIeccuo itti, "Pul ipangkene, i'rethe opangkin akwopet-tinin a'rupu wopappa ianin opakot nan."

¹⁴ Aleccuo othianthok tit itti, "Pangkin, oththa akkonekkethin cik itti mpak'rinenon lon lon ana illillinenon ia'rupu won ianon thopakkothe nan?" ¹⁵ Ittina akwappi'rekat kin itti, "Nokkwo kunu ncik ana o'rumoik nolon lothrik nan ncik appik akka thikkoik thopul iponyi thannoka itti pul pana tha'rthan thoppot."

¹⁶ Akwerekanthet kin lon elli nthokkwie lon kuru ncik itti, "Capu c'rek cokat cik copul ipapa'rthan cokwonot mil moppot. ¹⁷ Akwi'rekat noucce itti, 'Ngintha akka anokkot? Mpella

ka'ran ika anipot mil tit.' ¹⁸ Ittina akwi'rekat ka kung itti, 'Katha elli akka anokkot mpangwo irit win appik anuno a'rek ittittik ana ien akka anipot mil tit appik ana a'rupu w'rek. ¹⁹ Ana ca'ri cen anopira noka anomekat ka kin itti, Ngkwonu a'rupu woppot wakanno omttat aththaman noluput ilanthan. Okathacce lon nuthuk, o'rku thu'rit ana icat cik ana apira noka.'

²⁰ Anaruk aKapik i'rekathok itti, 'Katha oung emprik ngkwommaik nti ica. Ngko'ra engi ngkwaik pio ana oththa akkapakkot na'rupu ia ngkwipinthe ka kang cik?'

²¹ Laka ittina noul ipinthe ka ken a'rupu cik anaruk okin thanni'riko lon len okin oKapik loporot."

*Nokorronno irro mikit nti ikarak
(Maththa 6.25-34)*

²² Ittina aIeccuo i'rekat ul iammakothok itti, "Ilen akka ani'renthe non itti nokorronno opellene lon lothikkoik thon itti ngimpen akka anno'rko ana ngimpen akka annako.

²³ Akka thikkoik akkoporot kannan nothu'rit ana ka akkoporot kannan noret. ²⁴ Nantokatha nongkorak akka nakannora ana nakannokio ana nella irit cik iakin ipot mil tit anaruk Kapik akka'rikiakin. Onon thoporot kannan nou'rupe.

²⁵ Oththa nti ianon iparttot ca'ri culukku noma'ri mothikkoik mung amma kwonu n're? ²⁶ Inakka onon thomma arttot ca'ri culukku nothikkoik thon, ngintha akka onon opellene itti onon tha'rko ngimpen ana ako ngimpen?

²⁷ Nantokatha tat akka po'ren ocokka. Pakan-noreko apakie ka ken. Anaruk mpi'ret non itti manna oCiliman nthar'than thung ithrik, kwakannako eret wopeththere ere po'ren empi. ²⁸ Amma Kapik ka'rumo noraco irakaik inenni ana ngorrot arorrettat ithik, Kapik kakanno'rumo nanoni? onon ithonu thocokot lon loKapik nomikit thoththeik. ²⁹ Ittina noko-rronno onekkes mikit narupu ianon orko ana ikko, nokorronno opellene lon len. ³⁰ Akka ul wonocapu ncik appik iomma lon loKapik wammakot arupu ammakka enni appik anaruk oththe pon pina itti nthongothe arupu wen. ³¹ Anaruk nipitto ngili ngoKapik ana arupu enni wettat non."

Thar'than tothi'rot
(*Maththa 6.19-21*)

³² "Lungkat lin, nokorronno ona n're akka oththe pon popirat noka itti kwethet non ngili ngung. ³³ Okette arupu ia ngkwonu aikket ul iella arupu cik. Arntinthe ka kang aruk wothar'than tothi'rot ithakorronno okittako ana na atho'rumako nan ana pul pothu'ran pella ipamunye ana na nangak nella inacukwiet. ³⁴ Akka cikit cang caka na thar'than thang thaik cakuruk."

Pul ipareko ipaccot kit nolon
(*Maththa 24.45-51*)

³⁵ Aleccuo arungkat no'ron akwere itti, "Okucekinthe ngre cik karkkopul ipakot eret wore ana k'ran kothik kung kocciettat. ³⁶ Oka ammakka ul iaik wa'rikot opit pen amma akwokkaprttako ntan nti ithipa akin ina akka akin

anyinok kathat koricürük aththaman. ³⁷ Laka loporot noul iareko tuan itti opit pen poruan pathiot kin akin thaik ngkit thapat amma kwaan, mpi'ret non lon ilaik icat ook ngka kung kwako eret wore ana kwikkiekin cik, akwikkekat kin thu'rit akin o'rko. ³⁸ Okin thapira noka kannan amma kwaththiot kin ngkit thapat amma manna kwantanthan thampang thongk'ra kannan. ³⁹ Anaruk nina nan itti, amma pul poruan pappina ca'ri ica pul pothu'ran paik panthan nan, kwira pannokorronno pul pothu'ran api'riko noppa. ⁴⁰ Ittina nokuccekot cik cakuruk akka ukul wopul iponyi wantan noca'ri icanon thomma itti kwaik pao nan."

⁴¹ APoththuruc ipittat Ili oIeccuo lon itti, "Ili, ngkwaik peret nin llon ilokkwiettat kuru ncik ellii? Okorronno oka meniki, ngkwaik peret ul appiki?"

⁴² Alli oIeccuo othiat tit itti, "Pul ipaccokot lon ana ipinaik nti ica ana okucet loncik papenang, ook okkwi ipa pul iprik onekket cik ipakatha lon loul iarekinok apethet kin thu'rit noca'ri icoporot. ⁴³ Laka loporot kannan nopul ipareko pen ipa apit athiot akwokkot ngre papenang amma kwokkaprttakot ntan. ⁴⁴ Ittina mponu itti mpi'ret non icat itti opit pethok lon lokaman ikkun appik. ⁴⁵ Anaruk amma pul ipareko popri itti, 'Opit pin paccoik kwannao aththaman,' akwikkat cik akwokkwe ul iareko iomura ana iari ana akwikkoik akwo'rko thu'rit ana ikko ngapak ana okkwiet ka kung ngapak. ⁴⁶ Menik opit popul ipareko panthan noca'ri ana nokingi ica pul ipareko pomma nan itti kwaik panthan nan.

Ana amma kwaan kwaccokiethok thiak kannan akworrekathok iul iannocikot lon nomikit.

⁴⁷ Pul ipareko ipina ngre ngopit ana pan-nokuccekinthet cik manna okorronno oreko ngre inga apit ponu itti ngarekitta, kwapoko kannan. ⁴⁸ Anaruk okkwi ipommat ngre ngopit ana ipakkot lon moloko, kwapoko u'ret wotteik. Ana amma opilin peettathe a'rupu woppot a'rupu woppot wipittakothok ana okkwi ipocokiettathe a'rupu woppot, ana kwipittakot a'rupu woppot kannan."

*Oieccuo akkonat thopettako
(Maththa 10.34-36)*

⁴⁹ Aieccuo appi'rekat itti, "Mpaat paththokwot thik nocapu tholon lothonce'ret lon cik ana mpappongothe itti amma thokurathe ana thaik thacco. ⁵⁰ Mponu itti mpaccokot thiak kannan. Mpannoka poporot noka ana mpa'rungkot pan-noka poporot noka puccuk athocokot thiak omtakat. ⁵¹ Nthame itti ikkre mpaat nocapu anona thikkoik thoporori? Aa, mpi'ret non itti, okonnoka thikkoik thoporot anaruk thopettakorit. ⁵² Nciki inenni oingkat puccuk, ul woruan waik ukuluk willakorit we'ra ana w'rapuruk, ie'ra w'ra lon lopangon ith'rapuruk ana i'rapuruk w'ra lon lopangon ithe'ra.

⁵³ Okin thillillako tit oththan ponyukul p'ra lon lonyukul
ana nyukul ny'ra lon loththan pen,
ana onnan p'ra lon lonyukul inyari
ana nyukul inyari ny'ra lon lonnan pen,
ana opithe p'ra lon lari wonyukul nyung

ana ari wonyukul nyung w'ra lon lonnan polle.”

*Thina lon ila Ieccuo pokat cik akwokkot
(Maththa 16.2-3)*

⁵⁴ Akwi'rekat cungkut coul itti, “Amma onon thimmat anuththe a'rntakot ithi'rot na acingki arungko, anni're itti kapik kaik kapo ana kapo icat. ⁵⁵ Ana amma kanang okkurarot nthokkun wothothari amma akatha nacingki ummot nggin, nthame itti cik caik cathakka cippa ana icat cathakka cippa. ⁵⁶ Onon ithongothe itti nthinikot lon, onon thina akka annina cik corothi'rot ana conocapu. Ngintha akka nthommanet lon ilaik inenni?”

*Okkothe ku'ri nul i'rat lon lang
(Maththa 5.25-26)*

⁵⁷ “Nthontha akka nth'rat okwarttikinthe ka kon lon iloporot annokkot? ⁵⁸ Amma pul p'rek porukwethung mpap'rek, akwancot kathar ikanon ok'ro lon len anon thaik nokathar anneo imakkma. Amma onon thannok'ro lon naththe'ra, ana kwanekothung tokit kopul ipakkma ana pul ipakkma pethung pul iprro ana pul iprro parrethung ikorrkkor. ⁵⁹ Ana amma ellrik lokkattathe mono arrettat ikorrkkor ngkwannoppot thapat kirrkkir puccuk aeeat kin akucci wokit iokwentakot.”

13

*Opa'rinet lon lang cik ilokithak akka
lakkwohung*

¹ Ca'ri cen ul w'rek wokat cik i'rethe oIeccuo lon loul wonoththok poCelil ia ili oPilaththoc pongwot ca'ri icakin thokat akin ethet Kapik a'rupu wothokiot ngüccük cik noppan toKapik. ² Aleccuo othiat tit itti, "Ntheret nomikit mon itti ul enni wonoththok poCelil wokat wolon ilokithak kannan noul w'rek appik woCelil akka okin thokkiettathe thiak ngkathar ngngki? ³ Mpi'ret non itti annoka menik, anaruk amma onon thannopa'rine lon cik ilokithak onon thille appik cakuruk. ⁴ Laka laraththa noul iokat willet iattul ana ikken mormor (18) ia kaman ikukwit kukwit kapothe nan korik'ral koCiluam? Nthame itti okin thokat tholon ilokithak kannan noul iaik noka'ran koUruccelim appiki? ⁵ Mpi'ret non itti annoka menik anaruk amma onon thannopa'rine lon cik ilokithak cik ana onon thille appik."

Thokkwie lon kuru ncik lopira ipannokwono

⁶ OIeccuo pi'rekathe ul lon elli okkwie kuru ncik, itti, "Pul p'rek pokat cik ponat pira popicit ittak akwoingkat itti kwothitho nyukul nyen anaruk kwakanniat nyukul. ⁷ Menik apul i'rekat pul ipakathanok lon lottak itti, 'Luput lothakkat l'rapuruk anaukko cene itti mpiththo icit nopicit anaruk anokorronno incet aththik. Okiotheik, ngintha akka apokittinthe karak cik?'

⁸ Apul ipakatha lon lottak i'rekathok itti, 'Opit pin, antokorronno thuput thulukku anorane cik anipot pocok tit. ⁹ Amma pokwonot nyukul thuput ithanthan laka loporot. Ana amma pannokwono antokiot cik.' "

Pul ipopari ipakimico pittiettat noca'ri caCcepith

¹⁰ Ana noca'ri caCcepith aIeccuo pappokat cik akwongkene ul lon nocuththun ca'rama. ¹¹ Ana pul p'rek ipopari pokat cik cinang ipa u'rupa iokithak wothikkiet kimico ana ponu luput attul ana ikken mormor (18) pappu'rumakot cik ana pommot oco'rot tit kirrkkir. ¹² Anakka oIeccuo pimmarok akwakkarathok tokit koul akwom-ekathok itti, "Pul ipopari, ngko ngkwothikkiettat poporot nomio mang." ¹³ Ittina akwonekkekat nyaun naak apul oco'rat tit accokkot akwopirakanthet Kapik noka.

¹⁴ Apul iprik ponocuththun ca'rama uakat ka akka oIeccuo pittiethe pul ipopari noca'ri caCcepith api'rekat ul itti, "Ma'ri maik m'rakkuruk mongre nanthan annittiettat nan annoka noca'ri caCcepith."

¹⁵ Alli i'rekathok itti, "Onon ithinnikot lon, opilin nti ianon pannok'ro ngura ngung ana nge'ringka notho'rak noca'ri caCcepith akwothikkie ng'rii?" ¹⁶ Pul ipopari empi pothiki thAprein ipa pul pothopulut pi'rikikkot thupuththuput luput attul ana ikken mormor lakannoka loporot itti kwelikkako nti ilo'rak noca'ri caCcepethi?"

¹⁷ Anakka kwi'ret lon elli, aul appik i'rat lon lung othiakat cik anaruk ul wopirakathe noka appik nolon ilopreththere ila kwokat akwokkot.

*Thokkwie lon kuru ncik thocore icoththeik
(Maththa 13.31-32; Markkoc 4.30-32)*

¹⁸ Ittina aIeccuo i'rekat itti, "Ngili ngoKapik ngungkot ngintha ana ngintha akka anungkie

ngngin? ¹⁹ Ngili ngoKapik ngungkot core icoththe kannan iceera nocapu. Pacokka apothakkakat pira ana u'rupe wuno nune nou'ri wen."

*Thokkwie lon kuru ncik thomü'rükül
(Maththa 13.33)*

²⁰ Aleccuo appipittat lon itti, "Ngintha akkungkot ngili ngoKapik? ²¹ Ngili ngoKapik ngikkoik ere mü'rükül ima pul ipopari pocikittot mm're moppot mono am're inyakat ncik appik."

*Cürük icomü
(Maththa 7.13-14, 21-23)*

²² Ittina aleccuo oingkat okko ikarkoman ana na'ran akwongkene akka kwokat cik akweo noka'ran koUrucclim. ²³ Apul p'rek ipittathok itti, "Ili, ul watho'rettat wotteik tulluki?"

Aleccuo othianthet kin tit itti, ²⁴ "No'rumoik annina akka anni'riko nti icürük cokathat icomü akka mpi'ret non itti, ul woppot wenekke itti wi'riko anaruk okin thakinni'riko. ²⁵ Amma pul pokaman purokot mono unukkwot kathat ana nthaco'ro thapat annakkakkaro ana annuet cik itti, 'Paththi, anyinet nän kathat.'

Anaruk kwathiot tit itti, 'Mpommanon, ana manna itti onon thaath ngkartha.'

²⁶ Ana onon thi're itti, 'Oron tho'rkot cik tothun ana ngkwongkenet iathar nakaman kin kaik.'

²⁷ Ana kwathiot tit itti, 'Mpommanon, ana manna itti onon thaath ngkartha. Nopa'roik ntokit kin, onon ul appik iakkot lon ilokithak.'

²⁸ Ca'ri cen onon thoo ana ok'rellot kinyit thocipit amma onon thimat Aprein ana oIccaak ana oIakup ana ul appik wothernte lon loKapik

ingili ngorothis'rot anon ngka kon thorrettathe thapat. ²⁹ Ul wanthan na acingki ummot ngngin ana na acorungkwot ana nthokkun wothokure amma akatha na acingki ummot ngngin ana thokkun wothothari amma akatha na acingki ummot ngngin ana wathikkoik nokamuthe ingili ngoKapik. ³⁰ Okkwion ithaik tokit inenni thathoka thoceken ana okkwion ithaik thoceken inenni thathoka tokit."

Oieccuo ana oIruthuc

³¹ Ca'ri cen aul w'rek woPriccin akkakanthet oieccuo ai'rekathok itti, "Opa'rik ncene aeo imakkren oIruthuc pongothe itti kwakkwohung."

³² Aieccuo othianthok tit itti, "Ngkonon ani'ret pul empriik ipokithak itti mpakicce u'rupa iokithak ana ittiet ul iongo inenni ana ngorrot ana noma'ri im'rapuruk mpamartto lon lin.

³³ Anaruk mpaik nokathar inenni ana ngorrot ana noma'ri imomakotho mpi'ret non icaricat itti, pul pella pothernte lon loKapik piot noka'ran koka noka'ran koUrucelim."

Oieccuo pongothe ka'ran koUrucelim

(Maththa 23.37-39)

³⁴ "Urucelim, Urucelim, oung ipangwo ul wothernte lon loKapik ana okincot ul cik iothilanthet non antokatha ma'ri mornoththa ima mpenekket itti mpa'rntot non tothun ammakka thaku'ruk a'rntot opeon iu'ruccu ana onon th'rat. ³⁵ Nokatha kaman kon kei koththettanet non nan thellek. Mpi'ret non icat itti onon thakinnimman attang puccuk aca'ri akkakat ica

anni'ret itti, 'Athethië oka nopul ipaat ngk'ran kolli.'"

14

Oieccuo pittiet pul ipongo

¹ Ca'ri c'rek caCcepith caleccuo pappeot tuan topul p'rek iprik nti iul woPriccin akin tho'rkoik. Kwokat akwoccurat kit nan papenang. ² Cinang apul p'rek oco'rat tokit koIeccuo poththakathe tacok cik. ³ Aleccuo ipittat ul woPriccin ana ul iangkene lon lothonce'ret lon cik akwi'rekat kin itti, "Lon loco'rotheik itti pul pittiettat noca'ri caCcepithi? ana amma okorronnok itti ii pakinnittietari?"

⁴ Anaruk okin thangkatheik menik aleccuo onekat pul akwittiekat akwothiat ikathar. ⁵ Ittina kwipittathekin itti, "Amma opilin nti ianon ponu ukul ana manna ngura ngapothe irok noca'ri caCcepith, ngkwakannontho nti iroki?"

⁶ Ana okin thellakathe ilakin i're.

Kapik kongothe ul iannipot ka thoura

⁷ Anakka oIeccuo pinat itti ul iakkarakat wummo a'ran iathiakine cik wocittokit aikkoik nan akwokkwiekant het kin lon kuru ncik itti, ⁸ "Amma opilin pakkarothung kamuthe kothipa kirnni ikkoik noka'ran ikathiakine cik akka opilin pikko paththoka pakkarakat cakuruk ipathiakine cik naung. ⁹ Akka pul poruan ipakkarot non aththuththe'ra panthan ana

pamethung itti, 'Urokinet pul empi noka'ran engki apikkoik.' Ittina athiakat cik aurokat athikkat cik thoceken. ¹⁰ Anaruk amma ngkwakkarakothē kamuthe k'rek ikkik ciththoceken ana amma pul ipakkarorong paat ana pamethung itti, 'Opuruko pin, a'rik athikkoik noka'ran ikoporot.' Ittina ngkwaka pothiakinet cik tokit kopuruko pangon ithakkarakot appik. ¹¹ Akka okkwi ipathikkie ka kung prik kwathikkietta potte, ana okkwi ipathikkie ka kung potte kwathikkietta prik."

¹² Ittina aleccuo i'rekat pul ipakkarro ul itti, "Amma ngkwokkothe thu'rit korronno akkarot opuruko pangon ana opangkangon ana ul ionu kaman iccik kang iaa'rthan akka amma ngkwakkarot kin ana okin tha'rkoik ana okin thakkarothung kamuthe ken cakuruk ana ittina ngkwokkettat p'rīn. ¹³ Anaruk amma ngkwonu kamuthe akkari ul iella a'rupu cik ana iani'rilla ana iaimico ana i'rimathe ¹⁴ ana ngkwethiēttat cik. Akka okin thomma ethung lon iloporot, Kapik akkethung lon iloporot noca'ri ica ul iloporot uroko nti ithio."

*Thokkwie lon kuru ncik lokamuthe ikrik
(Maththa 22.1-10)*

¹⁵ Anaruk akka pu'rek nti iul iokat cik nokuppu'rung kothu'rit okin oIeccuon pockkothe lon len akwi'rekat oIeccuo itti, "Thethiē thaka nopul ipa'rkoik nokamuthe ingili ngoKapik."

¹⁶ Aleccuo othiāt tit itti, "Pul p'rek pokkothe kamuthe mono apakkarat ul woppot. ¹⁷ Ana noca'ri cokamuthe kwothiāthe ul wung

iarekinok athi'ret ul iokat wakkarakot itti, 'Wanthan akka thu'rit thokuccettatheik p'rïn appik ana kamuthe kaik kathokkattat.'

¹⁸ Anaruk okin appik thikkatheik akin ere lon kurekkurek ilannokorronnokin itti okin thaeo. Opaththi porokit pi'ret itti, 'Mpurno okero kopon ana mpaik pathokatha ana ngkwakorronnon aneo.'

¹⁹ Apilin i'rekat itti, 'Mpurno okero nyura attul inyarako ngngin ana mpaik pathenekke ana ngkwakorronnon aneo.'

²⁰ Apilin i'rekat itti, 'Mpurnnipo pari ana mpaik pakannanthan.'

²¹ Apul ipareko okkaprttakat ntan apathi'rekat opit. Ittina apul poruan uakat ka apothiät pul ipareko itti, 'Ngko cokocokot akkätte iathar ittittik ana iarran woricarak coman aipo ul ntan cene iella a'rupu cik ana ul iomma onyaro ana ii'rimathe ana ul iaimico.'

²² Apul ipareko i'rekat opit itti, 'Lon ila ngkwi'ret itti lakkattat lokkattathe appik anaruk icci l'rek lappokkattat.'

²³ Apit i'rekat pul ipareko itti, 'Ngko akkette iathar ittittik ana iarran wokaman ai'ret ul anthan puccuk akaman kin oppakat nul.

²⁴ Mpi'rethung itti pul pella nti iul iakkarakat pinot thu'rit enthi aththik.' "

Thothakka pul ipamakot oIeccuo thannoka thoppappat

(Maththa 10.37-38)

²⁵ Ul wakat cik cungkut coppot ammakot oIeccuo akwoprttakat kin akwi'rekat itti, ²⁶ "Amma opilin painin ana kwakannongathin kannan

naththan ana onnan ana opari ana nyukul nyung ana opangon ithomura ana ithari ana manna thikkoik thung, kwannothakka pul pin ipammakothin. ²⁷ Okkwi ipakannangkot itti kwacokot thiak ana io nti ilon lin kwannothakka pul pin ipammakothin.

²⁸ Nantome itti opilin pongothe nti ianon itti kuno man mättik ana mukwit. Kwannikkoik kappak akwothangante cekerek ca'rupu iunta ngngin akwokatha itti amma kwonu akucci wop-pot iamarttinok ngrei? ²⁹ Akka amma kwokkothe millang mono akwomma omartto thuno, okkwi ipimma lon len paccirok ngngin ³⁰ akwi're itti, 'Opatthi empi purokiet man ncik itti kuno ana kwomakathe omartto.'

³¹ Nantome itti ili waik wathorro iili w'rek, wannikkoik athangante ul woritho'rak wung akwokatha itti amma ook akkarro ili wen ionu ul woritho'rak athar arrial (20,000) nul wung woritho'rak iaik athar attuli (10,000)?

³² Akka amma lalkothok itti kwannorro iaak kwathiöt pul apothipitto lon lothopakkot iku'ri akkwarthuk ciththan. ³³ Laik menik cakuruk okkwi ipannopa'rine lon cik appik, kwannothakka pul pin ipammakothin."

Nguculoththu iokithak
(*Maththa 5.13; Markkoc 9.50*)

³⁴ "Nguculoththu ngoporot anaruk amma ngothakkat ngocalang, ngappothikkietta ngira taththa? ³⁵ Ngannoka ngoporot nocapu ana nopocok anaruk nguntat cik.

Okkwi iponu unu itti kwocçikot akwocçikot."

15

Thungkat ithuratheik (Maththa 18.12-14)

¹ Ca'ri c'rek cokat cik aul ia'rntinthe nili akucci ana ul wolon ilokithak wokath cik iccik koleccuo accikot lon lung. ² Anaruk ul woPriccin ana ul iangkene lon lothonce'ret lon cik ikkat cik aerekot itti, "Pul empi pikkiet ul cik ionu lon ilokithak ana okin o'rkoik akin aththungon."

³ Menik aleccuo i'rekat lon okkwie kuru ncik itti, ⁴ "Nantome itti amma opilin nti ianon ponu lungkat arrial ukuluk (100) mono athungkat thulukku urat cik ntipangen. Kwannothe nolungkat ilarrial woco'rin ana alkaire ana ikken ukulaco'rin (99) akwothokwantot thungkat ithulukku ithuratheik ipira thapat puccuk akwiari? ⁵ Ana amma kwiothe kwapira noka akwonekat tocalak ⁶ akwopakkat ngngin tuan. Ittina amma kweot tuan kwakkaro opurukon ana ul wonocürük appik akwomet kin itti, 'Nanthan unopira noka akka mpiothe thungkat thin ithokat thuratheik.' ⁷ Mpi'ret non itti laka menik cakuruk, thopira noka thakaik tothi'rot mpul pulukku ipakkoik nti ilon ilokithak noul iaik arrial woco'rin ana alkaire ana ikken ukullaco'rin ioporot iannangkot itti okin thakkaprttako nti ilon iokithak."

Kakucci ikuratheik

⁸ "Nantome itti amma pul ipopari ponu akucci attul ana kuretheik nan kulukku kwannothe thik ana ollaik noppa appik ana okwantot cik kicce kicce puccuk akwiari? ⁹ Ana amma kwiothe kwakkaro opurukon ana ul wonocürük

akwomet kin itti, 'Nanthan unopira noka akka mpiothe ka kucci kin ikakkuratheik.' ¹⁰ Mpi'ret non itti, ittina cakuruk u'rupa wothothilettat woKapik wapira noka nopul ipokkarttakot nti ilon ilokithak."

Ukul iuratheik

¹¹ Aieccuo appikkat cik akwere okkwie lon kuru ncik itti, "Pu'rek pokat cik ponu nyukul nye'ra. ¹² Aukul iotte i'rekat oththan itti, 'Pappa, opettinet nin ia'rupu aethin ain.' Ana kwilillan-thet kin ia'rupu.

¹³ Aukul iotteik ikkat cik papotteik a'rntat a'rupu wung appik ia kwocot akwoingkat ngngin ci noththok poka akwokittat a'rupu wung cik nuthuk appik ia konat. ¹⁴ Manakka kwokittothe a'rupu wung cik appik arī o'rat cik noththok pen appik tommaththik arī ikkat cik arokkwothok akka kwellat pap'rek cik ipa kwo'rko. ¹⁵ Menik akwoingkat akwothorekat nopul p'rek ponoththok pen ipothīathok topon itti akwotho'rilikie nuththuruk thu'rit. ¹⁶ Ana kwappongothe itti kwa'rko thu'rit thonuththuruk itha kwokat cik akwikket anaruk pul pel-lakathe ipethok.

¹⁷ Anaruk kwopakkekathē lon nocikīt akwi'rekat itti, 'Ul wornoththa iapappa porekiet tuan ana thu'rit thaik thoppot ana cene anio ntī. ¹⁸ Mpaēo anopakkinthet opappa anomethok itti, Pappa, mpokkothe lon moloko tokīt koKapik ana tokīt kang. ¹⁹ Mpakannoka pekkot nan itti mpakkarako itti ukul wang. Othikkien pul

iparekinung.’ ²⁰ Ittina akurokat akwopakkanthet oththan.

Anaruk akka kwokat cik akkwarthuk ciththan, oththan pimmakathok athiak oppakat nocikit thokkul wung. Akwollat taak akwi'rikathok toperere.

²¹ Aukul i'rekathok itti, 'Pappa, mpokkothe lon moloko tokit koKapik ana tokit kang. Ana mpannekko itti mpakkarako itti ukul wang.'

²² Anaruk oththan pi'rekathok ul iorekot tuan itti, 'Nona eret iie iopeththere annakiek cococokot. Nakiek callong nocaun ana wok iracok.

²³ Nona ngura iotte iittathe annokkwot. Ntürün o'rkoik ana ukkwo. ²⁴ Akka ukul win enni wokot wiot ana wokkot cik ana wokot wuratheik ana wincathe.' Ittina akin ikkat cik akin o'rkoik ana ukkwo.

²⁵ Anaruk ukul wung irik wellat ntopon manakka akko napuththut tuan accikat ciririk ana ngica. ²⁶ Ittina kwakkarathe pul p'rek ipareko tuan ana kwipittathok itti, 'Ngintha akkaik tuan?' ²⁷ Apul ipareko othinthok tit itti, 'Opangkang paat ana oththe pokkwinthok ngura iotte iittathe akka kwokkaprttakot poporot.'

²⁸ Ukul irik wuakathe ka ana w'rakathe i'riko noppa. Menik oththan poppanthok thapat akuethok itti kwi'riko noppa. ²⁹ Anaruk kwi'rekathok oththan itti, 'Antokatha luput elli appik mpokat anorekinung kannan ere piak ana mpannarrot lon lang cik aththik ana ngkwakannethin manna imit wulukku anokkwot inno'rko inopuruko pingon. ³⁰ Anaruk akka ukul wang enni iocot a'rupu wung appik ana waththokittot cik akin oul iari ia'ro nul nuthuk

ana waat tuan ana ngkwokkwinthok ngura iotte iittathe.'

³¹ Aththan i'rekathok itti, 'Ukul win, ngkwaik iraththe'ra appinappin ana a'rupu win appik ien wang. ³² Anaruk oron thonu itti oron thakkot kamuthe ana opira noka akka opangkang empi pappuratheik ana kwincathe ana kwappokat piot ana kwokkot cik.' "

16

Pul iponu ngre ikkun ana apponnoreko ncikit culukku

¹ Aleccuo i'rekat ul iammakothok itti, "Pul p'rek pokat cik papa'rthan ana ponat pul iporekinok aul onakanthok lon itti pul iparekinok paik pakittinok tha'rthan. ² Ittina apul ipapa'rthan akkarathok akwipittathok itti, 'Lon liatha elli ila mpaik paccikot aul erethung ngngin? Okenen ngintha akka ngkwokkothe akka ngkwannapporekinin p'rïn.'

³ Apul ipareko erekat nouce itti, 'Ngintha akka anokkot inenni akka opit pin paik panekothin ngre? Ana mpomma ipot cik ana mpothiat cik ipittot ul a'rupu.' ⁴ Akwi'rekat itti, 'Mpina lon ila anokkot akka amma kwopa'rerin cik nore aul ina akka aikkien cik tuan thanen.'

⁵ Menik akwakkarat ul iokat wannokke a'rupu wopit pung akwipittat okkwi porokit itti, 'Ngkwonu kamucu kornoththa ikokwentakot nocalak cang kopit pin?'

⁶ Apaththi pen othiat tit itti, 'Kokwentakot melun maak ngoceththun arrial ukuluk ma'ri mormor (800).'

Apul iparekinok i'rekathok itti, 'Oneki ka'rmacak akurro itti ngkwokwentakinet melun maak ngoceththun arrial ukuluk ma'ri moco'rin (400).'

⁷ Akwappipittat opilin itti, 'Ana ngkwokwentakinet kamucu kornok?'

Akwi'rekathok itti, 'Mpokwentakinet othan womil kathar kulukku (1000).'

Apul ipareko i'rekathok itti, 'Oneki ka'rmacak akurro itti ngkwokwentakinet arrial ukuluk ma'ri moromor (800).'

⁸ Opit pen pomerekekathe pul ipakannoreko ncikit culukku nothinangka. Akka ul wonocapu enci winangka okkot lon lonocapu. Anaruk ul wongili ngoKapik wannoka winangka llon lonocapu."

⁹ Aleccuo i'rekat itti, "Nokkot thuruko nthar'than thon thonocapu akka amma thar'than thomarttakot annina akka annikkiettaik ikaman kothupuththuput.

¹⁰ Okkwi ipo'rumot nolon ilotteik kwa'rumo nolon iloppot cakuruk ana okkwi ipanno'rumo nolon ilotte kwanno'rumo nolon iloppot. ¹¹ Ittina amma ngkwappanno'rumo nolon lonocapu papenang, oththa akkethung lon lothar'than ithaik icat? ¹² Ana amma ngkwanno'rumo narupuwopul p'rek oththa akkethung arupu wang itti ngkwa'rumo nan?

¹³ Pul pella ipareko parekine nili ne'ra kwonu itti kw'ra ili w'rek akwongat arek ana manna itti kwocokot wulukku akworakke arek. Ittina lomma itti onon thangat Kapik ana ongat thar'than."

¹⁴ Manakka ul woPriccin woccikothe lon elli okin thikkathe cik akin okkothok ngure ngngin akka okin thaththongothe akucci. ¹⁵ Aieccuo i'rekat kin itti, "Onon thathikkie ka kon thoporot tokit koul anaruk Kapik kina ilaik nomikit mon. Akka lon ila ul okatha itti loporot lella lon cik tokit koKapik."

Thongkene arttakot nan

¹⁶ "Lon lothonce'ret lon cik loMucca lokat cik ana ul wothernte lon loKapik werntet puc-cuk mono aLuanna pomamuthie akkakat. Nci cĭnang alon iloporot longili ngoKapik antikkat cik alongkenetta ana ul woppot waik wennekke itti waeo ingili ngoKapik. ¹⁷ Tothi'rot ana capu thintat cik aththaman anaruk tamping tella tulukku irintat cik nolon lothonce'ret lon cik.

¹⁸ Okkwi ipathĭo pari pung itti akwappipo ap'rek kwaik pa'ro nul iari ittat. Ana okkwi ipipot pari pothĭlat kwaik pa'ro nul iari ittat."

Pul ipapa'rthan ana oLiaccir

¹⁹ Aieccuo ikkat cik akwere icci itti, "Pul p'rek pokat cik papa'rthan ana pakot eret ionu cekerek crĭk ana ikkoik noka'ran ikopeththere ana akwo'rko thu'rit thothiot ana okkot kamuthe appinappin. ²⁰ Ana pul p'rek pokat cik poccot k'ran itti oLiaccir pokat papiak pellat pap'rek cik ana ponat ĩnyĭ noka ana ul wokat cik annenekok annekkethok tocürük copul ipapa'rthan. ²¹ Ana pokat apo'rikot itti pa'rko thu'rit itha

apukkot cik noküpppü'rüng kopul ipapa'rthan. Ana luk lokat cik alacceccenok inyï.

²² Aca'ri akkakat apul ipa piak iat au'rupa wothothilettat woKapik onekathok tothi'rot na Aprein paik apul ipapa'rthan iat cakuruk akwocikkakat. ²³ Apul ipapa'rthan onthat kit nciki thothirin na kwokat cik akwocokot thiak akwimmakat Aprein ciththan ana oLiaccir iccik kung. ²⁴ Akwakkarat kin itti, 'Ngappa pin Aprein, ipi thiak thin othinthin oLiaccir akwothape caun ng'ri akwonekkenthin nothu're akka mpaik pacokot thiak kannan ic'rot enci.'

²⁵ Anaruk Aprein pothianthok tit itti, 'Ukul win, antokwarttikot itti akka ngkwokat parthuk io, ngkwonat a'rupu wang ioporot appik ana oLiaccir puruk ponat a'rupu wulluk iokithak appik anaruk inenni cene kwopirat noka ana ngkwaik paccokot thiak. ²⁶ Ana icci inenni oron thou thupu'ru thukwit thopettot iaron thannokorronno opilin nti ianin itti kwarrot cik ntan itti kwainenon ana cakuruk nti ianon pul pella parrot cik ntan itti painenin.'

²⁷ Apul ipokat papa'rthan appothiat tit itti, 'Pappa, amma menik mpipittohung itti othiothe oLiaccir tuan topappa. ²⁸ Akka mponu opangkingon ukuluk akwotherenekin othakka itti akin akorronno anthan cakuruk noka'ran engki kothocokot thiak.'

²⁹ Aprein i'rekathok itti, 'Okin thou oMucca ana ul wothernte lon loKapik kirrnni akin occikot kin.'

³⁰ Apul ipapa'rthan i'rekat Aprein itti, 'Aa, pappa, amma pu'rek purokot nti ithio mono

apoinekin okin thaccikothok akin opa'ranthet lon iokithak cik.'

³¹ Aprein appi'rekathok itti, 'Amma okin thannocikot lon loMucca ana ul wothernte lon loKapik okin thannokkwine lon l'rek kunu ncik ana antoka manna itti pul p'rek purokot nti ithio.' "

17

*Lon ilokithak ana thocikarnthet lon
(Maththa 18.6-7, 21-22; Markkoc 9.42)*

¹ Aieccuo i'rekat ul iammakothok itti, "Laik ilakorronno ul akkot lon ilokithak akka lon ammakka elli lonu itti lakaik anaruk angkre nopul ipana lon len. ² Laka loporot naak itti kwa'rettane cna icalak akwantorrettat irok irapangka nothokorronno kin akin okkiet opilin nti iakkwion itharran lon ilokithak. ³ Ittina no'rumo noka kon.

Amma opangkang p'rek pokkothe lon lokithak a'retti naak ana amma kwocottakot ntit accikinthok. ⁴ Antoka manna itti kwokkinthung lon lokithak ma'ri me're'rapuruk noca'ri culukku, mono akwainung akwomethung itti 'Mpopa'rinet lon cik,' accikinthok lon ilokithak."

Thocokot lon nocikit ana ngre

⁵ Aul wothonilettat woieccuo ipittathok itti, "Arttinthet nin nothocokot lon lang nomikit."

⁶ Aieccuo othianthet kin tit itti, "Amma onon akkonu thocokot tholon loKapik thotteik ere core icoththe, nthamet pira itti, 'Uroki ncü athocikko ka kang irok irapangka,' ana paccikot non.

⁷ Nantome itti opilin ponu pul iparanok ana manna u're lungkat. Amma paat nti ikkwon opit pamethok itti, 'A'rik aththikkoik a'rko thu'riri?'
⁸ Lannoka menik anaruk kwi'rethok itti, 'Okucenthin thu'rit cik a'rikothin ano'rkoik kappak amma mpo'rkot cik anto'rkoik.'
⁹ Kwapirie pul ipareko noka akka kwokkothe lon ili'rettathok itti kwakkori? Kwannopiriek noka.
¹⁰ Ittina menik onon cakuruk amma onon thokkothe lon ilanon thaththi'rettathe itti nthakkot onon nthira thi're cakuruk itti, 'Onin ul iareko tulluk onin thannekko nan itti inthapirietta noka.' "

Oieccuo pittiethe ul ionat inyi noka

¹¹ Anakka oieccuo pokat cik akweo noka'ran koUruccelim okko nokwen konoththok poCcamira ana noththok poCelil.
¹² Ana akka kwokat cik akwi'riko icarak coman, kwocurathe iul attul wonat inyi noka aco'rat ciththan
¹³ aikkat akkaro mpo're cittan itti, "Oieccuo pul ipangkene, ipi thiak thin."

¹⁴ Anakka kwimmat kin akwi'rekat itti, "Ngkonon annothokene ul wonoppan toKapik ka kon." Anakka okin thokat cik akin eo akin othiat ka ken akin thothakkat thoporot.

¹⁵ Akka opilin nti iakin paththiot itti kwothakkat poporot, kwokkaprttakathe ntan akwopirakanthet Kapik noka mpo're cittan.
¹⁶ Akworrekat ka kung iracok toIeccuo akwopirakanthok noka ana kwokat poul wonoththok poCcamirin.

¹⁷ AIeccuo i'rekat itti, "Okin thakorronno othikkietta thoporot attuli? Ana opilingon th'rek

thaik kren ukulaco'rin? ¹⁸ Pul pella ipokkaprt-takot itti pathopirane Kapik noka ook empi pokwat.” ¹⁹ OIeccuo pi'rekathok itti, “Uroki aeo akka thoccokot tholon loKapik thang nocikit thothikkierung poporot.”

*Thao thongili ngoKapik
(Maththa 24.23–28, 37–41)*

²⁰ Aul w'rek woPriccin ipittat oleccuo itti, “Ngili ngoKapik nganthan acintha.”

Aleccuo i'rekat kin itti, “Ngili ngoKapik ngakorranno anthan nuthuk nci nokkit angimmako.

²¹ Pul pella ipi're itti, ‘Katha ngei cene’ ana manna itti, ‘Katha nge're ceneket’ akka ngili ngoKapik ngaik ianon.”

²² Menik akwi'rekat ul iammakothok itti, “Ca'ri canthan icanon okwancot cik ngngin itti nthimma ca'ri culukku noca'ri cokkal wopul iponyi anaruk onon thakinnimma. ²³ Ul w'rek wakaik ii'ret non itti, ‘Katha kwei’ ana itti, ‘Katha kwe're ceneket,’ anaruk nokorronno omakot kin.

²⁴ Akka ukul wopul iponyi amma anthan noca'ri cung caka ere thule'rak ithallio ntothi'rot athoc-ciekat cik tothi'rot appik nci thocipit puccuk oingkat thocipit ce'rek. ²⁵ Anaruk kwonu cittokit itti kwaccokot thiak kannan ana ul iaik inenni w'rak.

²⁶ Ana ammakka lokat noca'ri coNua, lakaik noca'ri cokkal wopul iponyi cakuruk. ²⁷ Noca'ri cen ul wokat cik a'rkoik ana ikko ngapak ana ittetto puccuk mono aca'ri akkakat, aNua i'rikat ikuppu'rung konoi'ri angike akkakat mono ongwat kin appik ithokat thanni'riko ikuppu'rung.

²⁸ Lokat cik cakuruk menik noca'ri coLot, ul wokot cik a'rkoik ana ikko ngapak ana okette ana okero ana ora ana uno. ²⁹ Anaruk ca'ri ica oLot poththet noka'ran koCcothum aKapik orrekot thik ana monyik molik ntothi'rot mono amok'rekat kin appik ithokat noka'ran koCcothum.

³⁰ Laka menik ca'ri ica ukul wopul iponyi ummot ncik. ³¹ Noca'ri cen pul pella ipaik ci to'ra woman mung imonu a'rupu tit aporpot cik ntan itti pathummo a'rupu. Ana menik pul pella ipaik topon pi're itti papakkot tuan apothummo a'rupu w'rek. ³² Nantokwarikot lon lopari poLot. ³³ Okkwi ipome itti kwa'rumo nothikkoik thung kuret cik ana okkwi ipuret thikkoik thung cik kwangwot. ³⁴ Mpi'ret non itti, ngko'ra ngen ul waka we'ra na'rangkal ulukku ap'rek panekitta ap'rek oththetta nan. ³⁵ Ana ul iari we'ra iakakot mil ithun, p'rek panekitta ana ap'rek oththetta nan." ³⁶ ["Ul we'ra iomura iareko ikkwon p'rek panekitta ana ap'rek paththetta nan."]*

³⁷ Aul wung imakothok ipittathok itti, "Ili, elli lakaik kartha?"

Aieccuo othianthet kin tit itti, "Na ka ikiot kaik nengki na'rntakot nan." Oieccuo pothiotherit llon elli akwokene itti thao thung thinako nan.

18

Thokkwie lon kuru ncik locuruma ana pul ipance'ret lon cik

* **17:36** 17.36 Natham n'rek noma'rot nonu.

¹ Ittina aIeccuo i'rekat ul iammakothok lon nthokkwie kuru ncik, akwokenekin itti okin nthonu itti okin tha'ra nga'rama appinappin okorronno oco'ro ntit. ² Akwi'rekat kin itti, "Pul p'rek pokat cik noka'ran k'rek, ponu lon lothonce'ret lon cik ikkun pokat cik apokorronno opellene Kapik ana manna okorronno occot kit noul. ³ Ana pul ipopari p'rek pokat noka'ran ken pacuruma ana pokat apoincene pul pothonce'ret lon cik apipittittothok itti, 'Once'rentheit nin lon cik onin opul p'rek panin thonu lon lokithak onin aththut.'

⁴ Apul ipance'ret lon cik pikkatheik ma'ri mop-pot ap'rat okkot lon l'rek anaruk kwi'rekathē ka kung itti, 'Antoka manna itti mpannopellene Kapik ana manna ul ionyi. ⁵ Anaruk akka curuma enci caik caukkinin, mponu itti mpak'rinok lon lung akka amma mpannit-tarothok ana cakkinthin po're ica.' "

⁶ Ana Ili wi'rekathē itti, "Nantocckot lon ila pul ipannonce'ret lon cik ipakwiēttot akka pi'ret. ⁷ Kapik kannonce'rentheit ul wung ia kwakkarot lon ciki, ioo ngko'ra ana icingki? Ka'rungkot nan opakukkwtet kini? ⁸ Mpi'ret non itti kwaccot kit nan itti lon len lonce'rettatheik ana cokocokot, anaruk amma ukul wopul iponyi waat, wathiot ul nocapu awocckothe lon loKapik nomikiri?"

Thokkwie lon kuru ncik lopul poPriccin ana pul ipa'rntot akucci

⁹ OIeccuo papprokkwiekat lon kuru ncik akweret ul iakatha ka ken itti okin thoporot tokit koKapik ana akin okatha ul appik itti wokithak.

¹⁰ "Ul w'rek weot we'ra itti watha'ra nga'rama

noppan toKapik, opilin noul woPriccin ana opilin noul ia'rntot akucci.

¹¹ Apul poPriccin urokat kapik ana pa'rakanthet ka kung nga'rama itti, 'Kapik kin mpopirat noka akka mpannoka ammakka ul w'rek, wolu'ran ana iakkot lon ilokithak ana ia'ro nari woul, ana manna ammakka pul empi ipa'rintinthe nili akucci. ¹² Mpaco'ro nothu'rit ma'ri me'ra noma'ri ime're'rapuruk ana mpillillo ia'rupu appik ia Kapik kethin kurekkurek attul attul anethet Kapik nan puluk puluk.'

¹³ Anaruk pul ipa'rntot akucci poco'rothe ciththan ciththan napilingon. Ana kwipathe n're okatha tothi'rot ana kwonekkekathe ukun topere akkwannoka poporot noka akwi'rekat itti, 'Kapik, ipi thiak thin, oun pul polon ilokithak.' "

¹⁴ Ittina aleccuo i'rekat itti, "Mpi'ret non itti pul ipa'rntot akucci akkeot tuan poporot tokit koKapik, akka okwi ipathikkie ka kung prik kwathikkietta potte ana okwi ipathikkie ka kung potte kwathikkietta prik."

*Oleccuo pethie nyukul inyarran
(Maththa 19.13-15; Markkoc 10.13-16)*

¹⁵ Ul wokat cik cakuruk annane oleccuo nyukul inyarran othakka itti akwethienekin. Anakka ul iammakothok wimmat menik okin thothirriekathe ul cik ionat nyukul. ¹⁶ Anaruk oleccuo pakkarathe nyukul inyarran anyainok ana kwi'rekathe itti, "Nokorronno nyukul inyarran anyao naun nokorronno oce'rekin akka ngili ngoKapik ngoul iammakka okin. ¹⁷ Mpi'ret non lon ilaik icat itti, okwi ipannocco

ngili ngoKapik ammakka nyukul inyarran, kwanni'rikorit."

Pul ipapa'rthan

(Maththa 19.16–30; Markkoc 10.17–31)

¹⁸ Aili w'rek woul woIouth ipittat oIeccuo itti, "Pul ipangkene ipoporot, ngintha akka anokkot ani'riko ithikkoik thothupuththuput?"

¹⁹ Aieccuo othianthok tit itti, "Ngk-wakkakkaron itti pul ipoporot akaintha? Pul pella poporot Kapik kulluk akkoporot.

²⁰ Ngkwina lon ilattuli ilonthomat ila Kapik kethet oMuccai ili're itti, 'Kirrnni a'ro nul iari ittat, kirrnni okkwot pul, kirrnni omunye, kirrnni ere lon ngkarra, othianet oththe ana onne cik.'"

²¹ Aili i'rekat itti, "Mpokkothe lon ellrik appik amparthuk potteik."

²² Manakka oIeccuo poccikothe ila kwi'ret akwi'rekathok itti, "Lon laik lulukku langk-warthuk okkot, okette a'rupu appik ethet ul iella alp'rek cik akucci ana ngkwaka pa'rthan tothi'rot ittina aina akka amakothin."

²³ Manakka kwoccikothe elli kuakathe ka cannan akka kwokat pa'rthan priik.

²⁴ Aieccuo okathakathok akwi'rekat itti, "Lom-maththik itti pul ipapa'rthan pi'riko ingili ngoKapik. ²⁵ Anaruk lippappat itti thamla thakko icürük coipre nopul ipapa'rthan itti pi'riko ingili ngoKapik."

²⁶ Okkwion ithoccikothe lon len ipittat oIeccuo itti, "Amma ittina oththa akka'rettat?"

27 Aieccuo othiat tit itti, “Lon ilonthomat nopul iponyi lakannoka lonthomat noKapik.”

28 APoththuruc i'rekat oieccuo itti, “Onin thoththet na'rupu appik inomakothung.”

29 Aieccuo i'rekat kin itti, “Mpi'ret non lon ilaik icat, okkwi ipoththet nokaman kung ana nopari pung ana napangon ana naththan ana onnan ana nyukul nyung nti ilon longili ngoKapik 30 kwacco lon loppot iloporot nothikkoik thung cene inenni ana kwacco thikkoik thothupththuput noluput ilanthan.”

Oieccuo peret thio thung

(Maththa 20.17-19; Markkoc 10.32-34)

31 Aieccuo onekat ul wothothilettat wung iattul ana ikken ke'ra thocipit akwi'rekat kin itti, “Noccikot, oron thaik thaku'rot noka'ran koUruccelim ana lon appik ila ul wothernte lon loKapik ilerethe ukul wopul iponyi laik lathothakka icat. 32 Kwaik pathettat ul iakonnoka woIouth okin thaccirok ngngin ana ocungkok ana othukkothok nguk ana okkwekok ana okkwothok 33 ana noma'ri m'rapuruk kuroko nti ithio.”

34 Aul woieccuo iammakothok okinninakat lon len ila oieccuo paik peret akka lon len lokat lamu'ruttakothekin.

Oieccuo pittiet pul ipi'rimathe

(Maththa 20.29-34; Markkoc 10.46-52)

35 Annakka oieccuo pokat cik akweo noka'ran kAria, apul p'rek pokat cik pi'rimathe apikkoik nokuthut kokathar apipittot ul a'rupu.

³⁶ Manakka pul pen poccikothe aul okkot po're aeo apul pen ipittat itti, "Ngintha akkaik."

³⁷ Akin i'rekathok itti oIeccuo poNaccir paik paeo.

³⁸ Akwikkat cik akwakkakkaro oIeccuo itti, "Ukul woThauth, ipi thiak thin."

³⁹ Aul iokat cik tokit othirriekathok cik ai'rekathok itti, "Angkik," anaruk kwikkatheik akwokkot po're kannan itti, "Ukul woThauth, ipi thiak thin."

⁴⁰ OIeccuo poco'rathe akwi'rekat kin lon lon-thomat itti, "Nonakok cene." Anakka kwaan iccik koIeccuo aIeccuo i'rekat pul pen itti,
⁴¹ "Ngkwongothe itti mpakkinthung ngintha?"

Akwothiat tit itti, "Ili, mpongothe itti mpim-maik."

⁴² AIeccuo i'rekathok itti, "Thocokot lon loKapik nocikit cang thimmierung cik."

⁴³ Ncinang akwimmakat cik ana kwomakathe oIeccuo akwopirakanthet Kapik noka. Anakka ul appik wimmat akin ikkat cik akin opirane Kapik noka.

19

OIeccuo ana pul ipa'rntot akucci

¹ OIeccuo pi'rikathe noka'ran kAria ana kwokat cik akwokko ikathar cinang. ² Apul p'rek pokat cik ipa ili woul ia'rntot akucci poccot k'ran itti oCakka papa'rthan. ³ Kwokat cik pongothe itti kwimma itti oIeccuo okkwen anaruk kwokat cik puththut puththut akkwannimmakat cik akka ul wokat cik woppot. ⁴ Ittina akwollat tokit koIeccuo kwarrat topira popicit

itti akwina akka akwimma oIeccuo akka kwokat cik pathokko ikathar ken.

⁵ Manakka oIeccuo paat noka'ran ken akwoco'rat akwokathakat tothi'rot akwi'rekat oC-cakka itti, "A'rik uintan cokocokot mpaik paeo tuan thanang inenni." ⁶ Ittina akworpat accokot ana kwikkiekathe oIeccuo cik tuan nthopira noka kannan. ⁷ Aul appik immakat lon len ana wikkatheik a'rettakot itti oIeccuo peot tuan topul polon ilokithak akin othikkoik okin aththut.

⁸ Anaruk oCcakka poco'rathe kapik ana kwi'rekathe Ili itti, "Ili, occikothin ca'ri enci inenni mpaik pillo ia'rupu win app'rut anikket ul iella a'rupu cik, ana amma mpokwïethe opilin ana mpakkekoc ma'ri moco'rin arttot nan."

⁹ AIeccuo i'rekat itti, "Inenni tho'ret thaat tuan topul empi akka ook cakuruk ukul wAprein.

¹⁰ Akka ukul wopul iponyi waat itti wathokwan-tot ana o'ret ul iuratheik."

*Thokkwie lon kuru ncik thoul iareko iattul
(Maththa 25.14-30)*

¹¹ Anakka okin thokat cik akin occikot lon elli, kwappi'rekat kin lon okkwie kuru ncik akka kwokat cik akwokko napuththut iccik konoka'ran koUrucelime ana ul wikkatheik ai're itti ngili ngoKapik ngaik nganthan inenni.

¹² Kwi'rekathe itti, "Pul p'rek prik pokat cik peot noco'rong ciththan othakka itti akwothothikkiet-tatta ili irik akwantokkaprttako ntan tuan. ¹³ Ana kwakkarathe ul attul iarekinok akwikkekat kin akucci ana kwi'rekathe kin itti, 'Nocco akucci enni annorekie ananthan.'

¹⁴ Anaruk ul wung wokat w'rarak ana wothiathe ul noco'rong na kwaththothakka ili

athi're itti, 'Onin thannangkot itti pul empi pathakka ili win.'

¹⁵ Anaruk kwothakkakathe ili ana kwokkaprt-takathe ntan tuan ana kwothianthet ul ia kwappethet akucci itti warekie, akwokatha itti ngimpen akka okin thokkothe ngngin.

¹⁶ Apul porokit akkakat api'rekat itti, 'Pit pin, akucci wang ia ngkwethin warttakothe nan attul.'

¹⁷ Apit pung i'rekat itti, 'Ngkwokkothe lon loporot, pul iparekinin ipoporot. Ana inakka ngkwo'rumot nongere engngi ngoththeik papenang ia ngkwocot, ittina mpanekkethung ili wa'ran attul.'

¹⁸ Apilin akkakat akwi'rekat itti, 'Pit pin, akucci wung warttakothe nan ukuluk.'

¹⁹ Aili i'rekathok itti, 'Ngkwacco a'ran ukuluk akatha lon len.'

²⁰ Apilin p'rek akkakat akwi'rekat itti, 'Pit pin, akucci wang wei ia ngkwethin mpi'rikothe ikret.

²¹ Mpokat ponu n're nang akka ngkwommaththik pella thiak nocikit ngkwonnekot ul a'rupu iakannoka wang ana okio a'rupu ia ngkwannee.'

²² Apit othiat tit itti, 'Mpakkmang nti ilon lang, oung pul ipareko ipokithak. Ngkwina kicce itti mpommaththik pella thiak ana mpaaneko a'rupu iannoka win, ana mpakio a'rupu ia mpannee? ²³ Ngintha akka ngkwannorekiene akucci win othakka itti amma mpaat anoneko mpangken iparttakothe nan?'

²⁴ Ittina akwi'rekat okkwion ithokat cik akin aco'ro cinang itti, 'Nonekothok akucci annethet pul iponu akucci attul.'

²⁵ Akin i'rekat itti, 'Pit pän, pul empe're ponu attul.'

²⁶ Akwopakkekanthet kin tit itti, 'Mpi'ret non itti, Okkwi iponu woppot kwettat arttot nan anaruk okkwi ipellaik kwanekittat manna ia konu appik. ²⁷ Anaruk okin ithatho'rak thin ithannangkot itti mpaka ili wen, nona kin an-nongwot kin tokit kin cene.' "

Oleccuo pi'riko noka'ran koUrucelim karkko ili
(*Maththa 21.1-11; Markkoc 11.1-11; Iuanna 12.12-19*)

²⁸ Anakka oleccuo pi'ret lon elli, akwoingkat oku'rot noka'ran koUrucelim. ²⁹ Manakka akwokko ciki iccik konoka'ran koPeththppaci ana Peththania noco'rong coCeththun, kwothiathe ul we'ra nti iul iammakothok akwi'rekat kin itti, ³⁰ "Ngkonon noka'ran tokit kon ana amma anni'riko tit onon thathiot nge'ringka iotte ngi'rikakot ia pul pella parrothe tan. Nok'ro annonanin. ³¹ Amma pul p'rek pipit-tothe non itti, 'Onon thaik thak'ro nge'ringka akaintha?' anni'rethok itti, 'Ili akki'ret itti onin thathok'ro.' "

³² Okin ithokat thothilathe thoingkathe ana okin thatthiat ammakka oleccuo pi'rethekin.

³³ Anakka okin thokat cik akin ok'ro nge'ringka aul ionu nge'ringka ipittat kin itti, "Nthontha akka anok'ro nge'ringka?"

³⁴ Akin othiat tit itti, "Ili akki'ret itti onin thak'ro."

³⁵ Okin thonakanthet oleccuo nge'ringka iotte akin ipanthok eret cik tan akin arriekathok tan.

³⁶ Akka akweo, aul ikkat cik aipinthok eret cik ikathar akwonyaro nan.

³⁷ Anakka kwaan iccik koka'ran na kathar kokkot uo thaiken noco'rong coCeththun, ul iammakothok appik wikkatheik apirane Kapik noka nolon mpo're cittan appik ilommaththik ilakin thimmat ai're itti,

³⁸ "Athethietta oka noili iaik wanthan ngk'ran kalli."

"Athomicco oka tothi'rot ana thrik oine Kapik tothi'rot."

³⁹ Aul w'rek woPriccin i'rekat oIeccuo itti, "Pul ipangkene, othirriethe ul cik iammakothung wang akin angkoik."

⁴⁰ AIeccuo i'rekat itti, "Mpi'ret non amma okin akkangkot cik ana mothok moo."

OIeccuo paik poot pothok poUrucelim

⁴¹ Manakka akwokko iccik konoka'ran koU-ruccelim akwimmakat ka'ran akwikkat cik akwoot pothok ⁴² ana kwi'rekathe itti, "Lokithak kannan inenni itti ul wang womma itti ngimpen akkananekin thomicco. Anaruk inenni lamu'ruttakat nokit kon. ⁴³ Ma'ri mainenon amma tho'rak thang okkwot karrang naung ana nopothok poUrucelim ana ullukkinthet non cik na'ran appik ana okkwet non itho'rküt. ⁴⁴ Okin tho'rumathung akin okak'rathung cik nocapu, oung ana nyukul inyanon thaik. Ana okin thannokwento pothok pulukku topangken akka onon thomma ca'ri coKapik ica akainenon nan."

*Oleccuo pakicce ul iakette a'rupu noppa
toKapik*

*(Maththa 21.12-17; Markkoc 11.15-19; Iuanna
2.13-22)*

⁴⁵ Ittina oIeccuo pi'rikathe noppa toKapik ana kwikkatheik akwokiccet ul thapat iokat cik akettet a'rupu. ⁴⁶ Akwi'rekat ul itti, "Lokurrakot itti, 'Man min ma'rama' ana onon thothikkiet moul wothu'ran."

⁴⁷ Ana oIeccuo pikkatheik akwongkene noppa toKapik. Ana ul ittittik woul wonoppa toKapik ana ul iangkene lon lothonce'ret lon cik ana ul w'rek ittittik wikkatheik akwariccat kathar ika kin okkwothok ngngin ⁴⁸ anaruk okin thakinniat kathar ikakin okkot lon len ngngin akka ul waik woppot accikot lon ila oIeccuo pokat cik akwere.

20

*Ul ittittik wonoppa toKapik wipitto ngili
ngoleccuo*

(Maththa 21.23-27; Markkoc 11.27-33)

¹ Noca'ri c'rek caIeccuo pokat cik akwongkene ul noppa toKapik ana akwerene kin lon iloporot loKapik, ul ittittik woul wonoppa toKapik ana ul iangkene lon lothonce'ret lon cik nul ittittik akkakat naak ² ai'rekathok itti, "I'rethenin ngkwaik pangkene ngngili ngiatha ana oththa akkethung ngili ngen?"

³ AIeccuo omekat kin itti, "Mponu thipitto anipittot non. Ni'rethin, ⁴ mamuthie moIuanna mokat ntothi'rori ana amma okorronno oka ntothi'rot ana mokat nopul iponyi?"

⁵ Akin ikkat cik akin erettarne thellek akin i're itti, "Amma oron thi'ret itti, 'Ntothi'rot' ana kwi'retton itti, 'Onon thontha akka onon thannocokot lon lung nomikit?'" ⁶ Ana amma oron thi'ret itti, 'Nopul iponyi' ana ul appik wakinco oron mothok akka okin thoccokothe lon itti oLuanna pokat pul wothernte lon loKapik."

⁷ Ittina akin othianthok itti, "Onin thomma itti maat ngkeren."

⁸ Aieccuo i'rekat kin itti, "Mpakinni'ret non itti nngili ngiatha inga mpaik pakkot llon elli cakuruk."

*Thokkwie lon kuru ncik thoul iara
(Maththa 21.33–46; Markkoc 12.1–12)*

⁹ Akwikkat cik akwerene ul okkwie lon kuru ncik akwi're itti, "Pul p'rek peet maa apekat ul w'rek ara, amma okin thokiot akin ethok motte nan akwoingkat nokurtti imakkren akwoccat cik.

¹⁰ Anakka ca'ri caat cothokio apothiät pul pung iparekinok itti akin ethok a'rupu iakin thethok. Anaruk okin thokkwekathe pul iparekinok mono othiät ikathar nyaun ncürük. ¹¹ Akwothiät pul ipareko p'rek anaruk okin thokkwekathe ana okkiet thiak akin othiät nyaun ncürük.

Akwappothiät ap'rek akin ipiekathok ka kongo akin othiathok nyaun ncürük. ¹² Ana icci akwapothiät ap'rek ana okin thokkwekathe ana okin thorrekathe thapat nti ikkwon.

¹³ Ittina apul iponu kopon i'rekat itti, 'Ngintha akka anokkot? Mpathiöt ukul win ia mpongothe amma manna okin othiane cik.'

¹⁴ Anaruk akka okin thimmat ukul akin ikkat cik akin erethok. Akin i're itti, 'Ook empi ipapakkot na'rupu, ntrun okkwot atha'rthan thung

oka thonnon.’ ¹⁵ Ittina akin orrekathok thapat nti itharak akin okkwathok.

Pul iponu kopon pakkot kin ngintha?
¹⁶ Kwanthan ana kwathongwo ul iara kopon kokira komaa akwekat ul w'rek kopon ken.”

Anakka ul woccikothe elli, akin i'rekat itti, “Alon elli okorronno oka aththik.”

¹⁷ Aieccuo okathakat kin akwipittat kin lon itti, “Lon ilokurrakot itti, ‘Pothok ipa ul iuno w'rat ipen akkathakkat cillang.’

Lonu itti ngintha?

¹⁸ Okkwi ipapothe nopothok pen kwacotta kicce, anaruk okkwi ipa pothok papothe nan kwakak'arakot cik.”

¹⁹ Ul iangkene lon lothonce'ret lon cik ana ul ittittik woul wonoppa toKapik wokat wongothe itti waccokothok akka okin thinat itti thokkwie lon kuru ncik enthi thokat cik atheret kin. Anaruk okin thonat n're noul.

Tha'rntintheŧ oKkaiccer akucŧi
(Maththa 22.15–22; Markkoc 12.13–17)

²⁰ Anakka okin thokat cik akin occot kit naak, okin thoŧiäthe ul iattet lon ainok akin innikot itti okin ul ioporot othakka itti akin i'rak llon ila akwi're othakka itti akin occokiethok nili nonoththok. ²¹ Ittina aul iattet lon ipittathok itti, “Pul ipangkene, onin thina itti oung pul ipi're lon ilaik icat ana ongekene lon iloco'rotheik ana ngkwakannokkwine ul kunu ncik anaruk ngkwangkene lon loKapik ammakka kongothe.

²² Loco'rotheik itti onin tha'rntintheit oKkaicer akucci ana amma okorronno oka menik loco'rotheiki?"

²³ Anaruk oIeccuo pinakathe lon len ana kwi'rekathekin itti, ²⁴ "Nantokenen thinar. Purrut poththa empi ana k'ran engki nokakucci?"

²⁵ Akin othiantok tit itti, "PoKkaicer."

Ittina aIeccuo i'rekat kin itti, "Nethet oKkaicer a'rupu woKkaicer ana woKapik annethet Kapik."

²⁶ Okin thommakathe occokothok tokit koul nolon ila kwi'ret, ittina okin thangkatheik ana oprttakot tit nolon ila kwothiotherit ngingin.

Thuroko thoul iillet

(Maththa 22.23-33; Markkoc 12.18-27)

²⁷ Aul w'rek woCcathukkin iokat ame itti pul pakannuroko nti ithio akkakanthet oIeccuo akin athipittothok lon len. ²⁸ Akin ipittathok itti, "Pul ipangkene, oMucca pokurrinet nin itti amma pul ipocura piot nopari appella nyukul ana lonu itti opang papakkot nopari pen akwokwonine opang nyukul. ²⁹ Ana inenni ul w'rek wokot cik we're'rapuruk woththan pulukku, opaththi ponothon piathe nnopari appellat nyukul cik. ³⁰ Apang p'rek opakkat nopari apappiat cakuruk akwella nyukul cik. ³¹ Apang p'rek appopakkat nan menik akwiat cakuruk alon len okakat nakin ithokat the're'rapuruk. Okin thillekathe appik akin thella nyukul. ³² Ana p'rin apul ipopari iat cakuruk. ³³ Ana amma ca'ri caat ica ul uroko nti ithio, pari paka poththa? Akka ul wopakkothe nan we're'rapuruk."

³⁴ Aleccuo othiat tit itti, “Thittetto thoul iaik nocapu cene. ³⁵ Anaruk ul iekkot nan itti wuroko nti ithio ana ikkoik thupuththuput wonu itti wannitta ana ipo ari. ³⁶ Akka okin thikkoik ere u'rupa wothothilettat woKapik ana okin thannille ana okin nyukul nyoKapik akka okin thuroko nti ithio. ³⁷ Ana nolon lopira ipokat cik apok'ro, lon lung oMucca ngka kung pi'ret itti ul illet wuroko nti ithio attang akka kwakkarot Ili itti, ‘Kapik kAprein ana Kapik koIccaak ana Kapik koIakup.’ ³⁸ Lon elli lonu lon itti Kapik kothikkoik kakannoka kothio akka okin appik thaik thikkoik iaak.”

³⁹ Aul w'rek iangkene lon lothoce'ret lon cik othiat tit itti, “Pul ipangkene, ngkwi'ret lon papenang.” ⁴⁰ Apul ellakat ipappipittothok lon l'rek.

OMiccie ana oThauth
(*Maththa 22.41–46; Markkoc 12.35–37*)

⁴¹ Ittina aleccuo i'rekat kin itti, “Ana tat akka akin i'rene itti oMiccie ukul woThauth? ⁴² OThauth ngka kung pi'ret iatham woMocumur itti,

‘Ili Kapik wi'rethe Ili win itti,
Ikkik thokkun wothothari win.

⁴³ Puccuk analkanthung tho'rak thang anocukkarat kin cik.’

⁴⁴ OThauth pakkarat oMiccie itti, ‘Ili win’ ana tat akka akwoka ukul wung?”

No'rumoik noul iangkene lon lothonce'ret lon cik

(Maththa 23.1-36; Markkoc 12.38-40; Lukka 11.37-54)

⁴⁵ Anakka ul appik wokat cik accikot lon, aIeccuo i'rekat ul iammakothok tokit koul itti, ⁴⁶ "No'rumoik noul iangkene lon lothonce'ret lon cik. Okin thongothe itti okin thanyarō neret iukwirukwit ana omiccako keccuk ana ikkoik na'ran iathiakine cik nomuththun ma'rama ana nokamuthe. ⁴⁷ Okin thi'rikikko ikaman komurama akin onneko a'rupu wen appik, ana a'ra nga'rama ngukwit. Ul ammakka enni wakkmako thakkmako thokithak kannan."

21

Thethet thocuruma icopari

(Markkoc 12.41-44)

¹ Aieccuo pokat cik akwikkoik akwokathacce ul iannekket akucci noka'ran kotha'rntot akucci ia'rntakinthet ngre ngonoppā toKapik, ul ia'rthan woppot wonekkekethe akucci woppot.

² Kwimmakathe pul p'rek ipopari ipokat curuma apponekkethe akucci we'ra wokit. ³ Aieccuo i'rekat itti, "Mpi'ret non lon ilaik icat, curuma enci icopari akkonekkethe akucci woppot noul enni appik. ⁴ Ul enni appik wonekkethe a'rupu nna'rupu iakin thonu woppot anaruk curuma enci icopari conekkethe nna'rupu ia kwonat appik itti kwikkoik ngngin."

Oieccuo peret thokittako thonoppā toKapik

(Maththa 24.1-2; Markkoc 13.1-2)

⁵ Ul iammakothok w'rek wikkatheik aeret thire thomothok imuntat ntupan toKapik ana thire then ithokkattathe nna'rupu iettathe Kapik. Anaruk oIeccuo pi'rekathekin itti, ⁶ “Mothok emmi appik imanon okathacce, ca'ri c'rek canthan canon okinnimma pothok pulukku pokwentakot topangken, müntat nocapu mulumuluk appik.”

*A'rupu iakaik aIeccuo parthuk okkaprttako
(Maththa 24.3-14; Markkoc 13.3-13)*

⁷ Akin ipittathok itti, “Lon len lakaik acintha? Ana lon liatha ilakene itti lon elli lathokaik?”

⁸ Akwothianthet kin tit itti, “No'rumoik anokorronno occikinthet ul w'rek itti wammikkot non aththik, akka ul woppot wanthan ngk'ran kin akin i're itti, ‘Oun oMiccie,’ ana ‘Noca'ri cen akkwaik akwokko apuththuththut,’ anaruk annokorronno occikot kin. ⁹ Ana amma onon thoccikothe lon lotho'rak ana aul othattarorit, nokorronno ipo n're. Lon elli lonu itti lakaik cittokit, anaruk thocothakot thakorronno oka itti thakko napuththut.”

¹⁰ Ittina kwi'rekathekin itti, “Ul wonomo'rong wathattarorit, ana ngili ngothattarorit. ¹¹ Capu ca'rıntittako ncik ana ti takaik ana mio makaik na'ran appik ammakka waik ana a'rupu w'rek ipietto n're ana lon lotho'rarot cik ana lon ilakene lon lanthan ntothi'rot.

¹² Anaruk alon elli larthuk othakka appik, okin thikko thaccicokot non ana okkiet non thiak. Okin thanekot non nomuththun ma'rama ana ikorrkkor, ana onon thanekittat tokit konili ana elli appik nti ilon lin. ¹³ Elli lakkattat othakka itti anon okanekin lon ilakin imma ngkit. ¹⁴ Anaruk

nokorronno ipo n're itti nthathi're tat amma anothinthet kin ilon. ¹⁵ Akka mpethet non lon ana thinaik nti ima othakka itti amma annerene ul i'rat non akin occikot lon lon. ¹⁶ Ana oththen ana opangkangon ana ul woku'ri kon ana opuruko pangon thakettenon ana opilingon thangutta. ¹⁷ Ul appik w'ranon nti ilon lin. ¹⁸ Anaruk kwan kella ikapot cik nocapu nnoca. ¹⁹ Ngonocokot mikit tangattang, ana onon tha'ret ka kon."

*Oieccuo peret thokittako thoUruccelim
(Maththa 24.15-21; Markkoc 13.14-19)*

²⁰ "Amma onon thimmat ul irro wokkwethe ka'ran koUruccelim itho'rkit onon thina itti thokittakoik then thakko napuththut. ²¹ Ittina ul iaik noththok poIouthia akin ollo oku'rot tomo'rong ana ul iaik icarak coman akin oppot thapat ana okkwion ithaik thapat nti icarak coman akin o'runkot. ²² Akka ca'ri enci cothakkma othakka itti alon othakka appik ilokurrakot itti lathoka. ²³ Laka lokitheththak noul iari ioppeppetthe ana ul iakie noma'ri men. Ul wareko thiak kannan noththok akka Kapik kua ka koul. ²⁴ Opilingon thanguttat itho'rak ana opilingon ni'rittang iukwit wukwit ana opilingon onekittat ikorrkkor nomo'rong appik. Ka'ran koUruccelim kakak'rakot cik nul iakonoka woIouth puccuk ama'ri moul iakannoka woIouth omttakat."

*Thao thokkul wopul iponyi
(Maththa 24.29-31; Markkoc 13.24-27)*

²⁵ "Lon ilakene lon lakaik lakkattanthet cingki ana kwanok ana mothot. Ana nocapu nomo'rong appik ul wannoka woporot ana opellene okin

thocçikothe po're ponok inapangka inittinittik.
²⁶ Ul appik wipo n're nen kannan nolon ilaik lanthan nocapu ncik appik akka tothi'rot taik ta'rıntittako ncik appik.

²⁷ Noca'ri cen ukul wopul iponyi wimmakot inuththe anthan mpu'ran ana nthrik. ²⁸ Ana amma lon ellrik uroko ncik, nonthot ma kapik ana okwiccekot cik akka tho'rettat thon therik thakko napuththut."

Thongkene thopira popicıt

(Maththa 24.32-35; Markkoc 13.28-31)

²⁹ Kwi'rekathekin lon elli nthokkwie kuru ncik itti, "Nantokatha pira popicıt ana kira k'rek appik. ³⁰ Amma onon thimmat natha nen aniat, onon thina itti karran kakko napuththut. ³¹ Ngkathar engki amma onon imma lon elli alokkattat anon ina nan itti ngili ngoKapik ngakko napuththut.

³² Mpi'ret non lon ilaik icat itti, lon elli appik lathakka aul wonoma'ri emmi wannille. ³³ Tothi'rot ana capu thintat cik anaruk lon lin lakorronno intat cik aththik."

Oieccuo perene ul iammakothok akuccekot cik

³⁴ "No'rumoik akka anon okorronno i'rikikke kakon ilon lonocapu ammakka itti thikko ngapak ana thirro mikıt nti ikarak nolon lothikkoik akka ca'ri canthan anon thomma nan. ³⁵ Akka caine ul appik iaik nocapu. ³⁶ No'rumoik, na'ra nga'rama othakka itti anon olukkot tho'rarot cik tholon ilaik lanthan ana annina akka annoco'ro tokıt kokkul wopul iponyi."

³⁷ Oieccuo pokat cik akwongkene noppan toKapik appinappin ana cipin akwoku'rot

noco'rong coCeththun ³⁸ ana ul waukkathe
ngng'rimak athoccikot thongkene thung noppan
toKapik.

22

OIoutha pangkot itti kwakero oIeccuo

(Maththa 26.1-5, 14-16; Markkoc 14.1-2, 10-11; Iuanna 11.45-53)

¹ Akka ca'ri caat cokamuthe karrakith iella mü'rükül tit ikoccot k'ran itti Kamuthe koThaurrot kaman k'rek cik kokat akokko napuththut, ² ul ittittik woul wonoppan toKapik ana ul iangkene lon lothonce'ret lon cik wikkatheik akwariccat kathar ikakin okkwot oIeccuo ngngin. Anaruk okin thokat akin opellene ul.

³ Ittina pul pothopulut pi'rikathe iaIoutha ipocot k'ran itti Icikkariuththi opilin nti iul wung wothothilettat iattul ana ikken ke'ra. ⁴ Ana oIoutha poingkanthet ul ittittik woul wonoppan toKapik ana okin ithangwot tupan ta'rama ana okin therekathe itti tat akka akwokerot kin oIeccuo. ⁵ Okin thopirakathe noka ana okin thongakathe itti okin thethok akucci. ⁶ AIoutha angkat ana kwikkatheik akwokwncot ca'ri ica akwocokiet oIeccuo nili ngngin aul ella woppot.

Thu'rit thoThaurrot kaman k'rek cik

(Maththa 26.17-25; Markkoc 14.12-21; Iuanna 13.21-30)

⁷ Ittina aca'ri akkakat cokamuthe karrakith iella mü'rükül tit ana thokkwinthet Kapik thungkat thokamuthe koThaurrot kaman k'rek cik. ⁸ OIeccuo pothiathe oPoththuruc ana

oIuanna akwi'rekat kin itti, “Ngkonon anothokkot cik na aron otho'rkot thu'rit thokamuthe koThaurrot kaman k'rek cik.”

⁹ Akin ipittathok itti, “Ngkwongothe itti onin thathokkot cik kartha?”

¹⁰ Aleccuo othianthet kin itti, “Ngkonon noka'ran koUruccelim ana onon thacurot ipul ipocura aponneko ng'ri ngkummuk annomakothok iman na akwi'riko. ¹¹ Anni'ret pul pen itti, ‘Pul ipangkene pi'ret itti, Man maik kartha ima anatho'rkot thu'rit thokamuthe koThaurrot kaman k'rek cik tit onin oul iammakothin?’ ¹² Ana kwakenenon man maik to'ra mittik mokuccettathe cik kicce, annokkot cik naron atho'rkot thu'rit thokamuthe kothaurrot kaman k'rek cik.”

¹³ Okin thoiingathe akin othiat lon ammakka oIeccuo papperenet kin ana okin thokkathe cik papenang ana okin thokkathe thu'rit thokamuthe koThaurrot kaman k'rek cik.

Thu'rit thoIli thocipin

(Maththa 26.26-30; Markkoc 14.22-26; 1 Kurunthuc 11.23-25)

¹⁴ Anakka cik caat cotho'rko thu'rit aleccuo ana ul wung wothelettat ikkat cik othingkarakot iriki wonyaun nyothokure ammrththakot kokuppu'rung kothu'rit. ¹⁵ Ana oIeccuo pi'rekathekin itti, “Mpongothe itti mpa'rko thu'rit enthi thokamuthe koThaurrot kaman k'rek cik unaththungon amparthuk occokot thiak. ¹⁶ Akka mpi'ret non itti mpakanappo'rko thu'rit unaththungon attang puccuk angili ngoKapik akkakat.”

¹⁷ Ittina aleccuo onekat keththe'ret akwopiriekat Kapik noka, akwi'rekat kin itti,

“Noneko annikko ikkettot appik. ¹⁸ Akka mpi'ret non itti mpakannappikko ngapak engki attang nciki inenni puccuk angili ngoKapik akkakat.”

¹⁹ Ana kwonekathe arrakith akwopiriekat Kapik noka akwomithat tit akwekat kin akwi'rekat kin itti, “Ka kin engki ikettathenon nokkot menik annokwarttikothin.”

²⁰ Anakka okin tho'rkot cik akwonekat keththe'ret akwi'rekat itti, “Keththe'ret engki kothonekkt lon cik ilie ila Kapik kokkothe ngüccük ngin inguntanthe non cik. ²¹ Anaruk okkwi ipaik pathokerothin ul onin thaik tha'rko thu'rit inaththe'ra nokuppu'rung kulukku. ²² Ukul wopul iponyi wio ammakka Kapik konekkenthok cik anaruk angkre nopul ipakerok.” ²³ Okin thikkatheik akin ipittarot itti oththa akkikko pakkot lon elli.

Oththa akkrük

²⁴ Akin ikkat cik akin a'retto cakuruk itti, “Oththa akkaka prik nti iaron?” ²⁵ Aleccuo i'rekat kin itti, “Nili noul iakonnoka woIouth narekie ul thiak thiak anaruk ul warthuk wakkarokin itti ul ioporot. ²⁶ Anaruk nokorronno oka menik, pul iprik ntianon apoka ere ukul iotteik ana okkwi iponu lon lonoththok ikkun paka ere pul iparekine ul. ²⁷ Oththa akrik, okkwi ipikkoik nokuppu'rung aul iareko orekinok ana amma okorronno oka menik okkwi iparekine ul akriki? Onon thi're itti okkwi ipikkoik nokuppu'rung akrik anaruk mpei cene itho'rküt thon ammakka pul iparekinenon.

²⁸ Onon thoco'rothin appik akka mpokat ilon ilokithak. ²⁹ Ana ammakka ongappa pethin

ngili ikkun mpakkinthet non cakuruk ammakka kwokkinthin ³⁰ ittina oron tha'rkoik ana ikkoik uraththungon nokuppu'rung kin kothu'rit ingili ngngin ana annikkoik norrok annakma ul mothok mothok moul woIccereil iattul ana ikken ke'ra."

OPoththuruc pacukko naIeccuo

(Maththa 26.31-35; Markkoc 14.27-31; Iuanna 13.36-38)

³¹ Aleccuo i'rekat oCamaan itti, "Camaan, antocikot, pul pothopulut pipittot itti penekkenon appik ere pul amma apire mil nti nartta. ³² Anaruk mpa'ranung nga'rama itti athocokot lon loKapik nocikit cang okorronno apot cik ana amma ngkwokkaprttakot ntan apo'rie opangkangon than ithocokot lon loKapik nocikit."

³³ Anaruk oCamaan pothianthet oIeccuo tit itti, "Orit thaeo ikorrkkor iraththe'ra ana iththille iraththe'ra cakuruk."

³⁴ Aleccuo othianthok tit itti, "Poththuruc, mpi'rethung lon ilaik icat itti, athak'ruk tharthuk oo ngko'ra engi ngkwacukkwo nolon itti ngkwomman ma'ri m'rapuruk."

Okuccekinthet ma'ri cik imokithak

³⁵ Ittina aleccuo ipittat itti, "Katha akka mpothiothenon nokurtti anthellat a'ruk wakucci ana a'ruk wokurtti ana wok iracok, onon nthonat thiak tha'rupu w'reki?"

Akin othiat tit itti, "Onin thellat thiak tha'rupu w'rek."

³⁶ Aleccuo i'rekat kin itti, "Ana inenni okkwi iponu ka'ruk kakucci akwoneko ana manna

ka'ruk kokurtti akwoneko ana okkwi ipella ki'rittang ikukwit akwarot kret kung icekere akwokero k'rittang. ³⁷ Lokurrakot itti, 'Kwokut-takothe nul iokithak.' Ana mpi'rethenon itti lakaik naun ilokurrakot ana icat ilokurrakot ilerethin laik lathakka."

³⁸ Aul iammakothok i'rekat itti, "Okatha cene Ili, i'rittang wei cene we'ra."

Aleccuo othianthet kin itti, "Lekkot."

Oleccuo pa'rat nga'rama noco'rong coCeththun

(Maththa 26.36-46; Markkoc 14.32-42)

³⁹ Aleccuo oingkat noco'rong coCeththun ammakka akwokkettet appinappin aul iammakothok omakathok. ⁴⁰ Anakka kweot noka'ran ken akwi'rekat kin itti, "Na'ra nga'rama akka anon apot ilon lothenekketta tholon ilokithak."

⁴¹ Akwoththekat nakin akwoingat ciththan papotteik akweekat ungu nci akwa'rakat nga'rama itti, ⁴² "Ngappa, amma ngkwongothe, onekothin thocokot thiak enthi, annoka ammakka mpongothe, anaruk ammakka ngkwongothe."

⁴³ U'rupa wothothilettat woKapik wakkakanthok ntothi'rot ana wikkatheik amerekethok itti kwapo'rathan.

⁴⁴ Oleccuo pokat nothiak akwa'rakat nga'rama kannan ana nguttetta ngikkatheik angoththopot cik nocapu nti iaak ere ngüccük.

⁴⁵ Anakka kurokot nna'rama kwopakkan-thet ul iammakothok ana kwaththiat akin thaik inthe akka okin thokat ithiak cakuruk.

⁴⁶ Anakka oIeccuo poinet kin akwipittat kin itti, “Ngintha akka annoine inthe? Nuroko anna'ra nga'rama othakka itti anon okkorronno apot ilon lothenekketta tholon ilokithak.”

OIeccuo poccokittathe

(Maththa 26.47–56; Markkoc 14.43–50; Iuanna 18.3–11)

⁴⁷ Manakka oIeccuo pokat cik akkwarthuk paik perenekin, acungkut coul akkakat ana pul ipoccot k'ran itti oIoutha nti iul wung iattul ana ikken ke'ra akkwonat kin akwothakkarat iccik koIeccuo akwomiccathok i'rikothok toperere.

⁴⁸ Anaruk oIeccuo pipittathok itti, “Ioutha, ngk-waat itti ngkwathokerot nili ukul wopul iponyi nthomicco i'rikarot topererei?”

⁴⁹ Anakka ul iammakot oIeccuo wimmat lon ilaik lathokkattat, akin ipittat oIeccuo itti, “Ili, intha'rumot kin ni'rittangi?” ⁵⁰ Apilin nti iul iammakothok okiat kunu cik kopul iparekine pul iprik ponoppa toKapik kothokkun wothonhari.

⁵¹ Anaruk oIeccuo pi'rekathekin itti, “Lekkot p'r'in.” Ana kwothantathe kunu nukun wung ana kopakkatherit koporot.

⁵² Ittina aIeccuo i'rekat ul ittittik woul wonoppa toKapik ana okin ithangwot cik noppa toKapik ana ul ittittik woul iainok itti, “Nthame itti oun pul ipaurrot lon cik akka onon thainin mmu'rang ana i'rittang iukwit wukwiri?”

⁵³ Mpokat cik unaththungon appinappin noppa toKapik ana anthakannocokothin. Anaruk ca'ri con enci ica annokkot lon ilanon thongothe itti onon thakkot amma pul pothopulut okkwi iponu pu'ran poi'r'imak paik ire.”

OPoththuruc pi're itti kwomma oIeccuo
(Maththa 26.57-58, 69-75; Markkoc 14.53-54,
66-72; Iuanna 18.12-18, 25-27)

⁵⁴ Ittina akin occokathok akin onekathok tuan topul iprik ponoppan toKapik. OPoththuruc pokat cik akwommakot kin nciththan. ⁵⁵ Anaruk akka okin thokwothe thik noca'rakat akin ikot oPoththuruc pikkatheik iakin. ⁵⁶ Aukul ioi're iareko immakat oPoththuruc akwikot thik akwokathakathok kicce ai'rekat itti, "Pul empi pokat cik akin oIeccuo."

⁵⁷ Anaruk kwocukkathe nan akwi'ret itti, "Ukul, mpommak."

⁵⁸ Papotteik apul p'rek appi'rekat oPoththuruc itti, "Ngkwokat cik onaththe'ra."

APoththuruc i'rekat itti, "Pul empi okonnoka oun."

⁵⁹ Ana okin thokkothe cingki culukku apul p'rek appi'rekat itti, "Kwokat cik okin oIeccuo akka ook pul ponoul woCelil."

⁶⁰ APoththuruc i'rekat itti, "Mpomma lon ilanon thaik theret" ana akka kwokat cik akwere, athak'ruk oat. ⁶¹ Ittina alli oprttakat cik akathakat oPoththuruc. Menik aPoththuruc okwarikat lon ila Ili wokat wi'rethok itti, "Inenni athak'ruk tharthuk oo, ngkwacukkwo nolon itti ngkwinan ma'ri m'rapuruk." ⁶² APoththuruc oingkat thapat akwikkat cik akwoo puccuk.

Makkma moIeccuo
(Maththa 26.67-68; Markkoc 14.65)

⁶³ Ana ul iokat cik angwot oIeccuo wikkatheik akkothok ngure ngngin ana akkwekok. ⁶⁴ Akin i'rikikkothok kret toca akin nthipittothok itti,

“Oththa akkokkworung?” ⁶⁵ Ana okin ocungkok ngk'ret koppot.

*Oleccuo paik tokit koPilaththoc ana oIruthuc
(Maththa 26.59–66; Markkoc 14.55–64; Iuanna
18.19–24)*

⁶⁶ Ana ngorrot ngi'rimak aul ittittik woul wonoppa toKapik ana ul iangkene lon lothonce'ret lon cik ikkat cik tothun aleccuo onekittakat tokit ken. ⁶⁷ Akin ipittat oleccuo itti, “I'rethenin amma oung oMicce?”

Aleccuo othianthet kin tit itti, “Amma mpi'rethenon ana onon thannocikot lon lin. ⁶⁸ Ana amma mpipittothenon lon ana onon thannothinthin tit. ⁶⁹ Ana nci inenni ukul wopul iponyi wikkoik noprrok thokkun wothonari woKapik ikrük.”

⁷⁰ Akin appik ipittathok itti, “Oung ukul woKapiki?”

Akwothiat tit itti, “Loco'rotheik ilanon thi'ret itti oun ukul woKapik.”

⁷¹ Ittina akin i'rekat itti, “Oron thongothe ul immat lon ngkit arttot nan wothentha? Oron thocikothe nothu're thung.”

23

*Oleccuo ponakittat tokit koPilaththoc
(Maththa 27.1–2, 11–14; Markkoc 15.1–5;
Iuanna 18.28–38)*

¹ Ittina aul iokat cik appik urokot kapik anekanthet oPilaththoc oleccuo. ² Ana okin thikkatheik akin oruket oleccuo lon itti, “Onin thiothe pul empi apongkene ul lon ilakorronnokin akin okkot lon moloko. Kwi'ret itti okin

thannocikot lon lonili, ana akwomet ul itti okin thakorronno a'rintintheŧ oKkaiccer akucchi ana akwi'ret ka kung itti ook oMicchie Ili wonnon."

³ Ittina aPilaththoc ipittathok itti, "Oung ili woIouthi?"

Aleccuo othiat tit itti, "Laik ammakka ngkwi'ret."

⁴ Ittina aPilaththoc i'rekat ul woul wonoppan toKapik ana ul appik akwi'rekat kin itti, "Mpanniot lon l'rek ilamoloko ila anoruket pul empi ngngin." ⁵ Anaruk okin thikkatheik akin ere itti, "Kwokat cik akwongkene ana ereket ul nthongkene thung noththok poIouthia appik. Kwoku'ret ncik nnoththok poCelil ana inenni kwei paat ci noththok cene cakuruk."

⁶ Manakka oPilaththoc poccikothe elli akwipittat itti, "Pul empi ponoththok poCelili?" ⁷ Anakka kwinat itti oIeccuo ponoththok poCelil ipa Ili oIruthuc ponat ikkun, kwothiantheŧ oIruthuc oIeccuo.

⁸ Manakka oIruthuc pimmat oIeccuo, akwopirakat noka akka kwappongothe nci nan itti kwimmak akka kwappoccikothe lon ilerettathok ana kwokat pongothe itti kwimma lon ilommaththik alokkattat nti ikkun wung. ⁹ Akwikkat cik akwipittot oIeccuo lon loppot anaruk oIeccuo pannothianthok tit. ¹⁰ Ul ittittik woul wonoppan toKapik ana ul iangkene lon lothonce'ret lon cik wokat cik aco'ro aerethok ana orukwethok lon ilokithak. ¹¹ Ittina oIruthuc ana ul wung irro thikkatheik akin oco'ro ana okkothok ngure ngngin ana occirok ngngin. Okin thakiekathok kret kopeththere akin othianthok oPilaththoc. ¹² Ca'ri

cen oIruthuc okin oPilaththoc thokkwathe thuruko akka tokit okin thatth'rarot.

Oieccuo pakkmakot itti kwakkuttat

(Maththa 27.15–26; Markkoc 15.6–15; Iuanna 18.39–19.16)

¹³ APilaththoc akkarat ul ittittik woul wonopan toKapik ana nili ana ul appik. ¹⁴ Ana kwi'rekathekin itti, “Onon thonanin pul empi itti paik pangkene ul moloko ana mpipittothok lon tokit kon ana mpanniot lon l'rek ilaik moloko naak. ¹⁵ OIruthuc manna panniat lon naak ana kwokkaprntinet ton ngok ntan ana ammakka onon thimmat itti pul empi pannokkot lon ilamoloko ilekko nan itti kwakkuttat. ¹⁶ Ana ittina mpakkwekok akwelikkako.” ¹⁷ [Akka kwokat ponu itti kwelikkinekin pul pulukku nti ikorrkor nokamuthe koThaurrot kaman k'rek cik.]

¹⁸ Okin thi'rekathe mpo're pulukku itti, “Okkwothok, alikkinenin oParapac.”

¹⁹ (OParapac papponekkettathe ikorrkor akka kwenekket itti kwereket ul noka'ran koUruccelim ana okkwot pul.)

²⁰ OPilaththoc pokat pongothe itti kwapelikko oieccuo, akwapperekanthet kin. ²¹ Anaruk okin thikkatheik akin okkot po're akin i're itti, “Nokkwethok nothapak, nokkwethok nothapak.”

²² Akwappipittat kin othikkie ma'ri m'rapuruk opakenthet kin itti, “Akaintha? Ngintha akka pul empi pokkotho akka mpakinniot lon ila anakmak nngin mpakkwekok anelikkok.”

²³ Anaruk ul wikkatheik akkot po're itti pakkuttat nothapak apo're pen alkat lon ilokat cik. ²⁴ Ittina aPilaththoc okkanthet kin ammakka okin thongothe. ²⁵ Ana kwelikkanthet kin pul ipakin thaththongothe itti pelikkako nti ikor-rkkor ipappokkothe camutta ana okkwot pul ana kwokkathe naleccuo ilakin thongothe.

Thokkwettat thoIeccuo nothapak

(Maththa 27.32-44; Markkoc 15.21-32; Iuanna 19.17-27)

²⁶ Anakka okin thokat cik akin eo oIeccuo ngngin akin iat oCcamaan ponoka'ran koKirin akkwokat cik akwao ntopon ana okin thonekiekathok thapak akwomakot oIeccuo nthoceken.

²⁷ Acungkut coul cokat acomakothok ana ul iari wokat cik akkwe tomikit aoot oIeccuo. ²⁸ Aieccuo oprttakat kin akwi'rekat kin itti, "Nyukul inyari nyonoka'ran koUruccelim, noko-rronno oothin anaruk noot ka kon ana nyukul nyon. ²⁹ Akka ca'ri c'rek cao canon i're itti, 'Loporot noul iaucung ana kimmik ikannakatta nan.' ³⁰ Ittina

'Okin thi'ret mo'rong itti, No'rot nin cik!

ana i'ret lorokokkok itti, No'rumot nin.'

³¹ Amma ul okkot lon elli acik coporot, okin thakkot taththa amma cik cokithak?"

³² Aul w'rek we'ra cakuruk onekittakat okin oIeccuo ionat thu'ran akin othokkwettat nolapak. ³³ Anakka okin thaat noka'ran ikoc-cot k'ran itti k'rntil koca nakin thokkwethe oIeccuo nothapak okin oul ie'ra ionat thu'ran ap'rek nthokkun wothonhari ana p'rek nthokkun

wothokure. ³⁴ OIeccuo pi'rekathe itti, “Ngappa, occikinthet kin lon ilokithak akka okin thomma ilakin thaik thakkot.” Ana ul irro willillathe ired nthokkwo mo'rio.

³⁵ Aul ikkat cik akathaccek anili nen ikkat cik anoccirok ngngin. Akin i're itti, “Kwo'rethe ul w'rek, akwo'ret ka kung amma ook oMiccie ipa Kapik kakkarot.”

³⁶ Aul irro cakuruk akkakat ana wikkathe cik akkothok ngure ngngin ana wekathok ngapak ingor. ³⁷ Akin i're itti, “Amma oung ili woIouth, o'rethe ka kang.”

³⁸ Ana lon lokat cik lokurrakot to'ra wung nokuruthut itti, ILI ENNI WOUL WOIOUTH. ³⁹ Apul p'rek nti iul wothu'ran ipokkwettathe nothapak ocungkat oIeccuo itti, “O'rethe ka kang a'rekat nän cakuruk amma oung oMiccie.”

⁴⁰ Anaruk apilin othirriekathok cik itti, “Ngk-wannopellene Kapiki? Unthaik ilon lulukku.

⁴¹ Orit thoccot lon moloko nti ilon lorit ilarit thokkothe anaruk pul empi pella lon ila kwokkothe ila moloko.” ⁴² Ittina akwi'rekat oIeccuo itti, “Okwarikothin amma ai'riko ingili.”

⁴³ AIeccuo othianthok tit itti, “Mpi'rethung ilaik icat itti orit thaka iraththe'ra tothi'rot inenni.”

Thio thoIeccuo
(*Maththa 27.45-56; Markkoc 15.33-41; Iuanna 19.28-30*)

⁴⁴ Ana cingki cokat cuat ippa angirimak o'rat cik nocapu puccuk mono acingki okkat c'rapuruk cipin. ⁴⁵ Acingki o'ruttakat angirimak o'rat cik. Akret ikapettoik ikokat cik aka'riko

noppan toKapik akillakat tit mprak we'ra.
⁴⁶ Aleccuo akkarat mpo're cittan itti, “Ngappa, mpanekket kanang kin kothikkoik inyaun nyang.” Akwothukwat cokwa akwiat.

⁴⁷ Anakka ili woul arrial ukuluk irro wimmat lon ilokkattathe akwopirakanthet Kapik noka ai'rekat itti, “Īcat pul empi pellat lon cik il-amoloko.” ⁴⁸ Menik ul appik ia'rantakothe itti wimma lon ilokat cik wikkatheik akkwe tomikit men ana okin thoiŋkathē. ⁴⁹ Anaruk okkwion appik ithinarok ana ul iari iom-makothok noththok poCelil woco'rathe ciththan akathacce lon len.

Thocikkako thoIeccuo
 (Maththa 27.57–61; Markkoc 15.42–47; Iuanna 19.38–42)

⁵⁰ Pul p'rek pokat cik poccot k'ran itti oIuccip poRami ipokat iprik icuththun coul woIouth ittittik, pul ipoporot tokit koKapik ⁵¹ ana kwokat pannangkot lon ila nili nonocuththun nokat ni'ret ana lon ilakin thokkothe. Kwokat ponoka'ran koIouthia ikoccot k'ran itti Rami. Kwokat cik akwo'rikot ngili ngoKapik. ⁵² Kwoiŋkanthet oPilaththoc akwipittathok kumi koIeccuo. ⁵³ Ittina akwonekat kumi akwo'remethekat ngkret ika ul ocikkarko ngngin akwothocikkat ippu ipa'ranthang pocu'rol pie pannocikkako pul p'rek tit. ⁵⁴ Okat noca'ri cothokuccekot cik ca'ri caCcepith cokat napuththut caik cao.

⁵⁵ Ana ul iari iommakothe oIeccuo nnoththok poCelil womakathe oIuccip akin immakat tupu

ana tat akka kumi koIeccuo kicettatheik tit.
⁵⁶ Ittina okin thoingkathe tuan akin othocikitto
 ngaak cik ana amutha akin atho'ro kumi koIec-
 cuo anaruk okin thikkatheik tuan noca'ri caC-
 cepith ammakka thathuma thaik itti pul pella
 ipareko noca'ri caCcepith.

24

Thuroko thoIeccuo nti ithio
 (Maththa 28.1-10; Markkoc 16.1-8; Iuanna
 20.1-10)

¹ Ana noca'ri corokit nnoma'ri ime're'rapuruk
 ana ngi'rimak aul iari onekat ngaak iakin tho-
 cikittot cik akin oingkat thoppu. ² Okin thaththiat
 ka'raccak kopa'rettat cik ntoppu. ³ Anaruk akka
 okin thi'rikot ippu, okin thakanniat kumi koIli
 oIeccuo. ⁴ Anakka okin thokat cik akin oprttakat
 tit nolon len, aul w'rek we'ra iomura ummat
 ncik wakot eret wallio ere k'ran kothule'rak
 thokapik aco'rat iccik ken. ⁵ Aul iari ipat n're
 nen ana wirriekathe toma cik nocapu anaruk
 ul wen iomura wi'rekathekin itti, "Ngintha akka
 annokwariccanthet okkwi ipaik ngkit thapat iul
 illet? ⁶ Okkwella cinang kurokot nti ithio nok-
 warikot lon ila kwappi'rethenon akka kwokat
 cik noththok poCelil itti, ⁷ 'Ukul wopul iponyi
 waul wolon ilokithak occokot ana wakkwettat
 nothapak ana noma'ri im'rapuruk wuroko nti
 ithio.' " ⁸ Menik akin okwarikat lon lung.

⁹ Akka okin thokkaprttakot nthoppu akin
 erekanthet ul iattul ana ikken culukku ana ul
 w'rek appik lon ilokat cik. ¹⁰ Ul iokat cik
 oMeriom moMacthelia ana oIona ana oMeriom
 onnan polakup ana opilingon th'rek ithakin

thokat aththut akka okin therenet ul wung wothothilettat. ¹¹ Anaruk okin thatth'rat occikot lon loul iari, akka lon len lokat cik alokathako ere lon nuthuk lella lon cik. ¹² Ana oPoththuruc purokathe ana kwollathe thoppu. Ana kwirratheik noppu akwokathakat ippu ana kwimmakathe kret ika aIeccuo pappocikkakot ngngin akkaik pellek. Ittina kwopakkathe tuan ana kwikkatheik akwoprttakat tit nolon len.

*Ikathar ikaeo noka'ran kAmaoc
(Markkoc 16.12-13)*

¹³ Ana noca'ri cen aul w'rek we'ra iammakot oIeccuo wokat cik aeo noka'ran ikoccot k'ran itti Amaoc ikokat ciththan papotteik noka'ran koUrucelimum. ¹⁴ Okin thokat cik akin erettine lon appik ilokat cik lokkattathe. ¹⁵ Anakka okin thikkot cik akin erettine, aIeccuo ngka kung akkakat akwikkat cik akin onyaro okin auththungon. ¹⁶ Anaruk Kapik kakkongwothekin mikit nti ikarak itti okin thannina itti ook oIeccuo.

¹⁷ Akwipittat kin itti, "Ngintha akka onon thaik thanyaro anneret?"

Akin oco'rat akin thannoka thopirat noka akin irrat cik ee ma ncik nocapu. ¹⁸ Apilin ntiakin poccot k'ran itti oKalapiuc ipittat oIeccuo itti, "Oung pellek akkie cene noka'ran koUrucelimum pomma lon ilokkattathe noma'ri emmi?"

¹⁹ AIeccuo ipittat kin itti, "Ngintha akkokat cik."

Akin othiat tit itti, "Ilokkattathe naIeccuo poNaccir ipokat pul pothernte lon loKapik ipinat cik nthere lon ana ngre tokit koKapik ana tokit koul appik. ²⁰ Ana ul ittittik woul wonoppa

toKapik ana nili nonnon nonekot oIeccuo ana nethet nili noRoma akin akkmak itti kwakuttat, ana okin thokkwekathok nothapak ²¹ anaruk onin thokat ino'rikot cik itti ook akkelikko ul wolccereil ana ma'ri mei mokkothe m'rapuruk ammakka kwiot. ²² Anaruk ul w'rek iari iokat cik ammakothok wirriet nin mikit nti ikarak itti okin theot thoppu ngi'rimak ²³ ana okin thakanniot kumi koleccuo. Ana okin thi'rethenin itti u'rupa wothothilettat woKapik wumminthet kin ncik ana wi'ret itti oIeccuo paik ngkit thapat. ²⁴ Ittina ul w'rek iomura nti ianin woingkathe ana okin thaththiat ammakka ul iari wi'rethenin anaruk okin thannimmak."

²⁵ Kwi'rekathekin itti, "Nthontha akka nthommaik ittina ana nthannoka thacokocokot nthococokot lon nomikit ila ul wothernte lon loKapik weret. ²⁶ Nthomma itti oMiccie ponu itti kwacocokot thiak llon elli akwanti'riko ithrik thungi?" ²⁷ Menik aIeccuo ikkat cik akwerenekin lon ilerethok iatham woKapik ana ilokurrakot cakuruk nci natham woMucca oingkanthet natham noul wothernte lon loKapik appik.

²⁸ Anakka okin thaat iccik koricarak coman nakin thaik thaeo, aIeccuo ikkat cik ere kwaik paeo ciththan. ²⁹ Anaruk okin thokkaprttathe oIeccuo akin i'rekathok itti, "Ton ikkoik akka cik ceot." Ana kwoingkathe akin othikkoik okin auththungon. ³⁰ Anakka kwikkot cik nokuppu'rung kothu'rit akin aththe'ran oIeccuo ponekathe arrakith ana kwopirakanthet Kapik noka ana kwomithathe tit akwikkat cik akwikket kin. ³¹ Ittina kit ken kimmakathe cik ana okin thinakathe oIeccuo ana kwintakatheik ntokit ken. ³² Okin thikkatheik akin erettarne itti, "Orit

thokat thannopira noka akka kwokat cik akwerenerit ana ongekene atham wolon iloporori?"

³³ Okin thurokathe akin opakkat noka'ran koUrucelim akin othiat ul wung wothothilettat iattul ana ikken culukku ana opilingon ithokat cik okin aththungon akin thaik tothun. ³⁴ Akin i'rekat ul ie'ra itti, "İcat Ili wurokot ana wumminthet oCcaaman ncik." ³⁵ Ana ul ie'ra wikkatheik aerenekin lon ilokkattathe ikathar ana tat akka okin thinat oleccuo nthomitho iarrakith.

Oleccuo pumminthet ul iammakothok ncik
(*Maththa 28.16-20; Markkoc 16.14-18; Iuanna 20.19-23; Ngre 1.6-8*)

³⁶ Anakka okin thokat cik akin ere aleccuo ummanthet kin ncik ngka kung itho'rkit then akwi'rekat kin itti, "Ntharaththa atti nthoporot?"

³⁷ Anaruk okin thirritherit ana ipo n're akin ikkat cik ere okin thimmat purrut.

³⁸ Aleccuo i'rekat kin itti, "Ngintha akka onon opellene ana nthontha akka nthakannocokot lon nomikit itti mpaik ngkit thapat? ³⁹ Nokatha nyaun nyin ana tacok tin, ka kin engki nantothnton anninan, purrut pella ka ana mummian ammakka mponu."

⁴⁰ Akka kwi'ret lon len akwokenekat kin nyaun nyung ana tacok tung. ⁴¹ Anaruk okin thaththakannocokot lon len akka okin thaththokat thopirat noka kannan ana nthoprttakotherit ana oleccuo pipittathekin itti, "Onon thou alep'rek cene ia'rttai?" ⁴² Ana akin thekathok pape paputtat. ⁴³ Ana kwonekathe ana kwo'rkkathe tokit ken.

⁴⁴ Akwi'rekat kin itti, “Elli ila mpappi'rethenon akka mpokat unaththungon. Lon appik lomarttakot ammakka lerettathin iatham wolon lothonce'ret lon cik woMucca ana inatham noul wothernte lon loKapik ana iatham woMocumur.”

⁴⁵ Ittina kwanyanthe kin ma othakka itti akin ina atham woKapik. ⁴⁶ Akwi'rekat kin itti, “Elli akkokurrakot itti oMiccie paccokot thiak ana kuroko nti ithio noma'ri im'rapuruk. ⁴⁷ Ana lon lothokkarttako nti ilon ilokithak ana thocikarnthe kin lon ilokithak lakaik ngk'ran koIeccuo ana li'rettat ul appik oku're ncik noka'ran koUrucelim. ⁴⁸ Ana onon thimmat lon elli appik ngkit kon ana mpongothe itti onon thatherene opilingon th'rek. ⁴⁹ Ana mpaik pathothinthet non ila ngappa papponekketheik, anaruk nikkoik noka'ran koUrucelim puccuk Kanang ikupupure akkakanthe kin non akoppapakat ianon mpu'ran ntothi'rot.”

OIeccuo ponekittathe tothi'rot

(Markkoc 16.19-20; Ngre 1.9-11)

⁵⁰ Anakka kwipothekin thapat noka'ran koPeththania akwonthat nyaun kapik akwethiekat kin. ⁵¹ Anakka kwokat cik akwethiekin kwoththeathe nakin akwonekittakat tothi'rot. ⁵² Ittina okin thikkathe kin akin a'ranok nga'rama ana okin thopakkathe noka'ran koUrucelim akin thopirat noka anganna. ⁵³ Ana okin thikkathe kin noppa toKapik appin akin a'rane Kapik nga'rama.

Lumun
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.
All rights reserved.

2020-11-18

PDF generated using Haiola and XeLaTeX on 23 Aug 2023 from source
files dated 29 Jan 2022

b9cb69ce-3694-5d9f-bda5-4a2243fae